

KALATA BESAM

KALATE OSU

Bezôsôô baa bikotekot bi bôt b'ave'an

(Besam 112 ; 128 ; Yér 3 :10, 11 ; 42 : 21 ; Yér 17 ; 7, 8 ; Min 14 : 32 ;
Mat 7 ; 21-27 ; 13 : 40-43 ; I Tim 4 : 8, 9 ; Yak 1 : 25)

- 1 1 Mvom a mỗt a ne te wulu a
fe'e bikotekot bi bôt,
Nge tebe e zene beboabé,
Nge tabe ésulane bôt be ne ébiasé :
- 2 Amu a nye'e ve metiñe me YEHOVA,
A metiñe mé mme a bindi nlem mỗs baa alu.
- 3 A ye bo aval ane élé é ne mbéan e minsa'a mi atôñ mendim,
Nje j'awum bibuma bié éyoñe mbu jé,
Nde fe mekaé mé teke'e viele,
Jam ese a bo d'ake nye mvoé.
- 4 Ve bikotekot bi bôt bi se nalé,
Bi ne ane mbuan ñwô ôte évuñulu j'atyamelan.
- 5 Ajô ete, bikotekot bi bôt bi aye ke tebe mvo'é asu ntyi'ane mejô,
Nalé fe beboabé e ésulane bezôsôô be bôt été.
- 6 Amu Yehova a yeme zene bezôsôô be bôt ;
Ve zene bikotekot bi bôt j'aye jañ.

Njôane ya Nyô YEHOVA a nga wo'o mbo

(Besam 18 : 51; 21 : 9; 110; Mat 21 : 37-45; Yôh 3:36;
Min 4:25-28; 13 : 27-41; Fil 2 : 9-11)

- 2 1 Amu jé bikul bi atôkan ana,
A bo ve mbôndane mbia mefek e zesé ?
- 2 Bejô bôte ya si nyô b'akôme bebien bité,
A bejôô b'asulan a bôndé mefek,
Ane b'aye wosan YEHOVA baa Nwo'ane wé, a jô na,
- 3 Ntama téane mengata'a map,
A wua fe minsinga miap e fé.
- 4 Nyô a too e yôb été a woé;

- Nti a ye bi be fianga.
- 5 Wôna a ye kobo be a ayaa,
A dimili be fek a ayo'o dé, a jô na,
- 6 Me toéya njô bôte wom e Nkôle Siôn e yôp,
Mfufube nkôle wom.
- 7 M'aye kañete abendé YOHAVA :
A nga jô me na , O ne mone wom,
Den, mamien me biaéya wo.
- 8 Jake'é ma, nde m'aye ve wo bikul bi bo ngab éli'i jôé,
A meku'u me si me bo akume Doé.
- 9 W'aye bu'u be a ntum étyé,
A bôé be bifuse bifus ane vie'e mmé meviek.
- 10 Ajô ete nde, A mia bejô bôt, bo'ane fek,
Wo'ane melep, A mia betyi'i mejô ya si nyô.
- 11 Bo'ane YEHOVA ésaé a woñ,
A vak mi fô'ôba'an.
- 12 Lata'ane mon anyu, a za yaa,
A mi aye jañ e zene yôp,
Amu ayaa dé d'aye ji'a yôñ,
Mvom a ba bese b'asobô e be Nye.

Meye'elane ya memetyé mfa'a ya ntabane Zambe mebun

(2 Sam 15:16, Besam4:5; 27:1-3, 6; 56:3-5)

Sam David, éyoñ a nga mate Absalôm, mone wé.

- 3** 1 A YEHOVA, ngo'o besiñe bam be nto abui !
Be ne abui, ba b'akôlô e si a wosane ma,
- 2 Be ne abui, ba b'ajô nsisime wome na ,
Nyian ô nji fe bon ye e be YEHOVA. Sélah !
- 3 Ve wo, A YEHOVA, ô ne ében j'abômane ma,
Etôto'o jam a nyô a bete nlô wom .
- 4 M'aye loene YEHOVA a tyiñe jam,
Nde a ye yalane ma e mfufube nkôle wé. Sélah !
- 5 M'abômbô e si a ke ôyo;
Me beta vee; amu YEHOVA a ne ésuka'a jam.
- 6 M'aye bo te ko awôm betoyini be bôt woñ,

- Mmbe b'atebe minsamba ya wosane ma mbôma'ane.
- 7 kôlô'ô si, A YEHOVA, nyi'i ma, A Zambe wom ;
 Amu ô maneya bibi besiñe bam bese e minkek,
 Ô maneya bu'u mesôñe bikotekot bi bôt.
- 8 Nyian ô ne jôme YEHOVA !
 Ebotane jôé é bo'o e be bôte bôé ! Selah !

Meye'elane ya mamengôé amu ndinlem e be Zambe

(2 Sam 17:15-29; Besam 3; 84:12, 13)

Mfa'a évet Mezik; e bibôbôma bine minsañ. Sam David.

- 4** 1 Yala'ane ma, éyôñ m'aloen,
 A Zambe nyô a ne zôsô'ô wom !
 Eyoñ me nga yen njuk, ô nga kôme ma afôla vôm.
 Tame ko ma éngôngo, a wô'ô meye'elane mam.
- 2 A mia bone be bôt, ntaa vé duma dam d'aye tôban ékpwe'ela'a ?
 Ntaa vé mi a ye nye'e bemomo be mam, a ke mi ajeñ mam minsos? Selah!
- 3 Ve yemekan e na, YEHOVA a maneya tob émien mô't a ko nye wôñ :
 YEHOVA a ye wô'ô éyôñ m'aloene nye.
- 4 Mi fô'ôba'an, ve te boan abé :
 Mi kôbô'ô e minlem mienan été, e bijô'ôba'a bienan, ve mi taba'an ne mieññ . Sélah !
- 5 Mi tyi'i metuna'a me ne zôsôô,
 Ve mi taba'ane ndilem e be YEHOVA.
- 6 Abui bôt d'ajô na, Za a ye liti bia jam e ne mvaé ?
 Liti'i bia éfufup ya asu dôé, A YEHOVA !
- 7 O futiya abui mevak e nleme wom été
 Adañ abim avak be bili amu fône jap a mfefé wain wop.
- 8 Mvo'é mvo'é, m'aye bômbô si a ke ôyo,
 Amu wo YEHOVA étam, w'atoé me mvo'e.

Meye'elan ya ja'é nkaman mfa'a bikotekot bi bôt

(Besam 7 :II ;Min 6 :16-19)

Mfa'a évet beloñ mimfañ. Sam David

- 5** 1 Tame kee alo e mejô mam, A YEHOVA,
Yemela'ane mbindane mam wom.
- 2 Tame vô'ôlô tyiñe ya nloene wom,
A Njôô wom, a Zambe wom
Amu wo m'aye'elane nye.
- 3 A YEHOVA, mametyé w'aye wô'ô tyiñe jam;
Mametyé m'aye tabe nkômesan e be wo, a m'aye mombô.
- 4 Amu ô nji bo Zambe a yen ékotekote mvaé;
Abé d'aye bo te tabe e be wo.
- 5 Bôt be ne mebun b'aye bo te tebe e mise môé;
W'avini beboabé bese.
- 6 W'aye jiane ba b'akobô minsos :
YEHOVA a yene môt a ne ñwôé bôt a medu'an, nyé.
- 7 Ve mfa'a wom, amu abui mvame dôé, m'aye nyiin e nda jôé été :
M'aye kañe wo mfufupe tempel wôé été, me ko wo woñ.
- 8 Wulu'u ma, A YEHOVA, e zôsôô wôé été, amu besiñe bam;
Sô'ane zene jôé zôsoô asu dam.
- 9 Amu jame ya buni e nji bo e menyu mab été,
Endaman é ne e minku'u miab été,
Engôñe jab é ne soñ é yoo,
B'alén a ôyeme viap.
- 10 Va'a be mekua, A Zambe ;
Kañise'e na be sub e mefe'e mab bebien été;
Tita'ane be atan amu abui mintyamane metiñe dap,
Amu be maneya tyaman a wo.
- 11 Ve ba bese b'asobô e be wo be va'ak,
Be sô'ôk nnôm éto amu mevak;
Amu wo w'akamane be,
Nde ba b'anye'e jôé dôé be va'ak e be wo.
- 12 Amu w'aye bôtane môt a ne zôsôô ;
A YEHOVA, w'ayebômane nye a mvam aval ane ében.

Meye'elan ya jaé mvam éyoñ ya njuk

(Besam 38 ; 69 :30 ; 143)

Mfa'a évet Mezik ; Bibôbôma bi ne minsañ.

Mvet é ne minsañ muam.

- 6** 1 A YEHOVA, te lebe ma éyoñ w'ayaa,
Nalé fe te bôme ma éyoñ nlem ô ne wo ayôñ.
- 2 Ko me éngôngo, A YEHOVA, amu me maneya tek ;
A YEHOVA, saé ma amu bivese biam bi ayene njuk.
- 3 Nleme wom fe w'aju'ulan :
A wo, YEHOVA, ntaa vé ?
- 4 Bula'an a YEHOVA, nyi'i nsisime wom :
Nyi'i ma amu mvame jôé.
- 5 Amu e awu été ôsimesane ya simesane wo ô nji bo:
E Shéôl été za a ye kañe wo ?
- 6 Me ju'uya a ntate wom;
M'ajok e mili'i mam été e énoñe jam ngume alu;
M'asôb énoñe jam a mili'i mam.
- 7 Dise dam d'akôt amu ôlun :
D'ayômbô amu besiñe bam bese.
- 8 Kôla'an e be ma, mia beboabé bese;
Amu YEHOVA a meneya wô'ô tyiñe ya du dam.
- 9 YEHOVA a maneya wô'ô nja'ane wom;
YEHOVA a ye nyoñe meye'elane mam.
- 10 Besiñe bam bese b'aye wu ôson a yene njuk :
B'aye bulan e mvus, a wu ôson été été.

Ntili Sam a ja'é YEHOVA na a kame nye mfa'a bikotekote bi bôt

(I Sam 24; 26, Besam 9:17; 92:16)

Jia David a nga yia YEHOVA, amu Kush, mone Benyamin.

- 7** 1 A YEHOVA Zambe wom, m'asobô e be wo :
Nyi'i ma a kame ma e be ba bese b'atôñe ma.
- 2 Aval ane ñbweñbwem ,be za nyabe nsisime wom,

- A nyabe wô bifus, amu teke'e nkam.
- 3 A YEHOVA Zambe wom, nge me nga bo ke jame dina;
Nge nkoban éziñ ône ke e mo mam;
- 4 Nge me nga bo abé e be mô t a nga too me mvôé,
Nge me nga sa nkpwe'ele wom teke'e étom;
- 5 Nsiñe wom a toñe ma a bilane ma;
A tibi'i ényiñe jam akui si,
A jôké' é duma dam e mbulu'u été. Sélah !
- 6 Kôlô'ô si A YEHOVA, a ayaa dôé ;
Tebe'e, a leb ayaa besiñe bam ;
Tame vee, A Zambe wom, ô maneya liti ntyi'an ajô.
- 7 Kañese'e na, ékôane bôt é bômane wo ;
A bula'an e yôb été ô lôte be e minlô yôp.
- 8 YEHOVA a tyi'i meyoñ mejô,
Tyi'i ma ajô, A YEHOVA aval ane zôsô wom a né,
A aval ane mvo'é jam é né e be ma.
- 9 Kañese'e na, abé bikotekot bi bôt e man,
Ve yemete'e bezôsô be bôt :
Amu Zambe a ne zôsôô, a ve'ele minsimesan a minlem ;
- 10 Ebene jam é ne Zambe,
Nyô a nyii mô t a ne zôsôa nlem.
- 11 Zambe a ne zôsôa ntyi'i mejô,
A ne Zambe a yaa môs ôse.
- 12 Nge mô t a bo te kôñelan,
A ye jep fansoñe jé ;
A mane kolé élaé jé, a sôñe jé.
- 13 A maneya kôm émien mekoñ ya awu,
A bo mekoñe mé m'adi'an.
- 14 Tame yen, ékotekote mô t j'anyoñ abum abé,
A nto nduu abum ékotekot, a biaé minsos.
- 15 A nga fa'a ébé, a vuli je,
Akekui a nga ku e ébé émien a nga fak.
- 16 Ekotekote jé j'aye bulan e nlô wé émiene yôp ;
A évô jé j'aye ku e abôbône dé émiene yôp.
- 17 M'aye ve JEHOVA akéva aval ane zôsôô wé a né ;
M'aye kañe jôé YEHOVA, Medañe Bôtô.

Etôto'o YEHOVA a duma mô t

(Besam 19 :1-7 ; 113 ; Behéb 2 :6-10)

Mfa'a évet mezik. Ebôbôma Gitith.

Jia David

8 1 A YEHOVA, Nti wongan,

Aka'a anen jôé dôé e né mfa'a ya si ése !

Wo ô nga bete дума dôé e yôb été!

- 2 A menyu minkeñelé a bitum bi bon,
Ô nga yemete aka'a dôé, amu besiñe bôé.
Nde w'aye toé nsiñe bôt a nkune bôt, évô.
- 3 Eyoñ m'afombô yôbe dôé, ésaé mo môé mebien me nga bo,
Ngon a ateté, mbie ô nga télé;
- 4 Môt a ne za jômô, ane w'asimesane nye ?
A mone môt, ane w'amvamane nye ?
- 5 Amu ô nga té nye a li'i ve tyôtyôé ya bo ane Zambe ;
Ane ô nga jalé nye ékat étôtôk a дума.
- 6 O nga télé nye njôô ya biôm mo môé me nga té;
O nga télé biôm bise mebo mé si:
- 7 Mintômba mise a binyaka, ya a betite ya fé,
- 8 Anone ya yôp, a kose ya mañ, jôm ése j'awulu e mezene ya mañ ?
- 9 A YEHOVA, Nti wongan,
Aka'a anen jôé dôé e né mfa'a ya si ése !

Jia ya Mvean akéva amu zôsôô Zambe

(Yiôb 19 :28, 29 ; Besam 7 ; 18 : 47-51; 35)

Mfa'a évet mezik ; (Muth Laben) Jia David.

9 1 M'aye ve YEHOVA akéva a nleme wom ôse;

M'aye kañete bitua bi mam biôé bise.

- 2 M'aye vak a fône fe a wo,
M'aye yia jôé dôé bia bi ékaña'a, A Medañe Bôtô.
- 3 Eyoñ besiñe bam b'abulan e mvus,
B'akolé ôbak a jañ asu dôé.
- 4 O nga yemete mekabe mam a ajô dam,
Ô nga tabe si e éto njôô ane zôsôa ntyi'i mejô.
- 5 O nga komekane meyoñ me bôt;

- O nga jiane bikotekot bi bôt;
 O nga tyame jôé dap nnôm éto a nnôm éto.
- 6 Besiñ be kuiya e suk, be nto ve bili'i ya nnôm éto;
 Minlam ô nga tyam, ja'an ôsimesane ya été ô jañeya.
- 7 Ve Zambe a too si ane njô bôt nnôm éto,
 A kômeya éto njôane jé ya tyi'i mejô;
- 8 Nde a ye tyi'i si nyô mejô zôsôô;
 A ye tyi'i meyoñ mejô zôsôô.
- 9 YEHOVA a ye bo ôlem mfa'a bewu ékpwe'ele,
 Ôlem mfa'a biyoñ ya njuk.
- 10 Ba b'ayeme jôé dôé b'aye tabe wo mebun,
 Amu YEHOVA, ô nga bo te li'i ba be nga jeñe wo.
- 11 Yiane JEHOVA bia bi ékaña'a, nyô a too e Siôn !
 Kañeta'ane mam a bo e meyoñ été.
- 12 Amu éyoñ a kune metyi a ye simesane be;
 A ye bo te vuane ñyôn minzôzôé.
- 13 Ko me éngôngo, A YEHOVA !
 Tame yen ékpwe'ele m'ajibi e be besiñe bam.
 Wo w'abete me yôp a vaa ma e mimbé ya awu.
- 14 Nalé m'aye kañete foé ékaña'a jôé ése,
 E mimbé mi ngone ya Siôn, m'aye vak amu nyiane wôé.
- 15 Meyoñ me bôt me jañesaneya e ébé be nga fak :
 Avot be nga ya, abo dab bebien e biliya été.
- 16 YEHOVA a boya na be yeme nye, a maneya tyi'i mejô;
 Bikotekot bi bôt bi maneya timbi e bisaé ya mo mab été. Sélah !
- 17 Bikotekot bi bôt bi aye ke e Shéôl,
 Meyoñ mese m'avuane Zambe.
- 18 Amu b'aye bo te vuane mbumbua môl melu mese;
 Nalé fe ndinlem mbumbua môl j'aye bo teke'e jañ nnôm éto.
- 19 Kôlô'ô si, A YEHOVA; te kañise na, môl a dañ :
 Meyoñ me bôt me tyi'ibane mejô au dôé.
- 20 Va'a be woñ minlem, A YEHOVA ;
 Me'ete'e na meyoñ me bôt me yeme na, bebien be ne ve bôt. Sélah !

Meye'elane ya ja'é nkpweebane bikotekot bi bôt

(Besam 12; 36; 64; 94; 140)

10

- 1 Amu jé w'atabe ôyap, A YEHOVA ? A
Amu jé w'asobô e biyoñe ya njuk ?
- 2 Amu mebune bikotekot bi bôt m'atôn mimbubua mbia ntôñan ;
Be bili'i e mefe'e be nga bôndé été.
- 3 Amu ékotekote môť j'akobô mebun amu minkômbane ya nleme wé,
A môť a nyamete biôm ayo'é, a kobô YEHOVA ébiasé.
- 4 Amu mebun ya asu dé, ékotekote môť é ne te jeñe nye ;
Minsimesane mié mise mi ne na, Zambe a ne momo.
- 5 Mezene mé m'abu'uban biyoñe bise ;
Mintyi'ane mejô miôé mi ne nye ôyabe yôp,
Vôm a ne te yen :
Mfa'a ya besiñe bé bese, a nyebé be.
- 6 A simesan e nleme wé été na,
M'aye bo te fô'ôsan ;
Akekui miaé misé, m'aye bo te tôbane njuk.
- 7 Anyu dé e ne biyo'é a medua'an a ékpwe'ele ne lut :
Abénlem a ékotekok bi ne ôyeme vié si.
- 8 A too si vôm b'ayabe bôt e minlam ;
A wôé mimvômvo'é mi bôt e mevôm minsom ;
Mise mé m'ayabe mintete'asoé.
- 9 A yabe asoé avak abe ñbweñbwem é ne ébô'a jé ;
A bi éngôngole môť éyoñ a dutu nye avote dé été.
- 10 A wunubu, a vitibi si,
A ntete'e môť w'aku si amu ngule jé.
- 11 A simesan e nleme wé été na, Zambe a vuaneya,
A solé asu dé, a ye bo te yene de.
- 12 kôlô'ô si, A YEHOVA ; A Zambe, bete'e wo wôé e yôp ;
Te vuan éngôngole môť.
- 13 Amu jé ékotekote môť j'abiasé Zambe,
A jô e nleme wé été na, W'aye be te tyô'ô de ?
- 14 W'ayeme fo'o de ; ya, w'ayene fo'o njuk a éndeñela'a,
Nalé w'aye nyoñe de e mo môé :
Ntete'e w'ave wo émien ;
O nto mvolô monenyui.
- 15 Bu'u wo ékotekote môť a wu mboabé.
Jeñ ékotekote jé akekui w'aye bo te yene je.
- 16 YEHOVA a ne Njô bôt nnôm éto a nnôm éto ;

Meyoñ me bôt m'aye jañ e si jé.

- 17 A YEHOVA, w'aye wô'ô nkômban évôvoé mô :
W'aye ve nleme wope ngu, w'aye vit alo dôé,
18 Ane w'aye tyi'i monenyui ajô a môta wu ékpwe'ele,
Nde môte ya metek a ye bo te beta bo angôndô.

YEHOVA a ne asôé a ôlem

(I Sam 29 :1, 2 ; Besam3 ; 5 ; Yes 3 :10, 11)

Evet mezik. Jia David

- 11** 1 M'asobô e be YEHOVA ; mi ne ngule ya jô me aya na,
Yele' aval ane ônon a ke e nkôle wônan;
2 Amu mi lôô ane ékotekote môt j'akolé élaé,
B'abeté akoñ élaé dab e mbua yôp,
Ane b'aye wua môt a ne nleme zôsôô e dibi été ;
3 Nge mimbôka'a mi si mi nto ntyaman,
Môt a ne zôsôô a ne ngule ya bo jé ?
4 YEHOVA a too e mfufube tempele wé été :
YEHOVA, éto njôane jé, é ne e yôb été ;
Mise mé m'afombô, biyakole bié bi ave'ele bone be bôt.
5 YEHEVA a ve'ele môt a ne zôsôô a nyô a ne ékotekot,
Nleme wé w'avini nyô a nye' évô.
6 A ye noo bikotekot bi bôt ma'a me nduan a sulfur ;
Evuñulu é ne ayôñ j'aye bo ngabe ya kobe jap.
7 Amu YEHOVA a ne zôsôô ; a nye'e zôsôa mimboan ;
Bôt be ne zôsôô b'aye yen asu dé.

Zambe a ne Mvolô a wosane bôte medu'an

(Besam 14, 120, Fil 2 :15)

Mfa'a Evet mezik . E Sheminith. Jia David.

- 12** 1 Volô'ô, A YEHOVA, amu môta Zambe a se fe:

Amu bebuni be maneya vas e zañe bone be bôt.

- 2 Môt ase a kobô myô (*nyô T.O.M.*) mbok ve medu'an;
B'akobô a élene biyaé a minlem mibaé.
- 3 YEHOVA a tame sem élene biyaé ése,
Oyem vi akobô beta be mam;
- 4 Ba b'ajô na, Bi aye dañ a ôyeme viangan ;
Biyaé biangan bi ne jôme jangan;
Za a ne njôô wongan ?
- 5 Amu bingôngole bi bôt bi maneya sabane biôm,
Amu mimbubua mi atat amu édudu ;
Eyoñe ji m'aye kôlô si, nalé YEHOVA a jô :
M'aye toé nye vôm a ne mvo'é, a suu abuk.
- 6 Mintiñetan mi YEHOVA mi ne mfuban,
Aval ane silba a maneya tumban e mbe'e nduan e si nyô,
A meneya fub biyoñe zañbwaa.
- 7 Kale'e bia, A YEHOVA,
Ba'ale'e bia nnôm éto mfa'a ya miaé bôte wu.
- 8 Bikotekot bi bôt bi awulu mimfa'a mise,
Eyoñ abé e nto mbetane yôb e be bone be bôt.

Meye'elan ya yi mvolan éyoñe ya njuk

(Besam 70; 142)

Mfa'a Evet mezik. Jia David

- 13** 1 Ntaa vé, A YEHOVA? Ye w'aye vuane me nnôm éto ?
Ntaa vé w'aye solé me asu dôé ?
- 2 Ntaa vé m'ayiane jibi njuk e nleme wom,
A bi ôlun e nleme wom été môs ôse ?
Ntaa vé nsiñe wom a ye me zalebe yôp ?
- 3 Fombô'ô a yalane ma, A YEHOVA Zambe wom ;
Va'a me éfufub e mise mam, me za ke ôyo ya awu ;
- 4 Nsiñe wom a za jô na, Me dañeya nye ;
Minziziñ mi za vak éyoñ m'afô'ôsan.

- 5 Ve me nga tabe mebun a mvame jôé ;
Nleme wom w'aye vak a nyiane wôé.
- 6 M'aye yia YEHOVA bia,
Amu a nga bo me abui mvaé.

Akut a Abé ya bôt

(Met 6: 5, 11, 12; Besam 53; Rôm 3: 9-20)

Mfa'a Evet mezik. Jia David

14

- 1 Akut d'ajô e nleme wé été na, Zambe a ne momo.
Be maneya boé, be boya mbia be mam ;
Tebe'e mô't a bo mvaé :
- 2 YEHOVA a fombô bone be bôt e si nyô a too e yôb été,
A yen nge bôt be éziñ be nga bo fek, be ne, ba b'ajeñe Zambe.
- 3 Be maneya yale feñ bese, be nto nyé nyé;
Te ke mô't a ne nyô a bo mvaé, momo, te ke wua.
- 4 Ye be ne teke'e ñyemane mam,
Mia beboabé bese,
Ba b'adi bôte bam aval ane b'adi bidi, a bo te loene YEHOVA ?
- 5 Vôm ate b'aye dañeko woñ,
Amu Zambe a too e be miaé bôt ô ne zôsôô.
- 6 Mi aye ju'ulane mefe'e me éngôngole mô't,
Ve YEHOVA a ne asoé dé ?
- 7 Ngo'o nge nyian Israël ô nga so ke e Siôn !
Eyoñe YEHOVA a ye bulan minkôm mi bôte bé,
Yakob a ye vak, Israël a ye yene mvaé.

Fulu mô't a nga bialé e Siôn

(Besam 24 ; 34 :12-15 ; Yes 33 :14 ; Ezék 18 :5-9)

Jia David

15

- 1 A YEHOVA, za a ye tabe e tabernakele wôé?
Za a ye tabe e mfufube nkôle wôé?
- 2 Nyô a wulu mvo'é, a bo'o zôsôô,

- A kobô'ô bebela e nleme wé été.
- 3 E nyô a ne teke'e so'é a ôyeme vié,
A too teke'e bo mvôé jé abé,
Nge komekan ébe mvôéé wé
- 4 E nyô mise mé me nji biasé mbia mô, t,
Ve a semé ba b'ako YEHOVA woñ ;
Nyô a kalane jam d'andaman émien, a bo te koñelan.
- 5 Nyô a bo te kôlé moné wé amu nsenge,
Nge nyoñe nkuse ya kpweé mô t a ne te bijô.
Nyô a bo mame ma a ye bo te fô'ôsan nnôm éto.

YEHOVA, ngabe ya éyiñ ñyia Besam; Nkôté ya awu dé

(M.M. 2:22-36; 13:35-37)

Miktam David.

- 16** 1 Ba'ale'e ma, A Zambe; amu me solô e be wo.
- 2 M'ajô YEHOVA na, wo ô ne Nti wom;
Me nji bi mbamba jam vôm mfe ve e be wo.
- 3 Abim mimfufub e ne e si nyô, mmbe bete be ne mimfañ mi bôt,
Ava'a dam ese e ne e be be.
- 4 Ba b'atoñe zambe mfe b'abulu alune dap;
M'aye bo te sôé metuna'a metyi map,
Nge tote môé map e biyaé biam.
- 5 YEHOVA a ne ntobane ngabe wom a élaé jam:
Wo w'aba'ale ngabe jam.
- 6 Minkol b'atyi'i minné mi maneye me ku e mbamba mevôm;
Yaa, me mbili mbamba ngap.
- 7 M'aye botane YEHOVA, nyô a bôndé me fek;
Alu ese nleme wom w'aye'ele fe ma.
- 8 Me teleya YEHOVA kom ése e mise mam,
Amu a ne me e mbonnôm, m'aye bo te fô'ôsan.
- 9 Ajô ete nleme wom w'avak, a nsisime wom w'afôn.
Nyôle jame fe é nto mvo'é.
- 10 Amu w'aye bo te li'i nsisime wom e Shéol ;
Nge me'ete na mbuni wôé a yen ébo.
- 11 W'aye liti me zene ya ényiñ,

Afo' o mevak e ne asu dôé,
Mbamba be mam me ne e mbonnôme wôé nnôm éto.

Meye'elan ya jaé nkaman mfa'a bekwe'ele

(1 Sam 23 :25, 26 ; Besam7 :26 ;35)

Meye'elan me David.

- 17** 1 Wô'ô ajô e ne zôsô, A YEHOVA ;
Vô'ôlô'ô ñyône wom !
Tame kee alo mfa'a ya meye'elane mam,
Mme me nji so e biyaé bi ne medu'an.
- 2 Zôsôa ntyian ya ajô dam a so'o ebe wo !
Mise môé me bo'o zôsôô !
- 3 Nge w'ave'ele nleme wom, nge w'ajome nleme wom a alu ese,
W'aye bo te yen ékotekot e be ma;
Anyu dam e nji tyam metiñ?
- 4 Eyoñ m'afombô mimboan mi bôt, a mejô ya biyaé biôé,
Me nga sa'ale mezene me mvôvô.
- 5 Metelé mebo mam me yemeya ngul e mezene môé été;
Mebo mam me nji ke sendé.
- 6 M'aloene wo, amu w'aye yalane ma, A Zambe;
Ke'e alo dôé e be ma, wô'ô mejô mam.
- 7 Liti'i étua mvame jôé, A Nyii ba b'ajeñ asoé,
Nyô a nyii be mfa'a besiñe bab a ngule ya mbonnôme wôé.
- 8 Ba'ale ma ane nyia dis;
Solé'é ma e éjijine ya mefabe môé si.
- 9 Mfa'a bikotekot bi bôt, ba b'akpwe'ele ma,
Besiñ ya awu b'abômane ma.
- 10 Ba b'adibe minleme miab a mvam;
A menyu map b'akobô mebun.
- 11 B'atôñe ma e binyalé mebo;
Be maneya bômane bia jame kom;
B'asoé me mis ane b'aye dume me e si.
- 12 B'afunan ñbweñbwem é ne avôle ya nyap,
Aval ane étoñ ñbweñbwem j'ayabe vôm ya nsom.
- 13 Kôlô'ô si, A YEHOVA !

- Somela'ane be, dume be si kayale !
 Nyi'i nsisime wom e be ékokote mô̄t a nkpwaté mekô̄ne wô̄é.
 14 Nyi'i ma e be bôt a wo wô̄é, A YEHOVA,
 E be bôt ngab ényiĩ é ne nyô ya si ndôn.
 Mebum map m'ajaé a biôm ô nga kôan mfa'a wop;
 Bone bap be bii abui adañ abim d'ayian;
 Be li'i jôm éziĩ mfa'a minkeñelé miap.
 15 Ve mfa'a wom, m'aye fombô asu dôé e zôsôô été;
 Eyoñ m'avee, m'aye tabe mvô'é, me lôô éve'ela'a jôé.

Nkañane YEHOVA amu ndañan a njôan

(2 Sam 22; Besam 2)

Mfa'a Evet Mezik , Sam David mboésáé YEHOVA aval ane a nga yia YEHOVA mejô ya jia ji e môs YEHOVA a nga nyii nye e mo besiñe bé bese a e mo me Saul. Nye na :

- 18** 1 M'anye'e wo, A YEHOVA, ngule jam.
 2 YEHOVA a ne nkôm ako'o wom,
 A ôleme viam, a nyii wom ;
 Zambe wom, nkôm ako'o wom, nnye ate m'aye sobô e be nye ;
 Ebene jam, a nla'a ya nyiane wom,
 Ôleme viam ô ne ôyabe yôp.
 3 M'aye loene YEHOVA, nyô a yiane kañeban,
 Nalé m'aye nyiiban e be besiñe bam.
 4 Minkol mi awu mi nga bômane ma,
 Ndône ya njañan é nga ve me woñ ;
 5 Minkole mi Shéôl mi maneya me dutu,
 Bikoé bi awu bi kuiya e be ma.
 6 Nju'u wom été me nga loene YEHOVA ;
 Me nga yôn e be Zambe wom mfa'a ya mvolan :
 A nga wô'ô tyiñe jam e tempele wé été,
 A ñyône wom ô nga kui e melo mé.
 7 Ane si é nga ti'itan a fô'ôsan ;
 Mimbôka'a mi si ya beta minkôle fe mi nga ndeñetan a fô'ôsan, amu a nga yaa.
 8 Otita ô nga bet ô so'o e mimbile mi jôé mié,
 A nduan j'ajian é nga so anyu dé ;
 Ma'a me yôñôk minkaba 'a mi so'o e be nye.

- 9 A nga vite fe yôp, a suse si ;
Afibe dibi e mbe nye e mebo mé si.
- 10 A nga bet kerubime yôp, a yele ;
A nga zu avôl avô e mefap me évuñulu.
- 11 A nga bo dibi ébuta'a j'abômane nye,
Endelé jé j'abômane nye, afip minkut,
Ve dibi dibi fufulu a mendim.
- 12 Efufub é mbe ôsu vié, é nga tulan afip minkut,
Meta'a a ma'a me nduan me so'ok.
- 13 YEHOVA a nga bame fe e yôb été,
Medañe Bôtô ya Yôp a nga kobô tyiñe jé,
Meta'a a ma'a me nduan.
- 14 Ane a nga lôm mekoñ me élaé mé, a tyamelane be ;
A nga kuli minkôkôé mi zo'oyañ, a bôé be.
- 15 Nde si ya mañe si é nga yené,
A mimbôka'a ya si nyô mi nga bôô sôsoé,
amu mbamane wôé, A YEHOVA, amu mvebe ya mimbile mi jôé miôé.
- 16 A nga same wo e yôb été, a nyoñe ma ;
A nga dutu ma me vas e abui mendim été.
- 17 A nga nyii ma e be éwôlô nsiñe jam,
E be ba be nga siñe ma ;
Amu be nga dañe me ngu.
- 18 Be nga kui e be ma môs me nga yene njuk;
Ve YEHOVA a mbe ésuka'a jam.
- 19 A nga kuli me atan e vôm a mbe ndam;
A nga nyii ma, amu a nga yene me mvaé.
- 20 YEHOVA a nga ya'ane ma aval ane zôsôô wom a né;
Aval ane mfubane ya mo mam ô né, a nga ya'ane ma.
- 21 Amu me nga ba'ale mezene me YEHOVA,
A me nji kôlô e be Zambe wom mbia nkôlan.
- 22 Amu minjôane mié mise mi mbe e mise mam,
Amu me nji vaa mintelane memvinda mié e be ma.
- 23 Me nga too fe nya mvo'é e be nye,
Me nga ba'ale mamien mfa'a ya abé.
- 24 Ajô ete YOHOVA a nga ya'ane ma aval ane zôsôô wom a né, aval ane
Mfubane ya mo mam ô né e mise mé.
- 25 E be môl a ba'ale metiñ, wo fe w'aye ba'ale metiñ.
E be môl a ne nya mvo'é, wo fe w'aye bo nya mvo'é.

- 26 E be mỗt a ne mfuban, wo fe w'aye liti na ô ne mfuban.
E be mỗt a ne êkotekot, wo fe w'aye liti womien êkotekot.
- 27 Amu w'anyii bôt b'asuu bebien e si;
Ve ba b'abete minlô, w'aye suu be e si.
- 28 Yaa, wo w'abo'é lampe wom;
YEHOVA Zambe wom a bo dibi dam, éfufup.
- 29 Yaa, amu wo me ne ngule ya ko'o nkane bita;
Amu wo Zambe wom, me ne ngule ya yôô aka'a meko'o yôp.
- 30 Zambe, nyô zene jé é ne nya mvo'é;
Ntiñetane YEHOVA w'ayené na ô ne bebela;
A ne ében mfa'a ba bese be solô e be nye.
- 31 Amu na za ane Zambe, ye sa YEHOVA ?
A za a ne akôm akok, ye sa Zambe wongan ?
- 32 Zambe a ne nyô a jalé me angeteñ a ngu,
A nga bo zene jam nya mvo'é.
- 33 A nga bo mebo mam aval ane mebo me nkok,
A telé me mvo'é e mevôm me ne mbetane yôp.
- 34 A ye'ele mo mam mewosan ;
Nalé ate mo mam me ne ngule ya kolé élaé mvot.
- 35 O nga ve me ébene ya nyiane wôé ;
Nde fe mbonnôme wôé w'asu'u ma mfa'a ya si ;
A mvolane wôé ô boya me anen.
- 36 O nga nene vôm ya telé mebo mam e si,
Nde mebo mam me nga bo te sendé.
- 37 Me nga titane besiñe bam, a bilane be ;
Me nga bo te bulane mvus akui be nga mane jañ.
- 38 Me nga jimbi be, nde be nji fe bo ngule ya beta tebe ;
Be nga ku e mebo mame si.
- 39 Amu ô nga jalé angeteñ dam a ngul ya bo mewosan;
O nga bo na besiñe bam be ku ma e mebo si.
- 40 O nga bo na besiñe bam be lume me mvuse jap,
A na, me jiane ba be nga siñe ma.
- 41 Be nga yôn mfa'a ya mvolan, ve teke'e mỗt ya nyii be.
Be nga yôn e be YEHOVA, ve a nji yalane be .
- 42 Me nga ty'a be menyuñ ane mbulu'u mfeb w'avuñulu;
Me nga kute be e fé aval ane ndobo'o ya minseñ.
- 43 O nga nyii ma mfa'a ya bôt b'abo ma mintañete;
Ayoñ me nji yem e nga bo me bisaé.

- 44 Nné ane be wô'ôtane fe ma, be nto ve bo me mewôk;
Bikul bi azu bi ase'e ma.
- 45 Bikul bi nto te fe fek,
B'azu b'anyeñeban be so'o mfa'a ya aleme dap.
- 46 YEHOVA a vee; akôm ako'o dam e bo'o ébotan,
A Zambe ya nyiane wom a bo'o mbetane yôp.
- 47 E Zambe a nga kune ma,
A sili meyoñe me bôte si mfa'a wom;
- 48 Nyô a nga nyii ma mfa'a besiñe bam ;
Yaa, wo ô nga bete me yôp adañe bôt b'asengane ma ;
O nga nyii ma mfa'a bôt b'abo évô.
- 49 Amu jame dina, m'aye kañe wo, A YEHOVA, e meyoñe me bôt été,
A m'aye yia jôé dôé bia bi ékaña'a.
- 50 A nga ve njô bôte wé beta mindañan,
A liti beta nye'ane wé e be ñwo'ane wé,
E be David a mvoñe bôt jé, nnôm éto.

Bisaé a mejô me Zambe

(Besam 18 :29-31 ;119 ; 148; Rôm 1 :19 ; 20 ; 2 Tim 3 :15-17)

Mfa'a Evet mezik. Sam David.

19

- 1 Yôp d'akañete étôto'o Zambe;
A ñyeme yôp w'aliti ésaé mo mé.
- 2 Môs w'akalane môse mbok nkobô wé,
Alu e be alu avok, ñyemane mam w'akateban.
- 3 Nkañete nge mejô bi ne momo;
Tyiñe jab é ne te wô'é;
- 4 Nkole wop w'ayiane si ése,
A mejô map m'akui e susu'a si.
E be be a nga telé ntendé mfa'a ya jôp,
- 5 Nde d'akui atan aval ane mbom w'akôlô e étune nda jé,
Aval ane éwôlô mô t j'ake mbil e dulu dé a mevak.
- 6 Ntôéane wé w'ataté e susu'a yôp,
A dulu dé d'akui e susu'a ya été;
A teke'e jôm é ne sobô ayôñe dé.
- 7 Metiñe me YEHOVA me ne nya mvo'é,
M'abeta ve nlem ényiñ;
Nkañete YEHOVA ô ne bebela, w'abo mfefe'e mô t, nje'eban;

- 8 Memvinda me YEHOVA me ne zôsôô, m'ave nlem mevak.
Mvinda YEHOVA é ne éngengeñ, j'ave mis ngul ya yen.
- 9 Nkoane YEHOVA woñ ô ne mfuban, ô too nnôm éto.
Minjôane mi YEHOVA mi ne bebela, mise me ne zôsôô.
- 10 Mi abulu nye'eban adañe gôlt ; ja'ana adañe nya gôlt ;
Etua ézeze'e fe adañe wé, a nkone ya ésia wé, e zam.
- 11 Nne mboésaé wôé a leban été ;
Mba'alan a ba'ale mie ô ne beta be ma'an.
- 12 Za a ne ngule ya yem minkobane mié ?
O fubu'u ma mfa'a ya mam abé me ne nsolan !
- 13 O kame'e fe mboésaé wôé mfa'a ya mam abé ya mebun ;
Te kañese na me jôô ma :
Wôna m'aye bo nya mvo'é, a teke'e bijô ya beta ntyamane metiñ.
- 14 Kañese'e na, mejô ya anyu dam, a mimbindane ya nleme wom,
Bi bo ane w'anye'e mise môé,
A YEHOVA, nkôm ako'o wom a nkôté wom.

Meye'elan mfa'a ndañane minziziñ

(2 Sam 10 ; Besam 21 ; 60)

Mfa'a Evet mezik. Sam David.

20 1 YEHOVA a yala'ane wo, e môse njuk!

- Jôé Zambe Yakob e ba'ale wo!
- 2 A lôme' wo mvolane wé ô so'o e tempele wé,
A va'a wo mvolan ô so'o e Siôn !
- 3 A simesa'ane mimveane miôé mise,
A fombô'ô metuna'a môé b'adi'i a mvam ! Selah !
- 4 A va'a wo jam nleme wôé w'akômbô,
A tôé mefe'e môé mese !
- 5 Bi tame vak amu ndañane wôé,
Amu jôé YEHOVA, bi tame bete minlinga miangane yôp!
YEHOVA a jalé'é za'a jôé ése !
- 6 Eyoñe ji, m'ayeme na YEHOVA a volô ñwo'ane wé;
A ye yalane nye a too mfumfube yôbe wé,
A biwôlô mindañane ya mbonnôme wé.
- 7 Bevo'o b'abo énguñ amu bikalik, bevo'o amu bikabela ;
Ve bia bi abo enguñ amu jôé YOHOVA Zambe wongan.
- 8 B'aye kobelo a ku;

Ve bia, bi aye kôlô si a tebe tetele.
9 Va'a njô bôt ndañan, A YEHOVA;
Yala'ane bia éyoñ bi aloen.

Ekaña'a amu nkôtan

(2 Sam 7:8,12: 27-31; Besam 20; 22; 23)

Mfa'a Evet mezik. Sam David

21 1 A YEHOVA, njô bôt a va'ak amu ngule jôé;
amu mvolane wôé, ngo'o a ye dañe fôn!
2 O nga ve nye jôm nleme wé w'akômbô,
nde fe ô nji nyume nye za'a ya biyaé bié;
3 Amu w'atôbane nye a bibotane ya mvame jôé;
ô ngajalé nlô wé ékate mfubane gôlt.
4 A nga sili wo ényiñ; ô nga ve nye je,
ayap melu, nnôm éto a nnôm éto.
5 Duma dé e ne anen amu mvolane wôé;
w'ave nye étôtok a anen.
6 Yaa, ô nga dañe botane nye aso nnôm éto;
w'adañe jalé nye mevak asu dôé.
7 Amu njô bôt a too YEHOVA mebun ;
amu mvam Medañe Bôtô ya Yôp, a ye bo te fô'ôsan.
8 Wo wôé w'aye koane besiñe bé bese ;
mbonnôme wôé w'aye koane ba b'avini wo.
9 W'aye futi be e mbe'e nduan éyoñ w'aye yené, YEHOVA a ye mine be e ayaa dé été ; a nduan j'aye tume
be.
10 W'aye jiane mvoñe jap e si nyô, a bone bap e zañe bone be bôt.
11 Nge b'abuwo mbia ésok, nge b'abôndémbia fek, b'aye bo te da~.
12 Amu w'aye be tulu mimbi ; w'aye sôñe be bilaé biôé e mbom mesu jap.
13 Bo'o mbetane yôp, A YEHOVA, a ngule jôé ; nalé bi aye yia bia a kañe ngule jôé.

Nyône mintaé a jia ékaña'a

(Besam 69 ; Yes 53 ; Mat 27 ; Luk 23 ; Yôh 19)

Mfa'a Evet mezik. Ebôbôma éne minlak ane ngal nkok. E melende me tyé : Sam David

1 A Zambe wom, a Zambe wom, ô li'iyá ma a jé?

Amu jé ô nto aka'ôyabe ya volô ma,

Ôyab a mejô ya ntate wom?

2 A Zambe wom, m'ayôn a môs, ve wo teke'e yalan;

A alu se, ve teke'e yen awo'an.

3 Akôsabo nalé, ô ne étyi,

O too ézezañe bikaña'a ya Israël.

4 Betate bangan be nga too wo mebun,

Be nga too mebun, nde ô nga nyii be.

5 Be nga yôn e be wo, nde be nga nyiiban;

Be nga too wo mbeun, nde be nga bo te same.

6 Ve me ne étum, sa môt ;

Ekpwe'ele e be bôt, a jôm bôt b'abiasé.

7 Ba bese b'ayene ma b'akpwe'ele ma ;

B'akui me menyu nyô, b'amese minlô miap.

8 A nga ve YEHOVA ajô dé, a tame nyii nye,

A nyi'i nye, amu a yene nye mvaé !

9 Ve wo ô nga vaa ma e abum été !

Wo ô nga tooé me mvo'é e tôé nyia wom.

10 Be nga kee me wo me so'o e abum ;

Ataté éyoñ nyia wom a nga biaé ma, ô ne Zambe wom.

11 Te tabe me ôyap; amu nju'u ô ne bebé;

Amu môte ya volô a ne momo.

12 Abui beyôm binyaka bi bômaneya ma ;

Biwôlô beyôm binyaka ya Basan bi bômaneya ma,

13 B'akui ma menyu map e nyô ne vôññ,

Aval ane ñbweñbwem j'ayaa a bam.

14 Me kubuya aval ane mindim ;

A bivese biam bise bi nto nkandan ;

Nleme wom ô nto aval ane éko;

O maneya me nyeme e abum été.

15 Ngule jam é maneya kôt aval ane ébañe viek,

Nde fe ôyeme viam vi alat a ndaa anyu wom;

Ô bôôéya ma e mbulu'u ya awu été.

16 Yaa, bemvu be bômeneya ma;

Nsamba beboabé ô nto ma mbôma'ane;

Be tubeya me mo a mebo.

- 17 Me nto ngule ya lañe bivese biam bise,
b'afombô, be lôbô'ô ma;
- 18 Bebien b'akabane mengômesane mam,
A éwomane jam b'ado je abia.
- 19 Ve wo te tebe ôyap, A Zambe :
A wo mvolô wom, bo' avôle ya volô ma !
- 20 Nyi'i nsisime wom mfa'a ya fansoñ,
Ényiñe jam mfa'a ya ngule ya awu !
- 21 Nyi'i ma mfa'a ya anyu ñbeweñbwem,
A nsisime wom mfa'a ya minla'a mi nyat !
- 22 M'aye kañete bobējañ jôé dôé;
E êkôane bôt été, m'aye kañe wo.
- 23 Mia mi ako YEHOVA woñ, kañane nye;
Mia bone be Yakob bese, wuma'ane nye,
Koane nye woñ, mia mvoñ Israél ése!
- 24 Amu a nga bo te biasé nge vini nju'u ya éngôngole mô ;
Nalé fe a nga bo te solé nye asu ;
Ve a nga wôk, éyoñ a nga yôn e be nye.
- 25 Ekaña'a jam j'aso e be wo e beta êkôan été.
M'aye ve biôm me nga tiñeti
Vôm ba b'ako nye woñ be too.
- 26 Minzôzoé mi aye di a jaé;
Ba b'ajeñe nye b'aye kañe JEHOVA !
Nleme wôé ô tabe' ényiñ nnôm éto !
- 27 Meku'u me si mese m'aye simesan
A kôñelane e be YEHOVA;
Menda me bôte mese ya meyoñe me bôt m'aye kañ asu dôé.
- 28 Amu éjôé é ne jôme YEHOVA,
A nnye a ne njôô ya meyoñe me bôt.
- 29 Yaa, ba bese be ne mebun e si nyô b'aye di a kañ.
Ba bese be bôô e mbulu'u été, b'aye kumbu si asu dé ;
Ja'ane nyô a se ngule ya ba'ale ényiñe jé.
- 30 Mvoñe bôt j'aye bo nye ésaé ;
Bôt b'aye kañete jôé YEHOVA miaé bôt w'aye zu,
- 31 A kañete nyiane wé e be bôt
Be ngenane te bialé, na, nnye a nga bo de.

YEHOVA a ne mba'ale ñyia Sam

(Yes 40 :11 ; Ezék 34 :11-31 ; Yôh 10 :10-30 ; Nkul 7 :16, 17)

Sam David.

23

- 1 YEHOVA a ne mba'ale wom,
M'aye bo yi jôm;
2 A bôôé me e ñyumen ôbute yôp.
A wulu ma e fefele bivôvoé mendim.
3 A wônô nsisime wom ;
A kee ma e mezen me ne zôsôô amu jôé dé.
4 To'o m'atulan e mbi'ili ô ne dibi ya awu, me nji ko abé éziñe woñ ;
Amu ô ne be ma.
Olé viôé a ntume wôé bi avolô me nlem.
5 W'akôme ma tawôlô ôsu viam e mise besiñe bam,
W'awo'o nlô wom mbon ;
Elaé jam j'afuluku e si.
6 Mvo'é a mvam bi aye fo'o tôñe ma nté melu mese ya éyiñe jam ;
A m'aye tabe nda YEHOVA nnôm éto.

Njô bôte ya ékaña'a nyiin e Siôn

(2 Sam 6 ; Besam 15 ; 25 :14 ; 68 :17-19 ; Ef 4 :8-10)

Sam David

24

- 1 Si é ne jôm YEHOVA, a njalan ôse ya été,
Si ébien a ba be too été ;
2 Amu a nga bôndé je e mañe yôp
A télé je e asôé yop.
3 Za a ye bet e nkôle YEHOVA ?
A za a ye tebe e mfufube vôme wé ?
4 Nyô a bili mo me ne teke bijô a mfubane nlem;
Nyô a bo te kee nleme wé e be jam e ne minsos, nge kalane minkale medu'an.
5 A ye nyoñ ébotan e be YEHOVA,
A ékaña'a e be Zambe ya nyiane wé.
6 Wuna ô ne miaé bôt w'ajeñe nye,
Ba b'ajeñ asu Zambe Yakob. Sélah !

- 7 Beta'ane minlô mienan e yôp, a mia mimbé!
 Bo'ane mbetan e yôp, a mia mimbé ya nnôm éto!
 Nalé Njô bôte ya étôtok a ye nyiin.
- 8 Za a ne Njô bôte ya étôto'o ate ?
 YEHOVA, ngul a éwôlô;
 YEHOVA, éwôlô mfa'a ya mewosan.
- 9 Beta'ane minlô mienan e yôp, A mia mimbé !
 Bo'ane mbetan e yôp, A mia mimbé ya nnôm éto :
 Nalé Njô bôte ya étôtok a ye nyiin.
- 10 Za a ne Njô bôte ya étôto'ate ?
 YEHOVA ya minsamba mewosan,
 Nnye a ne Njô bôte ya étôtok. Sélah !

Meye'elane ya ja'é mba'alan, nlitane zene a njaman

(Besam 31 ; 86 ; 130 ; 143)

Sam David.

25

- 1 A YEHOVA, m'abete nsisime wome yôb e be wo.
- 2 A Zambe wom, wo me too nye mebun.
 Te kañese na me veban ôson e nyô :
 Te kañese na, besiñe bam be fôn amu ma.
- 3 Yaa, te ke môt a yange wo a ye veban ôson e nyô :
 Ba b'akoñe bôt te étom mmbe b'aye veban ôson e nyô.
- 4 A YEHOVA, liti'i me mezene môé;
 Ye'ele'e me mezene môé.
- 5 Liti'i ma e benya mejôô môé été, a ye'ele ma ;
 Amu wo ô ne Zambe ya nyiane wom ;
 Amu wo m'ayange ngume nté môs.
- 6 A YEHOVA, tame simesan nkoan éngôngole wôé a mvame jôé,
 Amu bi nga too aso nnôm éto.
- 7 Te simesan mbia be mame mam ya éyoñ me mbe mongô,
 Nge mintyamane metiñe miam;
 Simesa'ane ma aval ane nye'ane wôé ô né,
 A amu mvaé jôé, A YEHOVA !
- 8 YEHOVA a ne mvo'é a zôsôô :
 Ajô ete a lebe beboabé e zen.

- 9 A wulu bôt be ne minlem évôvoé zôsôô,
A ye'ele beboabé zene jé.
- 10 Mezene me YEHOVA mese me ne mvam a ma ya buni,
Mfa'a ya ba b'aba'ale élate jé a minjôane mié.
- 11 A YEHOVA, amu jôé dôé,
Jamé'é me abé dam, amu e ne anen.
- 12 Môt mbé a ko YEHOVA woñ ?
Nye ate a ye lebe zen a ye top.
- 13 Emien a ye tabe e ntam été,
Nde fe bone bé b'aye bi si.
- 14 Nbwa YEHOVA é ne e be ba b'ako nye woñ;
A ye liti be élate jé.
- 15 Mise mam m'afombô YEHOVA kom ése,
Amu a ye vaa mebo mam e avot été.
- 16 Tame kôñelan e be ma, a ko me éngôngo;
Amu me li'iya étam a éngôngo.
- 17 Volô'ô ma mfa'a ya minju'u ya nleme wom,
Va'a ma e alune dam été.
- 18 Tame fombô éngôngole jam a nju'u wom,
A jamé mbia be mame bam bese.
- 19 Tame fombô aka' abui bisiñe bam be né,
A aka'a ziñe njet b'asiñe ma.
- 20 Hôé, ba'ale'e nsisime wom, a nyii ma !
Te kañese na me nyoñ ôson, amu me solô e be wo.
- 21 Kañse'e na mvo'é a zôsôô bi ba'ale ma,
Amu m'ayange wo.
- 22 A Zambe, kôté'é Israël,
E minju'u mié mise été.

Mmemane mvo'é a meye'elane ya ja'é nkalan

(Besam 7 ; 17 ; 35)

Sam David.

26 1 Kunu ma, A YEHOVA,

Amu me nga wulu e zôsôô wom été,
Me nga tabe fe YEHOVA mebun te ke ndeñ.

- 2 Fombô'ô ma, A YEHOVA, a ve'ele ma ;

- Ve'ele'e nlem wom, a ôsimesane viam.
- 3 Amu mvame jôé é ne ôsu ya mise mam,
A m'awulu e benya mejôô bôé été.
- 4 Me nji tabe si bia be bôt be ne minsos ;
Nge wumu mbia be bôt be ne medu'an.
- 5 M'avini êkôane beboabé,
A m'aye bo te tabe si bia be bôt be ne êkotekot.
- 6 M'aye sôbe mo mam e ntabane ya te bijô été ;
Nalé m'aye tyiñelan altar wôé, A YEHOVA ;
- 7 Me yôta'ane jia ya mvean akéva,
A kañete ajô ya bitua bi mam biôé bise.
- 8 A YEHOVA, m'anye'e ntabane ya nda jôé,
A vôm étôto'o jôé é too.
- 9 Te vose ma fufulu a beboabé,
Nge ényiñe jam fufulu a bôte metyi.
- 10 Mo me bôt b'abo mbia be mam,
Mmbe mbonnôme wop ô ne njalan a minkus.
- 11 Ve mfa'a wom, m'aye wulu e mvo'é jam été;
kôté'é ma, a ko me éngôngo.
- 12 Abo dam e tele e nje'ese si;
E beta êkôan été, m'aye kañe YEHOVA.

Sam ya mbunane Zambe ô ne te ko woñ

(Besam 3 ; 4 ; Rom 8 :31)

Sam David.

27 1 YEHOVA a ne éfufube jam a nyiane wom ;

Za m'aye ko wo ? (woñ T.O.M)

YEHOVA a ne ngule ya ényiñe jam,

M'aye fune za ?

- 2 Eyoñ bikokote bi bôt bi azu wosane ma, a di minsône miam,
Besiñe bam a minziziñe miam,
B'aye kolé ôbak a ku si.
- 3 Akôsabo nsamba bita w'awosane ma,

- Nleme wom w'aye bo te ko woñ ;
 Akôsabo bita bi aye kui ma,
 Ja'an éyoñ été, m'aye bo ve buni.
- 4 Jame da me ja'éya YEHOVA, nde m'ajeñ :
 Ane m'aye tabe e nda YEHOVA melu mese ya éyiñe jam,
 A yen abeñe YEHOVA,
 A sili mam e tempele wé été.
- 5 Amu a ye solé ma e asoé dé été e môse njuk ;
 A ye solé ma e andile ya nda ntendé wé si,
 A ye télé ma akôm ako'o yôp.
- 6 A éyoñe ji nlô wom w'aye beteban e yôbe ya besiñe bam b'abômane ma ;
 A m'aye tyi'i metuna'a e nda ntendé jé été a bia mevak :
 M'aye yia a lome bia e be YEHOVA.
- 7 Vô'ôlô'ô, A YEHOVA, éyoñ m'ayône tyiñe yop,
 Ko me éngôngol a yalane ma !
- 8 O nga jô na, Jeñan asu dam.
 Nleme wom ô nga jô wo na,
 Asu dôé, A Nti, nde m'ajeñ.
- 9 Te solé me asu dôé.
 Te sas mboésaé wôé mfa'a mfe éyoñ w'aya'a,
 Wo ô nga too mvolane wom. Te wua me fé, te li'i ma ; A Zambe ya nyiane wom !
- 10 Amu tate ba nane be nga li'i ma,
 Ve YEHOVA a ye nyoñe ma.
- 11 Ye 'ele'e ma zene jôé, A YEHOVA ;
 A liti'i ma zen é ne nje'ese amu besiñe bam.
- 12 Te kalane ma e nkômbane ya besiñe bam
 Ane b'aye vebe mvebe njet.
- 13 M'abuni na m'aye yen abeñe YEHOVA
 Mfa'a ya si bevevee !
- 14 Yange'e YEHOVA ;
 Bo'o éwôlô, a kañese na nleme wôé ô bo ngu ;
 Yaa, yange'e YEHOVA !

Meye'elane ya ja'é mvolan a mvean akéva amu éyalane ya été

(Besam 5 ; 35 ; 59 ; 64)

Sam David.

28 1 Wo m'aloene, A YEHOVA ;

- Akôm ako'o dam te bo ndok mfa'a wom,
A za bo na, nge w'aku me évô,
Me nto ane ba b'akake Ebé si.
- 2 Wô'ô tyiñe ya minja'ane miam,
Éyoñ m'ayôn e be wo mfa'a ya mvolan,
Éyoñ m'asame mo mam mfa'a ya beta mfufube vôm wôé.
- 3 Te w'adutu me fufulu a bikotekot bi bôt,
Nsamba ba b'abo mbia be mam ;
Ba b'akobô beébe bôtô mvo'é,
Éyoñ abé e ne e minleme miab été.
- 4 Yaka'ane be aval ane ésaé jab é né,
Aval ane abé ya mimboane miab e né ;
Yaka'ane be meya'an m'ayiane be.
- 5 Amu be ne te simesane bisaé bi YEHOVA,
Nge ésaé ya mo mé ;
A ye tyame be, teke'e be beta lôñ ne tya.
- 6 Ebotan é bo'o YEHOVA !
Amu a wô'ôya tyiñe ya minja'ane miam.
- 7 YEHOVA a ne ngule jam a ébene jam ;
Nleme wom ô too nye mebun ;
Nde me yeneya mvolan, a nleme wom w'adañe vak,
M'aye kañe nye a jia jam.
- 8 YEHOVA a ne ngule ya bôte bé,
A ne asoé ényîñ e be ñwo'ane wé.
- 9 Hôé, nyi'i bôte boé, a botane ngabe jôé ;
Bo'o mba'ale wop, a be'e be e yôp nnôm éto.

Tyiñe YEHOVA éyoñ ya ôkôs

(Yiôb 37 :1-5, 23, 24)

Sam David

29 1 A bone be Zambe, va'ane YEHOVA,

- Va'ane YEHOVA дума a ngu.
- 2 Va'ane YEHOVA дума ya jôé dé,
Kañane YEHOVA mi be'e mfufube mengômesan.

- 3 Tyiñe YEHOVA é ne e mendime yôp ;
Zambe a ne дума a bo zo'oyañ é bam,
YEHOVA, abui mendime yôp.
- 4 Tyiñe YEHOVA é ne ngu ;
Tyiñe YEHOVA é ne étôto'o ne lut.
- 5 Tyiñe YEHOVA j'abu' u bekédar,
YEHOVA a bu' u bekédar ya Liban.
- 6 A bo Liban na a tyele si aval ane mon ényaka,
A Sirion aval ane étoñe nnôme nyat.
- 7 Tyiñe JEHOVA j'asale minkaba'a mi nduan,
8 Tyiñe YEHOVA j'afô'ô fé,
YEHOVA a fô'ô fé ya Kades.
- 9 Tyiñe YEHOVA j'avite bilône minkuk,
J'akutu mefan ne sangañ ;
E tempele wé été, jôm ése j'ajô na, Duma.
- 10 YEHOVA a nga too ane njôô éyoñe ya ndône mendim ;
YEHOVA a too ane njôô ya nnôm éto.
- 11 YEHOVA a va'a bôté bé ngu !
YEHOVA a bota'ane bôté bé a mvo'é !

Mvean akéva amu nyiane ya awu

(2 Sam5 :11, 12 ; Yes 38 :16-20 ; Besam 66 ; 107 :17-22)

Sam David. Jia éyoñe ya be nga fubu tempel.

- 30** 1 M'aye kañe wo, A YEHOVA;
Amu ô betéya ma e yôp,
O boya te kañese na besiñe bam be va' amu ma.
- 2 A YEHOVA Zambe wom,
Me nga yôn e be wo mfa'a ya mvolan,
Ane ô nga saé ma.
- 3 A YEHOVA, ô nga vaa nsisime wom e Shéôl;
O nga nyii ényñe jam zañe ba be nga ke Ebé si.
- 4 Yi'ane YEHOVA jia ya ékaña'a,
A mia mimfufube mié,
A veane mfufube jôé wé akéva.
- 5 Amu ayaa dé e ne ve mone nté;

- Mvame jé é ne nté ényiñ :
- Du e ne ngule ya tabe a alu,
Ve meva'a m'azu mametyé.
- 6 Ve mfa'a wom, me nga jô e ntame wom été na,
M'aye bo te fô'ôsan nnôm éto.
- 7 Amu mvame jôé, A YEHOVA,
O nga télé ma ane ngungule nkô ;
O nga solé asu dôé, ane me nga jañe fek.
- 8 Me nga yôn e be wo, A YEHOVA ;
A me nga ja'é mam e be YEHOVA ?
- 9 Za mvaé é ne été e awu dam,
Nge m'ake e Ebé si?
Ye mbulu'u w'aye kañe wo ?
Ye w'aye kañete foé jôé ya buni?
- 10 Wô'ôk, A YEHOVA, a kô me éngôngo!
A YEHOVA, bo'o mvolô wom !
- 11 O nga kôñelane du dam e bo abôk;
O nga soté me nkuta wom a jalé me mevak;
- 12 Nde duma dam d'aye kañe wo, a bo te ku évô.
A YEHOVA Zambe wom, m'aye ve wo akéva nnôm éto.

Sam ya ñyôn a nkañan

(1 Sam 23:14-28; Besam 25; 56; 71)

Mfa'a Evet mezik. Sam David.

- 31** 1 A YEHOVA, me solô e be wo;
- Te kañese na, me veban ôson e nyô ne tya;
Nyi'i ma amu zôsôô wôé !
- 2 Ke'alo dôé e be ma, nyi'i ma avô !
Bo'o akôm ako'o ya asoé mfa'a wom,
Ewôlô ôleme ya nyii ma.
- 3 Amu ô ne akôm ako'odam a ôleme viam ;
Amu jôé dôé, wulu'u ma a liti me zen.
- 4 Va'a ma e avot be nga ya ma e asoé ;
Amu ô ne ôleme viam.
- 5 M'akee nsisime wom e mo môé :
O kôtéya ma, A YEHOVA, wo Zambe ya buni.

- 6 W'avini ba b'asemé biyeñeyeña bi biôm ;
ve me too YEHOVA mebun.
- 7 M'aye vak a yene mvaé amu mvame jôé,
Amu ô nga yen ékpwe'ele jam ;
O nga tu'a yem minju'u ya nleme wom.
- 8 O nga bo te kalane ma e mo me nsiñe wom ;
O teléya mebo mam e vôm a ne ndam.
- 9 Ko me éngôngo, A YEHOVA, amu me bili abé :
Dise dam d'asibi a ôlun,
Yaa, nleme wom a nyôle jam.
- 10 Amu ényiñe jam j'aman a ôlun,
A mimbu miam a ntat !
Ngule jam j'aman amu éngôngole jam,
A bivese biam bi asibi.
- 11 Me nto jôm ékpwe'ele e be besíñe bam bese,
Adañedañ e be bôt bia be be bi ne bebé,
Jôm angôndô e be meyembane mam :
Ba b'ayene ma atan b'amate ma.
- 12 Me vaseya e be ôsimesane viap ane nyô a wuya ;
Me nto aval ane ébôte viek.
- 13 Me wô'ôya minso'o ya bôt abui,
Angôndô mimfa'a mise !-
Eyoñ be nga bo émo'o ya bo me jam,
Be nga bôndé fe'e ya vaa éyiñe jam.
- 14 Ve me nga tabe wo mebun, A YEHOVA,
Me nga jô na, O ne Zambe wom.
- 15 Biyoñe biam bi ne e mo môé été :
Nyi'i ma e mo besíñe bam a bekpwe'ele bam !
- 16 Bo'asu dôé na e faé mboésaé wôé :
Nyi'i ma amu mvame jôé.
- 17 Te kañese na me veban ôson e nyô,
A YEHOVA, amu m'aloene wo;
Kañese'e na bikotekote bi bôt bi veban ôson e nyô,
Be tabe'e ne mieññ e Shéôl été.
- 18 Biyaé minsos bi kpwa'a mvuk,
Mbie bi akobô bezôsôô be bôt ésas, a mebun a ébiasé.
- 19 Ngo'o mvo'é jôé é ne anen,
Nje éte ô nga naan mfa'a ba b'ako wo woñ,

- A nje été ô nga bo mfa'a ba be solô e be wo, e mise me bone be bôt !
- 20 W'asolé be ébuta'a ya asu dôé mfa'a ya mefe'e me bôt;
W'aye ba'ale be asoé mfa'a ya ntañete ya ayem.
- 21 Ebotan é bo'o YEHOVA;
Amu a maneya liti ma étua mvame jé,
Éyoñ be nga yabe ma e nlam ô ne ngu.
- 22 Me nga jô a kemele na,
Me vaseya e mise môé a ke ôyap,
Ve ô nga wô'ô minja'ane miam,
Eyoñ me nga yôn e be wo mfa'a ya mvolan.
- 23 Nyeka'ane YEHOVA, a mia mimfufube mié mise :
YEHOVA a ba'ale bebuni bé,
Ve a dañe ndeñele nyô a bo mam mboane mebun.
- 24 Bo'ane ngu, mi kañese na nleme wônan ô bo ngu,
A mia bese mi too YEHOVA mebun.

Ebotane ya njaman a ntabane Zambe mebun

(2 Sam 12:13; Besam 6; 51; 130; Yes 55:6-9; Rôm 4:6-8)

Sam David. Jia Maskil.

- 32** 1 Mvom a nyô ntyamane metiñe wé ô nto njaman,
Nyô abé dé e nto mbutan.
- 2 Mvom a mô't YEHOVA a bo te lañ ékotekote jé,
Nnye ate medu'an me nji bo e nlem wé été.
- 3 Eyoñ me nga bo te mem abé dam, bivese biam bi nga sibi;
Amu ntate wome ya ngume nté mô's.
- 4 Amu mô'se ba alu wo wôé ô mbe me adit;
Ngule jam é nga mane kôt ane ayôñe ya ésep. Sélah !
- 5 Me nga meme wo abé dam,
A me nji solé ékotekote jam;
Me nga jô na, M'aye meme ntyamane metiñe wom e be YEHOVA;
Nde a nga jamé mekua ya abé dam. Sélah !
- 6 Ajô ete mô't ase a ne mô'ta Zambe,
A bo'o meye'elan e be wo éyoñe ya njuk;
Eyoñe ndôn ya abui mendim j'aye bo te kui e be nye.
- 7 O ne me vôme ya sobô;
W'aye ba'ale me mfa'a ya njuk;

- W'aye bômane ma a bia ya nyian. Sélah !
- 8 M'aye ye'ele wo a liti wo zen w'aye ke :
M'aye ve wo fek a mise mam me lôô wo.
- 9 Te boan aval ane ékabela nge éjakas,
Mbie bi nji bi fek,
Mbie b'aliti zen a kandé a mesuñ,
Nge nalé momo, bi aye bo te zu bebé e be wo.
- 10 Abui mintae e ne ngap bikotekote bi bôt ;
Ve mvam j'abômane nyô a too YEHOVA mebun.
- 11 Va'an e be YEHOVA, a fôn, A bezôsôô be bôt,
Yôta'an a mevak, mia bese mi ne mvo'é minlem!

Ekaña'a e be Nté a Mba'ale

(Besam 104; 135; 147)

33

- 1 Va'an e be YEHOVA, A mia bezôsôô be bôt.
Ekaña'a j'ayian a bezôsôô be bôt!
- 2 Kaña'an YEHOVA a mvet,
Loman a mvet é ne mintem awôm.
- 3 Yi'ane nye mfefé jia;
Bômane biôm atyeñ a tyiñe yôp.
- 4 Amu ajô YEHOVA e ne zôsôô ;
A ésaé jé ése j'aboban nya mboane.
- 5 A nye'e zôsôô a nya ntyi'ane mejôô;
Si é ne njalan a mvame YEHOVA.
- 6 Amu njôane YEHOVA nde yôb e nga téban;
A minkunda mise ya été amu mvebe ya anyu dé.
- 7 A nga kôane mendim me mañ ane e ñyombo été;
A nga futi meto'o me mañ ane menda ya naan akum.
- 8 Si ése é ko YEHOVA woñ,
Betabe nlam bese ya si be tebe'e ntebane woñ asu dé.
- 9 Amu a nga kobô, ane e nga boban;
A nga bendé, ane e nga tebe.
- 10 YEHOVA a bo mefe'e meyoñe me bôt, momo;
A samele mefe'e me bôt.
- 11 Mbôndane fe'e YEHOVA ô tele ngul nnôm éto;
Nde fe minsimesane ya nleme wé mi atulane miaé mise.

- 12 Mvom a ayoñe bôt, di Zambe a ne YEHOVA;
Ayoñ a nga top e bo ngabe jé émien!
- 13 YEHOVA a fombô si a too e yôp ;
A lôô bone be bôte bese ;
- 14 Akôlô vôm a too été njôô, a lôbô ôsu
E be betabe si bese ya si nyô.
- 15 Nnye ate a mé be bese minlem,
A fase mimboane miap mise.
- 16 Te ke njô bôt a nga nyiñ amu beta nsamba bita;
nlumane bita a nji ke nyiiban amu beta ngule wé.
- 17 Ekabela bita é ne momo jôm mfa'a ya ndañan;
Nalé fe é nji nyii mô̄t amu bete ngule wé.
- 18 Tame yen, dise YEHOVA e ne e be ba b'ako nye woñ,
Ba b'atabe mvame jé ndinlem;
- 19 Na a ne ngule ya nyii nsisime wop mfa'a ya awu,
A ba'ale be be nyiñ éyoñ ya mfumbala zaé.
- 20 Nleme wongan w'ayange YEHOVA :
A ne mvolane wongan a ébene jangan.
- 21 Yaa, nleme wongan w'ava' e be nye
Amu bi atabe mfufube jôé wé mebun.
- 22 Mvame jôé, A YEHOVA, é tabe'e be bia,
Aval ane bi nga tabe wo ndinlem.

YEHOVA Mba'ale a Nyii Bôtô

(1 Sam 21:10-15; Besam 33:18-22; 84:12, 13; 91; Min 14:26, 27; 1 Pét 3:9-12)
Sam David, éyoñ a nga veñ akut asu Abimelek, nde a nga titane nye a kôlô.

34 1 M'aye kañe YEHOVA biyoñe bise;

- Ekaña'a jé j'aye bo anyu dam kom ése.
- 2 Nleme wom w'abo mebun e be YEHOVA;
Engôngole mô̄t é wô'ôk, a yene mvaé.
- 3 Bia be mia ñwuma'ane YEHOVA,
Nde fe bi fulane bese a kañe jôé dé.
- 4 Me nga jeñe YEHOVA, ane a nga yalane ma,
A nyii ma mfa'a ya mam mese me nga ko woñ.
- 5 Be nga fombô nye, ane be nga yen éngengen;

- Nalé mesu map m'aye bo te wô'ôson ne tya.
- 6 Engôngole môte ji é nga yôn, ane YEHOVA a nga wô'ô nye,
Ane a nga nyii nye mfa'a ya minju'u mié mise.
- 7 Engela YEHOVA a bômane ba b'ako nye woñ a nyii be.
- 8 Tameka tye'an a yen ane YEHOVA a ne mvaé :
Mvom a môt a bili asôé e be nye.
- 9 Koane YEHOVA woñ, A mia mimfufube mié;
Amu ba b'ako nye woñ be ne te yi jôm !
- 10 Bitoñe beñbweñbwem bi awu ôsame a zaé;
Ve ba b'ajeñe YEHOVA b'aye bo te yi jôm é ne mvaé !
- 11 A bon, za'a vô'ôlane ma,
M'aye ye'ele mia nkoane YEHOVA woñ.
- 12 Môt mbé a ne nyô a kômbô ényiñ,
a nye'e melu abui, ane a ye yene mvaé ?
- 13 Ba'ale' ôyeme viðé mfa'a ya abé,
A biyaé biôé mfa'a ya kobô medu'an.
- 14 Kôlô' abé, a bo mvaé;
jeñe mvo'é, a tône je.
- 15 Mise me YEHOVA m'afombô bôt be ne zôsôô,
A melo mé me yoo mfa'a ya ñyône wop.
- 16 Asu YEHOVA d'awosane beboabé,
A tyi'i ôsimesane viap e si nyô.
- 17 Eyoñ bezôsôô be bôt b'ayôn mfa'a ya mvolan, YEHOVA a wôk;
A nyii be mfa'a ya minju'u miap mise.
- 18 YEHOVA a ne bebé a ba be ne minlem nju'an,
A nyii ba be ne minlem ntya'an.
- 19 Bikpwe'ele bi môt a ne zôsôô bi ne abui;
Ve YEHOVA a nyii nye mfa'a ya mam mete mese.
- 20 A ba'ale bivese bié bise;
Te ke jia ya été é ne bu'i.
- 21 Abé d'aye wôé ékotekote môt,
Ve ba b'asiñe bezôsôô be bôt b'aye veban mekua.
- 22 YEHOVA a kôté ényiñe bebobisaé bé ;
Te ke wua ya ba be sôlô e be nye a ye nyoñe mekua.

Meye'elane ya ja'é nyian mfa'a besiñ

35

- 1 Senga'an, A YEHOVA, a ba b'asengan ma;
Wosa'an, a ba b'awosane ma !
- 2 Toké'é ében a éyoko'o,
O kôlô si ajô nvolane wom.
- 3 Kandé'é akoñ a ôfak, ô lume ba b'atitane ma !
Jô'ô nleme wom na, Me ne Nkôté wôé !
- 4 Kañese'e na be nyoñ ôson a jañe fek,
Ba b'ajeñ ényiñe jam.
Be bula'ane mvumvua a wu ôson,
Ba b'abôndé me mbia fek.
- 5 Be bo'ok ane bivua ôsu évuñulu,
Ane éngela YEHOVA a ye tyamelane be !
- 6 Zene jap é bo'o dibi a asen,
Ane éngela YEHOVA a ye tôñe be !
- 7 Amu te ke étom be nga ya me avote dap;
Te ke étom be nga fa'a me ébé mfa'a ya ényiñe jam.
- 8 Njañan ô za'ak e be be atemetem;
Avote bebien be nga solé bebien be timbi' été;
Bebien be kpwa' été mfa'a ya njañane wop.
- 9 Nsisime wom w'aye vak e be YEHOVA,
A fôn amu nkôtane wé.
- 10 Bivese biam bise bi aye jô na,
A YEHOVA, za ane aval ane wo ?
Wo w'anyii ntetek e be nyô a dañe nye ngu,
Ntetek a nzôzoé e be nyô a sa be ?
- 11 Bikotekote bengaa bi akôlô si;
B'asili me mam me ne te yem.
- 12 B'aya'ane me abé vôm me nga bo be mvaé,
Nleme wom ô li'ya étam.
- 13 Ve ma, éyoñ be nga kon — me me nga jaé nkuta
Me nga ve mamien ôlun a ntyiane bidi;
Me nga ye'elan nlô ô jomô e abume si.
- 14 Me nga bo mamien aval ane nge a mbe mvôé jam, nge mojañe wom :
Me nga kumbu si me wô' ôlun, aval ane nyô a yi nyia wé.
- 15 Ve étoñ me nga kolé, be nga vak a bo ékôan ;

- Be nga sulane fufulu a wosane ma ;
Mbia be bôt me nji yem, be nga nyabe ma te jô'é.
- 16 Be nga kpwe'ele ma mbia nkpwe'elan ;
Be nga latane mesôñe map a kômbô kô'é ma.
- 17 A YEHOVA, ntaa vé, w'aye fombô de ?
Nyi'i ma mfa'a ya minjiane miap,
Ényiñe jam mfa'a ya beñbweñbwem !
- 18 Nalé m'aye ve wo akéva e beta ékôan été ;
M'aye kañe wo e abui bôt été. ?
- 19 Te kañse na, ba b'asiñe ma ésiñesiñi be va' amu ma ;
Nalé fe te kañese na be nyetane dis,
Ba b'avini ma te ke étom.
- 20 Amu be nji kobô mvo'é ;
Ve wosane ba be ne mvoé e nlam,
B'abôndé mejô me ne među'an.
- 21 B'akui menyu mam ndam e nyôle jam ;
Be nga jô na, Eñhee ! eñhee ! dise dangan e yeneya de !
- 22 O yeneya de, A YEHOVA, te tabe évô ;
A YEHOVA, te tabe me ôyap.
- 23 Vele'e womien, a vee ôyo, ô tyi' ajô dam ntyi'ane w'ayiane ma,
A Zambe wom, A YEHOVA wom !
- 24 Tyi'i me ajô A YEHOVA Zambe wom,
Aval ane d'ayiane zôsôô wôé;
A bo te kañese na, be va' amu ma.
- 25 Te kañese be jô e minlem miab été na,
Eñhee, nalé bi nga kômbô;
Be bo'o te jô na, Bi mineya nye !
- 26 Kañese'e na, be veban ôson e nyô,
A bo fe'e ne vema bese, ba b'ava' amu m'ayen abé :
Kañese'e na, be jalebani ôson a ébiasé,
Ba b'abo me ngunguan e nyô.
- 27 Kañese'e na ba b'asô nkunan ajô wom,
Be fôn a yene mvaé
Be jô éyoñ ése na, YEHOVA a ne anen,
Nnye ate a yene mvaé amu mvo'é mboésaé wé !
- 28 Wôna oyeme viam vi aye kañete ajô ya zôsôô wôé,
A ajô ya ékaña'a jôé ngum nté môs.

Abé ya bôt a mvame Zambe

(Besam 10 ; 14 ; 37 ; 125)

Mfa'a Evet mezik. Sam David mboésaéé YEHOVA

- 36** 1 Ntyamane memvinda w'akobô ékotekote mỗt édok e nlem été;
Nkoane Zambe woñ ô nji bo e mise mé.
- 2 Amu a taman émien e mise mé émien,
Na, ékotekote jé é vo'o kulan nge viniban.
- 3 Mejô ya anyu dé me ne abé a medu'an :
A jô'éya bo mam a fek na, a bo mvaé.
- 4 A bôndé abé éyoñ a bôô énoñe jé :
A telé émien e zen é nji bo mvaé ;
A ne te wo' abé angôndô.
- 5 Mvame jôé, A YEHOVA, j'akui e yôb été ;
Fulu jôé ya buni j'akui e minkut.
- 6 Zôsôô wôé a ne aval ane beta minkôle mi Zambe ;
Mintyi'ane mejô miôé mi ne beta édok :
A YEHOVA, w'aba'ale bôt a betit.
- 7 Za aka' a étôto'o mvame jôé é né, A Zambe !
A bone be bôt b'asobô éjjjine ya mefabe môé si.
- 8 B'adi mefo'o ya nda jôé ;
W'anyuu be ôsôé mbamba be mam bôé.
- 9 Amu anjeñe ya ényiñ e ne e be wo :
Vôm éfufube jôé é né bi ayen éfufub.
- 10 Tame kee mvame jôé ôsu e be ba b'ayeme wo,
A nyiane wôé e be ba be ne minlem zôsôô !
- 11 Abo mebun e bo'o te zu ma e nyô,
Nge wo ékotekote mỗt e titane ma.
- 12 Vôm ate beboabé be kuya si,
Be wuabaneya si, te ngule ya kôlô.

Ntabane mvo'é ya bebuni YEHOVA a biyebé bi mbia be bôt

(Besam49 ;73; Min 24 :19-20 ; EKK 8 :11-13)

Sam David.

37

- 1 Te yaa bikotekote bi bôt, te nyamete mbia be bôt !
- 2 Amu bi aye ji'a viele ane bilok,
A kôt ane nymi ôbut.
- 3 Tabe'e YEHOVA mebun, a bo mvaé;
Nalé w'aye tabe si éte, a tabe mvo'é.
- 4 Yene fe mvaé jôé e be YEHOVA,
Nnye a ye ve wo mam nleme wôé w'akômbô.
- 5 Ke'e YEHOVA zene jôé,
Tabe'e nye mebun, a nnye a ye bo de.
- 6 Nnye a ye kuli zôsô wôé atan aval ane éfufub
A mvo'é jôé aval ane zañe môs.
- 7 Tabe'e ne mieññ e be YEHOVA, a yange nye mban;
Te wô' ôlun amu nyô a bu'uban a zene jé,
Môt a ke a mbia mefe'e mé ôsu.
- 8 Jôké'e ayok, a li'i ayaa :
Te yaa, d'asu'ulane ve mboan abé.
- 9 Amu bikotekote bi bôt bi aye tyi'iban;
Ve ba b'ayange YEHOVA, b'aye nyoñe si.
- 10 Obe nté ô ngenan, ékotekote môt j'aye fe beta tabe;
Yaa, akôsabo w'atu'a fombô vôm a nga too, ve a nto momo.
- 11 Ve bôt be ne minlem évôvoé b'aye nyoñe si,
B'aye yene mvaé e abui mefo'o été.
- 12 Ekotekote môt j'abôndé fe'e ya bo zôsôa môte jam,
A latane mesôñ ya kô'é nye.
- 13 Ve YEHOVA a woé ékotekote môt,
amu a lôô na, môse wé ô mbeme zu.
- 14 Bikotekote bi bôt bi téya fansôñ abam a kolé bilaé biap,
Ane b'aye dume minzôzoé a bingôngole bi bôt e si,
Ane b'aye wôé bôt b'awulu zôsôô.
- 15 Nkpwaté mekône wop w'aye jii bebien e nlem,
A bilaé biap bi aye bu'i.
- 16 Tyôtyoé ya môt a ne zôsôô a bili é ne mvaé

- A dañe jama mam bikotekote bi bôt abui bi bili.
- 17 Amu mo me ékotekote mô̄t m'aye bu'i ;
Ve YEHOVA a ba'ale bezôsô̄ be bôt.
- 18 YEHOVA a yem melu me bôt ne ne nya mvo'é ;
A ngabe jap j'aye tabe nnôm éto.
- 19 B'aye bo te veban ôson e mbia biyoñ ;
E melu me mfumbala zaé, b'aye bi mefok.
- 20 Ve bikotekote bi bôt bi aye jañ,
A besiñe ba YEHOVA b'aye bo aval ane étôto'o ya ôbut,
B'aye viele — aval ane ôtita b'aye jañ.
- 21 Ekotekote mô̄t j'akôlé, ve te beta ya'an ;
Ve mô̄t a ne zôsô̄ a ne ésôs, a ve ;
- 22 Amu ba YEHOVA a botane mbe b'aye nyoñe si,
Ve ba a yo'é mbe b'aye jañ.
- 23 Meda mebo me mô̄t m'aso e be YEHOVA ;
A telé nye e zen émien a yene mvaé.
- 24 Akôsabo a ku, a ye bo te tôlane si :
Amu YEHOVA a bili nye a wo wé.
- 25 Me mbe mongô, a éyoñe ji me nto nnôm;
Ve me nji yene mô̄t a ne zôsô̄ a liki'i,
Nge yene mvoñe bôte jé é jaké'e bidi.
- 26 Ngume nté mô̄s a ve mvean ésôs,
A kôlé biôm; a mvoñe bôte jé j'ayen ébotan.
- 27 Kôlô' abé, a bo mvaé;
Nalé w'aye tabe nnôm éto.
- 28 Amu YEHOVA a nye'e nya ntyi'ane mejô̄,
A ye bo te li'i mimfube mié.
Bezôsô̄ be bôt b'aye ba'aleban nnôm éto,
Ve bone bikotekote bi bôt b'aye tyi'iban.
- 29 Bezôsô̄ be bôt b'aye nyoñe si,
A tabe été nnôm éto.
- 30 Anyu mô̄t a ne zôsô̄ d'akobô ñyemane mam ;
A ôyeme vié vi akobô zôsô̄.
- 31 Metiñe me Zambe wé me ne nye e nlem été ;
Mebo mé te ke da d'aye sendé.
- 32 Ekotekote mô̄t j'amombô mô̄t a ne zôsô̄,
A jeñ ane a ye wôé nye.
- 33 YEHOVA a ye bo le li'i nye e ngule ya mo mé,

- Nge kañese na be ve nye mekua éyoñ b'atyi' ajô dé.
- 34 Yange'e YEHOVA, a ba'ale zene jé,
Nnye a ye bete wo yôp ane w'aye nyoñe si;
W'aye yen ane bikotekote bi bôt bi atyi'iban.
- 35 Me yeneya ékotekote mô̄t e too ngul abui ;
E tele ve ane élé kédar ya Liban.
- 36 Nde me nga beta lôte valé, ô lôô, a nji beta bo ;
Akôsabo me nga jeñe nye, a nji bo ngule ya yené.
- 37 Fombô'ô mô̄t a ne nya mvo'é,
A yene mô̄t a ne zôsôô ;
Amu mvoñe bôt é ne mfa'a ya be mô̄t a ne mvo'é.
- 38 Ve betyam metiñe bese b'aye jañ;
Mvoñe bôt ékotekote mô̄t j'aye tyi'i.
- 39 Nyiane bezôsôô be bôt w'aso e be YEHOVA ;
A ne asoé dap éyoñe ya njuk.
- 40 YEHOVA a volô be, a kôté be,
A kôté be e be ékotekote mô̄t, a nyii be,
Amu b'asobô e be nye.

Meye'elane me mô̄t a singi abé dé

(Besam 6; 39; 70)

Sam David, a volô nye na a wô'abé dé ôlun.

- 38** 1 A YEHOVA, te komekane ma éyoñ w'ayaa;
Nge bôme ma éyoñ ô ne ayok.
- 2 Amu mekoñe me élaé me beme me e nyô,
Nde fe wo wôé ô titi me e yôp.
- 3 Mvo'é e nji bo ma e minsôn été amu ayaa dôé ;
Nalé fe mvo'é é nji bo ma e bivese biam amu abé dam.
- 4 Amu mbia be mame mam me yandaneya ma e nlô yôp ;
Me nto ane mbe'e w'adañe me adit.
- 5 Meveñe mam me nto ébol a avin;
Amu mboan akute wom.
- 6 Me kômeya vitibi adañedañe fo'o kutubu si;
Ngume nté mô̄s m'ake m'ayep.
- 7 Amu mimvi'i miam mi ayôñ a mintaé,

- A mvo' é é nji bo ma e minsôn été.
- 8 Me nto nya ate' e a ntya' an;
M' atat amu zô' é ya nleme wom.
- 9 A YEHOVA, nkômbane wom ôse, w' ayeme wô;
A ñyône wom ô nji bo wo nsolan.
- 10 Nleme wom w' akumetan, ngule jam é maneya ma;
Ja' an éfufube ya mise mam, je fe é kôlôya e be ma.
- 11 Bemvôé bam a meyembane mam be ntele ma ôyap,
Amu ébubua ôkone jam;
A bôte be vumane ma be ntele ma ôyap.
- 12 Ba fe b' ajeñ ényîne jam b' aya me bikoé ;
A ba b' ajeñ abé ya bo ma b' akobô mbia be mam.
B' abindi mame ya koñe ma ngume nté môs.
- 13 Ve ma, aval ane ndôndok, me ne te wôk ;
A me nto aval ane mvumvuk, ñwô ô ne te kui anyu dé.
- 14 Yaa, me nto aval ane môt a ne te wôk,
E anyu dé été bifia ya yalan bi ne momo.
- 15 E be wo, A YEHOVA, me to ndinlem ;
Wo ô ne nyô a ye yalan, A YEHOVA, Zambe wom.
- 16 Amu m' aye' elane na, Te kañese na be vak amu ma,
Eyoñ abo dam d' asendé, b' abo me mebun e nyô.
- 17 Amu me nga ye ku,
A mintaé miam mi ne me ôsu éyoñ ésé.
- 18 M' amem ékotekote jam ;
Me ne ôlun amu abé dam.
- 19 Ba be ne besiñe bam te ke étom, be ne ngu ;
Ve ba b' avini ma évinivini be ne abui.
- 20 Ba fe b' abutan abé a mvaé,
Be ne besiñ, amu m' atôñe jam e ne mvaé.
- 21 Te li' i ma, A YEHOVA !
A Zambe wom, te tabe me ôyap.
- 22 Bo' avôle ya volô ma,
A YEHOVA, nyiane wom !

Eyiñ é ne momo jam

(Yiôb 14; Besam 38; 90)

Mfa' a Evet mezik ; e Yeduthun. Sam David.

39

- 1 Me nga jô na, M'aye tabe ntyel e mezene mam,
Me za bo abé a ôyeme viam;
M'aye tiñeti anyu dam ane kandé ékabela,
Nté ôse ékotekote mỗt é ne me ôsu.
- 2 Me mbe mvuk a évô;
Me nga ku évô, me kôsa bo éngôngo,
Ve mintae miam mi nji se'an.
- 3 Nleme wom ô nga yôñe ma e abum été;
Eyoñ me nga simesam, nduan é nga yôñ;
Wôna me nga kobô a ôyeme viam.
- 4 A YEHOVA, ye'ele'e ma me yem asu'ulane dam,
A tañe melu mam me né;
liti'i ma me yem aka'a étyes me né.
- 5 Tame yen, ô boya melu mame tyôtyoé, abim ane ndame ya doé été;
A melu ya ényinë jam me ne momo jam e mise môé :
Bebela, mỗt ase a tele ve ane zesé mvebe ! Sélah !
- 6 Bebela, mỗt a ke a wulu aval ane nsinsiñ !
Bebela, b'awu fo'o njuk e zesé :
Mỗt a kôan akum, a ne te yeme nyô a ye kôane de.
- 7 A éyoñe ji, A YEHOVA, m'ayange jé ?
Ndinleme jam é ne e be wo.
- 8 Nyi'i ma mfa'a ya mintyamane metiñe miam mise.
Te bo me jôm mekute me bôt m'akpwe'ele !
- 9 Me ne mvuk, me nji kui anyu dam ;
Amu wo ô nga bo de.
- 10 Va'a mbibane wôé e be ma :
Me wuya a mbibane ya wo wôé.
- 11 Eyoñ w'abôme mỗt a lebe nye amu abé,
W'abo abeñe dé na e jañ aval ane kômebua :
Bebela, Mỗt ase a ne fo'o ve zesé mvebe ! Sélah!
- 12 A YEHOVA, wô'ô meye'elane mam,
A kee alo mfa'a ya ñyône wom,
Te tabe évô amu mili'i mam:
Amu me ne nneñe wôé a lỗt,
Ntabe, aval ane betate bam bese.
- 13 Tame fombô mfa'a mfe, ane me ne yen meva'a mam,

Eyoñ me ngenane te kôlô, te fe beta tabe !

Ntyi'ane metuna'a ya ékaña'a a meye'elane ya ja'é mvolan

(Besam 70 ; Beheb 10 :1-14)

Mfa'a Evet mezik. Sam David.

40

- 1 Me nga yange YEHOVA a mban;
A nga kee alo dé e be ma,
A vô'ôlô ñyône wom.
- 2 A nga vaa ma e ébé ya njañan été, e mboto'o si ;
Ane a nga telé mebo mam e akôm ako'o yôp ;
A yemete mebo mam mvo'é.
- 3 A nga futi mfefé jia anyu dam,
Jia ékaña'a mfa'a Zambe wongan.
Abui d'aye yen a ko woñ,
Nde fe b'aye tabe YEHOVA mebung.
- 4 Mvom a mô't a bo YEHOVA jôm ya tabe je mebung,
Nyô a bo te ke e be bôte mebung,
Ba b'ayale feñ e be bivôvôla bezambe !
- 5 A YEHOVA Zambe wom, ô nga bulu bitua bi mam
A asimesane dôé mfa'a wongan,
Te ke mô't a ne ve'an a wo !
Nge me nga ye kañete a kate me foé,
M'adañ abim me ne ngule ya lañeban.
- 6 Metuna'a a mimvean ô ne te yene bie mvaé;
Ve ô nga tube ma melo ya wô'ô wo.
Metuna'a b'adi'i a mimvean amu abé, ô nji sili bie.
- 7 Eyoñ éte me nga jô na, O lôô, me soya ;
E ne ntilan e mvulukane kalate ajô dam, na,
- 8 M'ayene mvaé ya bo nkômbane wôé, A Zambe wom ;
Metiñe môé me ne e nleme wom été.
- 9 Me nga kañete meva'a foé ya nyian e beta ékôan été ;
O lôô, me nga bo te kame biyaé biam, aval ane w'ayem, A YEHOVA.
- 10 Me nga bo te solé mvolane ya nyiane wôé e nleme wom été ;
Me nga kobô ajô fulu jôé ya buni a nyiane wôé ;
Me nga bo te ke solé mvame jôé a fulu jôé ya buni e beta ékôan été.
- 11 A YEHOVA, te kame mvame jôé e be ma,

- Mvame jôé a fulu jôé ya buni bi ba'ale'e ma kom ése !
- 12 Amu mam abé te ke alañé me nga bômane ma,
Mbia be mam bam be dañeya ma,
Akui me se ngule ya yen ;
M'adañ éstile ya nlô wom abui.
A me nji beta boo nlem.
- 13 A YEHOVA, tame yene mvaé ya nyii ma !
A YEHOVA, bo' avôle ya nyii ma !
- 14 Kañese'e, na be veban ôson e nyô
A bo fe'e ne vema besese'e,
Ba b'ajeñe na be vaa ényiñe jam ;
Kañese'e na be bulane mvus a wu ôson,
Ba b'ayene mvaé ane m'ayen abé.
- 15 Kañese'e na be bo fe'e njañan amu ôsone viap ;
Ba b'ajô me na, Eñhhe, eñhee !
- 16 Ve ba bese b'ajeñe wo,
Be va'ak a yene mvaé e be wo ;
Ba b'anye'e nyiane wôé be jô'ôk éyoñ ése na, YEHOVA a ne anen !
- 17 Ve mfa'a wom, me ne éngôngo a azoé ;
Ve YEHOVA a simesane ma.
O ne mvolane wom a nyii wom ;
Te bem, A Zambe wom !

Nyia Sam, éyoñ a nga kon, a nga tat a minziziñ ba bivôvôla bemvôé

(Besam 55; 112; Mat 5:7)

Mfa'a Evet mezik. Sam David.

41 1 Mvom a môt a simesane nzôzoé !

- YEHOVA a nyii nye e môse njuk.
- 2 YEHOVA a kale nye, a ba'ale nye a tabe éyiñ;
A ne nyô a bili mvom e nlam;
O bo'o te ve nye e nkômbane minziziñe mié.
- 3 YEHOVA a ye ba'ale nye énoñ ôkone jé;
W'aye saé nye mfa'a ya akone dé ese.
- 4 Ve mfa'a wom, Me nga jô na, A YEHOVA, ko me éngôngo;
Saé ma, amu me nga bo wo abé !
- 5 Besiñe bam b'akobô me abé, a jô na,

- Eyoñ évé a ye wu, a jôé dé e jañ ?
- 6 Eyoñe mỗt a zu me jom, a kobô me bivôvôla mejô,
Eyoñ nleme wé w'akôan abé.
Eyoñ a kui atan, a nga miase de.
- 7 Ba bese b'avini ma b'ala'an afôfoé be tote ma;
B'ave'e ma mbia mefek.
- 8 B'ajô na, Okon awu ô biya fo'o nye;
A éyoñ a bôô si ji, a ye bo te fe kôlô.
- 9 Yaa, nya mvôé wom, nyô me nga too nye mebun,
Nyô a nga bo a ja'a fembe jam,
A beteya étimekili jé yôp mfa'a wom.
- 10 Ve wo, A YEHOVA, ko me éngôngo, a bete me si,
Nde m'aye bo be ane be nga bo ma.
- 11 Amu jame di m'ayeme na, w'ayene me mvaé,
Amu mỗt a siñe ma a bo te fôn amu ma.
- 12 O nga kale ma amu mvo'é jam ;
O nga télé me asu dôé nnôm éto.
- 13 Ntôtô a bo'o YEHOVA, Zambe Israël,
Ataté nnôm éto, akekui nnôm éto.
Amen a Amen !

KALATA BAA

Mwô'ane Zambe évé éyoén njuk a mekaban

(2 Sam 17 :22-29 ; Besam 27 ; 43 ; 63 ; 84 ; Miny 3 :24 ; Yes 8 :17)

Mfa'a Evet mezik. Maski lbone be Kôré.

- 42** 1 Aval ane nko'o w'ayi minleme mi atôñe mendim,
Nalé ate nleme wom w'ayi wo, A Zambe.
- 2 Nleme wom w'awô'ô Zambe évé, vevea Zambe :
M'aye zu éyoñ évé a lôbô asu Zambe?
- 3 Mili'i mam me nga too me bidi, môs ba alu,
Nté bôt b'ajô me éyoñ ése na, Zambe wôé a ne vé ?
- 4 Mam mana me wô'ô simesan, éyoñ m'asôé nleme wom :
Eyoñ me nga ke bia nsamba bôt,

- A kee be nsamba e nda Zambe,
 A metyiñe mevak a bia bi ékaña'a,
 Zañe nsamba bôt w'ajeme môs abôk.
- 5 Amu jé w'abo ate' ana, A nleme wom ?
 Amu jé w'anyeñebane ma e abum été ana ?
 Tabe'e ndinlem e be Zambe ; amu me ngenan me ye'e kañe. Mvolô wom, a Zambe wom !
- 6 Nleme wom w'ate'e ma e abum été;
 Ajô ete m'asimesan wo nté ya si Yôrdan a Hermon, mfa'a ya Nkôle Mitséar !
- 7 Edo'o j'aloen édok a tyiñ mesô'ô môé;
 Minjimbi mintyôa miôé mise a beta mintyôa miôé bi yandaneya ma e yôp.
- 8 YEHOVA a ye jôô mvame jé a môs;
 Jia jé j'aye tabe e be ma a alu,
 Vôm m'aye'elane Zambe ya ényiñe jam.
- 9 M'aye jô Zambe, ako'o dame na,
 O vuaneya ma a jé ?
 M'ake m'ayi du amu ékpwe'ele besiñ a jé ?
- 10 Aval ane fôl awu é ne ma e nyôl été,
 Besiñe bam b'apwe'ele ma,
 Nté b'ajô ma éyoñ ése na, Zambe wôé a ne vé ?
- 11 Amu jé w'ate' ana, a nleme wom,
 Amu jé w'akumetane ma e abum été ana ?
 Tabe'e ndinlem e be Zambe; amu me ngenan me ye'e kañe nye,
 Mvolô wom a Zambe wom.

Meye'elane ya ja'é nyian

(Besam 42)

43

- 1 Kunu ma, A Zambe, a vañ ajô dam
 Osu ya ayoñ e ne te ko Zambe woñ ;
 Tame nyii ma e be môt a ne medu'an a ékotekot !
- 2 Amu ô ne Zambe, nyô me solô e be nye ;
 Amu jé ô wuaya ma e fé ?
 Amu jé m'ake m'ayi du amu ékpwe'ele nsiñ ?
- 3 Tame lôm éfufube jôé a benya mejôô môé ; bi wulu'u ma :
 Bi kelee ma e nkôle wôé ô ne étyi, a e étaba'a jôé !
- 4 Eyoñ été m'aye ke e altar Zambe,
 E be Zambe ya abui meva'a dam ;

- A m'aye kañe wo a mvet, a Zambe, Zambe wom.
- 5 Amu jé w'ate' ana, A nleme wom, amu jé w'akumetane ma e abum été ana ?
Tabe'e ndinlem e be Zambe, amu me ngenan me ye'e kañe nye, Mvolô wom a Zambe wom.

Minyiane ya kôa a minju'u ya den

(2 Sam 8; Besam 60; 77: 11-13; 89; Yes 51: 9, 10)

Mfa'a Evet mezik. Maskil bone be Kôré.

- 44** 1 Bi wô'ôya a melo mangan, A Zambe;
- Beésaa bangan be nga kañete bia,
Avale mimboan ô nga bo e melu map, e melu kôa.
- 2 O nga titane meyoñ a wo wôé ôbien,
Ve mbe bete ô nga tooé;
O nga kpwe'ele meyoñ,
Ve mbe ô nga télé beti;
- 3 Amu be nga bo te nyoñe si a fansoñ jap bebien,
Nalé fe wo wop bebien ô nga bo te ve be ndañan;
Ve mbonnôme wôé a akule wo dôé,
A éfufube ya asu dôé; amu ô nga yene be mvaé.
- 4 O ne Njôô wom A Zambe wom,
Jô'ô mindañane bita mfa'a Yakob.
- 5 Amu wo bi aye sô'ôlô besiñe bangan e si;
Amu jôé dôé nde bi aye tibi ba b'asengane bia e si.
- 6 Amu m'aye bo te tabe mebun a élaé jam,
Nalé fe fansoñ jam j'aye bo te nyii ma.
- 7 Ve wo ô nyiia bia e be besiñe bangan,
O maneya dimili ba b'asiñe bia fek.
- 8 Bi nga wô'ô mebune mangan e be Zambe ngum nté môs,
A bi aye ve jôé dôé akéva nnôm éto. Sélah !
- 9 Ve akôsabo ô wuaya bia e fé a sili bia e si,
O nga bo fe teke li'itane minsamba mewosane miangan.
- 10 O nga bo na bi bulan e mvus a mate môt a siñe bia ;
A besiñe bangan be nga sa biôme biangan.
- 11 O nga bo bia aval ane mintômba b'atyik,
O nga miase bia e meyoñ me bôt été.
- 12 O nga mane kuan ayoñe dôé ane momo jôm,
Teke sili mfañe tañ mfa'a wop.
- 13 O nga bo bia jôm ékpwe'ele e be beébebemvôé bangan,

- Jôm ébiasé a fianga e be ba b'abômane bia.
- 14 O nga bo bia jôm nkana e meyoñe me bôt été,
Efô'ô minlô e meyoñe me bôt été.
- 15 Ngum nté môs ôsone viam ô ne ma e mis été,
A ôson ô butiya asu dam,
- 16 Amu bifia bekpwe'ele a bebiasé,
A mise me nsiñ a nkun.
- 17 Jam ése di e kuiya e be bia ;
Ve bia teke vuane wo, nalé fe bi nji bo medu'an mfa'a ya élate jôé.
- 18 Nleme wongan ô nji bulan e mvus,
Nalé fe mebo mangan me nga bo te kôlô e zene jôé,
- 19 Amu ô za bu'u bia vôm beze be né,
A buti bia afibe dibi.
- 20 Nge bi vuaneya jôé Zambe wongan,
Nge same mo mangan e be njina Zambe;
- 21 Ye Zambe a ye bo te yene de,
Nyô a yen minsolane mi mame ya nlem ?
- 22 Yaa, amu ajô dôé bi awu ngum nté môs ;
B'ayene bia aval ane mintômba b'ake tyik.
- 23 Ve'e, amu jé w'atabe ôyo, A YEHOVA ?
Kôlô'ô si ! Te wua bia e fé nnôm éto.
- 24 Amu jé w'asolé au dôé,
Amu jé w'avuan nju'u wongan a ékpwe'ele jangan ?
- 25 Amu nleme wongan ô mviti ô nambe'e mbuluk :
Nyôle jangan j'akabetan e si.
- 26 Kôlô'ô si, ô bo mvolane wongan,
Nyi'i bia amu mvame jôé.

Jia ya jemé alu'u Njô bôt

(Besam 2 :6 ; 110 ; Mat 22 :2 ; Ef 5 :23-27 ; Behéb 1 :8, 9 ; Nkul 19 : 7-9 ; Sam 1 akui 8)
Mfa'a Evet mezik : e Shoshanim. Maskil bone be Kôré. Jia nye'an.

45 1 Nleme wom w'afuluku a mbamba jia;

M'akobô mam me boya mfa'a njô bôt,
Oyeme viam ô ne ane nkôse ntilimam a ne nkômesan

2 O ne abeñ adañe bone be bôt;

Mvam é ne nsôéan e biyaé biôé :

— OYONO MEYE

- Ajô ete Zambe a nga botane wo nnôm éto.
- 3 Jaé' fansoñ jôé e akan, A éwôlô môt,
E дума a étôto'o jôé été !
- 4 E étôto'o jôé été, kele ôsu a dañ
Amu ajô ya benya mejôô, tame kame bivôvoé a bezôsôô;
Mbonnôm woé ô ye'ele'e wo beangôndô mimboane bôé !
- 5 Mekoñe me élaé môé me ne akap e nelme besiñe be njô bôt ;
Meyoñe me bôt m'aku si e mebo môé.
- 6 Eto njôô Zambe jôé é too nnôm éto a nnôm éto.
Ntume njôô wôé ô ne ntume njôô ya zôsôô;
- 7 W'anye'e zôsôô a vini ékotekot,
Ajô ete Zambe, e Zambe wôé, a nga wo'o wo a mbone mevak adañe bemvôé bôé;
- 8 Bizingi biôé bise bi anyum menyum mendak, a ôsim a mesep.
Bibôbôma minsañ bi aso e menda mimbañ été bi veyá wo ava' a nlem.
- 9 Bengone bejô bôt be ne binga be дума bôé;
Nga njô bôt a tele e mbonnôme wôé a be'e gôlt ya Ofir.
- 10 Wô'ôk, A ngone minga, a simesan, a kee alo dôé;
Vu'ane fe bôte bôé womien, a nda ésoo wôé;
- 11 Njô bôt a ye diñ abeñe dôé; amu ane njôô wôé; ô va'a nye ôlu'u;
- 12 A bôte ya Tir b'aye tebe wôé be bili bifa'aé ya ja'é mvam,
- 13 Biwôlô minkukume ya meyoñ, a akum mevale mese.
Ngone njô bôt é too e nda njô bôt été j'adañ étôtok,
Ngômesane jé é ne ntiñan a gôlt.
- 14 B'aye zuu nye e be njô bôt a be'e mbamba ntiñane ngômesan :
Bengone be binga be ne bemvôé bé b'atoñe nye, a ye liti wo be.
- 15 B'awulu nsamba a bia a mevak,
Éyoñ b'ake nyin e nda njô bôt.
- 16 Bone bôé be nto ane beésoo bôé :
O nga ye viane bo be bone bejô bôte ya si ése.
- 17 M'aye bo na jôé dôé e wum miaé mi bôte mise :
Ajô ete meyoñe me bôt m'aye kañe wo nnôm éto a nnôm éto.

Zambe, Oleme bôte bé

(Besam 48; 75; 76; Yes 36; 37)

Mfa'a Evet mezik. Sam bone be Kôré: e Alamothe. Jia.

- 46** 1 Zambe a ne ôlem viangan a ngule jangan,
Mvolan w'adañe bebé wôm bi ayen njuk.

- 2 Ajô ete bi aye bo te ko woñ, akôsabo si nyô j'akôñelan,
A ja'ane beta minkôl mi afô'ôsan e zañe mañ été;
- 3 A kôsabo mendime ya été m'aduñ a ndeñetan,
To beta minkôle mi afô'ôsan a nkumutane ya été.
- 4 Osôé ô ne wôé ñwô mendime ya été m'ave nlame Zambe avak;
Mfufub étaba'a Nyô A Dañe Mbetane Yôp.
- 5 Zambe a too wô e zañ : w'aye bo te neñetan,
Zambe a volô wô ataté melendé me tyé.
- 6 Meyoñe me bôt me nga yaa, bito bi njôan bi nga ndeñetan,
A nga ve tyiñe jé, ane si é nga nyeme.
- 7 YEHOVA minsamba mewosan a ne e be bia.
Zambe Yakob ane ôleme viangan. Sélah !
- 8 Tame zu yenane mimboane mi mam mi YEHOVA,
Avale ntyamane mam a nga bo e si nyô.
- 9 A mane mewosan akekui susu'a si nyô ;
A bu' élaé, a tyi' akoñe bitun, a di'i bikalik a nduan !
- 10 Taba'an évô, a yeme na, me ne Zambe :
Me ne mbetane yôp e si nyô !
- 11 YEHOVA ya minsamba mewosan a ne e be bia ;
Zambe Yakob a ne ôleme viangan. Sélah !

Zambe Njô bôte ya si nyô

(Besam 68 ; 98)

Mfa'a Evet mezik. Sam bone be Kôré.

- 47** 1 Tameka kutane fas, mia meyoñe mese ;
Sôane Zambe tyiñe yôp a bia mevak !
- 2 Amu YEHOVA, Nyô a Dañe Mbetane Yôp, a ne angôndô,
A ne Beta Njô a jô si ése.
- 3 A nga sili meyoñe si e be bia,
A meyoñe me bôt e mebo mangane si.
- 4 A nga tobe ngabe jangan mfa'a wongan,
Mebune me Yakob, nyô a nga nye'e. Sélah !
- 5 Zambe a nga ke e yôb a beta tyiñ, YEHOVA, a tyiñe toñ.
- 6 Yi'ane Zambe bia bi ékaña'a,
Yi'ane bia bi ékaña'a :
Yi'ane Njô bôte wongan bia bi ékaña'a,
Yi'ane bia bi ékaña'a.

- 7 Amu Zambe a ne Njô bôte ya si ése ;
Yia'ane bia bi ékaña'a a ôlu'u.
- 8 Zambe a jôô meyoñe me bôt,
Zambe a too yôp e mfufub éto njôô jé.
- 9 Bone bejô bôte ya meyoñ b'asulane wôme wua,
Ane bôte be Zamba Abraham.
Amu bibene ya si nyô bi ne biôm bi Zambe :
A ne étua mbetane yôp.

Abeñ a étôto'o Siôn

(Déut 33 :28, 29 ; 2 Mink 20 ; Besam 46 ; 83)

Jia. Sam bone be Kôré.

48

- 1 YEHOVA a ne anen, a yiane dañe kañeban, e nlame Zambe wongan été !
- 2 Mfufube Nkôl, abeñ e mbetane yôp, ô ne ava'a ya si ése,
Nkôle Siôn ô ne ôyap mfa'a ya Akôé, nlame beta Njôô.
- 3 E menda me Njô bôte mé été,
Zambe a meneya liti émiene na,
A ne ngungul ôlem.
- 4 Amu ô lôô, bejô bôt be nga sulan,
Be nga zu nsamba fufulu.
- 5 Ayene be nga yene de, be nga semé,
Be nga too fe'e ne vema, be nga ke mimbi;
- 6 Benyeñenyeñe be nga bi be vôm ate,
Mintaé, aval ane minga a kô'ôlô mie.
- 7 A évuñulu j'aso e jôp d'atôô,
W'abôé miele ya Tarsis.
- 8 Aval ane bi nga wôk, nalé ate bi yeneya,
Nlame YEHOVA minsamba mewosan, nlame Zambe wongan ñwô Zambe a telé nnôm éto.
- Sélah !
- 9 Bi simesaneya mvame jôé, A Zambe,
E tempele wôé été.
- 10 Aval ane jôé dôé e né, A Zambe,
Nalé ate ékaña'a jôé j'akui e susu'a si nyô ;

- Mbonnôme wôé ô ne njalan a ndañan.
- 11 Nkôle Siôn ô yene' mvaé !
Bengone be Yuda be va'ak
Amu mintyi'ane mejô miôé !
- 12 Wula'ane Siôn mbôma'ane, tyiñela'ane nye mbôma'ane,
Lañan azomezom menda ya été;
- 13 Tuka'a yenan aleme ya été,
Tula'ane menda me bejô bôt ya été;
Nde ete mi aye kate de miaé bôt w'aye zu
- 14 Na, nyôna a ne Zambe, Zambe wongan nnôm éto a nnôm éto ;
A ye bo nliiti zene wongan kom ése.

Asu'u mô't a too akum mebun

(Besam 37; 73; Luk 12:15-20)

Mfa'a Evet mezik. Sam bone be Kôré.

- 49** 1 Tameka wô'ane jame di, mia meyoñe mese;
- Ke'an alo, mia bôte bese mi too e si nyô,
- 2 Bôte betok a bôte bennen, bebaane,
Minkukum afulane minzôzoé.
- 3 Anyu dam d'aye kobô ñyemane mam;
A ôsimesane ya nleme wom vi aye bo vi ya fek.
- 4 M'aye vit alo dam mfa'a ya nkana :
M'aye timi nsolane jame wom a tyiñe mvet.
- 5 Amu jé me nga ye ko woñ e biyoñe ya njuk,
Eyoñ abé bekpwe'ele bam d'abômane ma ?
- 6 Ba b'atabe akume dap mebun,
A bo mebun amu jama akume wop;
- 7 Bebela, teke mô't a ne ngule ya kôté émien,
Nge ve Zambe ngôtô ya ényiñe jé.
- 8 Amu ngôtô ya éyiñe jap a ne beta tañ, a se ngule ya yian.
- 9 Ane a ne tabe ényiñe melu mese,
A bo te yene Soñ.
- 10 Yaa, a ye yene je, j'a'ana mimfefek mi awu,
Okukut a mô't a ne ndundumban b'ajañ avale da ;
A li'i bôte bete akume dap.
- 11 Mesoñe map me ne mvô'ô jap nnôm éto,

- Bito biap akekui miaé mise,
Akôsabô b'ayôlé mesi a môé map.
- 12 Môt a nji bo ngule ya nyiñ a ngunguane wé,
A ne aval ane tit j'ajañ.
- 13 Dina e ne asu'ulane bôt be bili asu'u ndinlem,
Asu'ulane ba be nga yene mvaé a ngabe jap. Sélah !
- 14 Be ne ntelan aval ane mbam mintômba w'ake e Shéôl ;
Awu nde d'aye bo mba'ale wop;
B'aye jambe tetele e mesoñe map été,
Ékôkôme nyôle jap j'aye wu ntuk;
Shéôl a ye bo mvô'ô jap.
- 15 Ve Zambe a ye kôté nsisime wom mfa'a ya ngule Shéôl,
Amu a ye nyoñe ma. Sélah !
- 16 Te ko woñ éyoñe môl a nto akum abui,
Eyoñ duma ya nda jé d'anenenen.
- 17 Amu éyoñ a ye wu, a ye bo te kee jôm;
Duma dé d'aye bo te ke d'atôñe nye e soñe si.
- 18 Akôsabô éyoñ a nga vee, a nga lañ émien, mvom,
Akôsabô môl a nyoñ ôlu'u éyoñ a bo émien mvaé.
- 19 A ye ke e be miaé bôte beésaa bé;
B'aye bo te fe yen éfufup.
- 20 Môt a nji bo ngule ya tabe a ngunguane wé,
A ne aval ane tit j'ajañ.

Zambe Ntyi'i mejô ya bezôsôô a bikotekot

(1 Sam 15:22; Yes 1:2, 10-20; Yér 7:21-23)

Sam Asaf.

50

- 1 Nyô a ne Ewôlô, Zambe, YEHOVA, a kobôya,
A nga loene si nyô aso vôme jôp d'atôô akekui vôm d'adim.
- 2 Aso e Siôn, njalan a abeñ,
Zambe a faé.
- 3 Zambe wongan a zu, a nji ke tabe évô :
Nduan j'adi'i é ne ôsu vié,
A beta ôkôs a bômane nye.
- 4 A loen mfa'a ya yôp e yôb été,
A mfa'a ya si nyô, ane a ye tyi'i bôte bé mejô.

5 Sula'ane me bebuni bam,
Ba bia be be bi maneya bo élat a metuna'a.

6 Yôp d'aye kañete zôsôô wé;
Amu Zambe émien a ne ntyi'i mejô ! Sélah !

7 Tameka vô'ôlan, A bôt bam, ane m'aye kobô;
A Israël, m'aye kate wo foé:
Ma me ne Zambe, e Zambe wôé.

8 M'aye bo te komekane wo amu metuna'a môé;
Mindi'ane metuna'a miôé mi ne ôsu viam kom ése.

9 M'aye bo te nyoñe nnôm ényaka a so e nda jôé,
Nge beyôm bikela b'aso e mebemba môé.

10 Amu tit ése ya fé é ne énjam,
A biyem bi too e toyina minkô.

11 M'ayem anon ése ya beta minkô,
A jôm ése j'awulu afan é ne énjam.

12 Nge me nga ye wô'ô zaé,
Ve me nga ye bo te kate wo ;
Amu si a biôm bise bi ne été bi ne émbiam.

13 Ye m'aye di minsône beyôm binyaka,
Nge nyu metyi bikela ?

14 Va'ane Zambe metuna'a me mvean akéva,
A ya'ane mintiñetane mienan e be Nyô a Dañe Mbetane Yôp ;

15 Lo'ene ma e môse ya njuk :
M'aye nyii wo, nde w'aye kañe ma.

16 Ve Zambe a jô ékotekote môte na,
Za ngul ô billi na ô kobô memvinda mam,
Ane ô nga tot élate jam anyu dôé,

17 Amu w'avini melep,
A wua mejô mam e mvuse jôé ?

18 Nge ô nga yen ñwuwup, ô nga bo mvôé jé,
O nga wulu e nsamba bebo mejian.

19 W'ave anyu dôé mfa'a ya abé,
A ôyeme viôé w'atiñeti medu'an.

20 W'atabe si a kobô monyoñ abé ;
W'aso'o mona nyua émien.

21 Mam mana ô boya, a me nga too évô;
O nga simesane na me mbe aval ane womien :
Ve éyoñe ji, m'akomekane wo, a liti wo bitome bi.

- 22 Nde simesa'ane jame di, mia bôt mi avuane Zambe,
A za bo na, m'aye nyap, a môte ya nyii a ye bo momo :
- 23 Nyô a soo mvean akéva ane metuna'a mé, a kañe ma;
A nyô a sôane zene jé zôsôô,
M'aye liti nye nyiane Zambe.

Meye'elane me môt a wô'ô abé dé ôlun a yi njaman

(2 Sam 12:1-14; Besam 6; 32; 38)

Mfa'a Evet mezik. Sam David, éyoñ Nathan a nga zu be nye,
éyoñ a maneya ke e be Batshéba.

51

- 1 Ko me éngôngo, A Zambe,
Aval ane mvame jôé é né :
Aval ane abui nkoan éngôngole dôé e né,
Tame tyame mintyamane metiñe miam.
- 2 Tuka'a sôp mbia abé wom,
A fubu fe ma abé dam !
- 3 Amu m'ayem mintyamane metiñe miam,
A abé dam e ne me ôsu éyoñ ése.
- 4 Wo, wo étam, me boya abé,
A me boya jam e ne abé e mise môé;
Nde ete w'aye kabe éyoñ w'atyi'i mejô.
- 5 O lôô, me nga bialé e mbia be mam été;
A nyia wom a nga nyoñ abume dam e abé été.
- 6 O lôô, w'ayi benya mejôô e nlem été;
A w'aye ye'ele me ñyemane mam e édo'o nlem été.
- 7 Tu'u ma a hisôp, nde m'aye bo mfuban :
Sôbe' ma, nde m'aye bo éfumulu adañe sut.
- 8 Jalé'é ma a mevak a ñyenan mvaé ;
Nde ete bives ô bu'uya bi aye vak.
- 9 Solé'é asu dôé mfa'a mam abé mam,
A tyam mbia be mam mam mese.
- 10 Téé me mfuban nlem, A Zambe,
A ve ma nlem ô ne mfefé a mvo'é.
- 11 Te wua ma fé me kôlô asu dôé ;
Nde fe te vaa me Mfufube Nsisime wôé.
- 12 Beta'a wômôlô me ava'a ya nyiane wôé;

- O yemete fe ma a nsisime mbamba nkômban.
- 13 Eyoñ éte m'aye ye'ele betyam metiñ mezene môé ;
Nde beboabé b'aye kôñelane minlem a zu e be wo.
- 14 Nyi'i ma mfa'a ya mekua ya nkulane metyi,
A Zambe, wo Zambe ya nyiane wom ;
Nde ôyeme viam vi aye yia nkôtane wôé tyiñ ngu.
- 15 A YEHOVA, ku'i biyaé biam ;
Nde anyu dam d'aye kulane duma dôé.
- 16 O nji nye'e metuna' a ; ve me nga ye ve wo me :
O nji nye'e metuna'a b'adi'i nduan.
- 17 Metuna'a Zambe a nye'e me ne nlem ô ne ntya'an ;
Nlem ô ne ntya'an a ôlun, A Zambe,
W'aye bo te bene wô.
- 18 Bo'o Siôn mvaé a mbamba nkômbane wôé;
Beta'a lôñ mimfin ya Yerusalem.
- 19 Wôna w'aye yene metuna'a me ne zôsôô mvaé.
Mindi'ane metuna'a a metuna'a b'adi'i ngumba :
Eyoñ éte beyôm binyaka b'aye veban e altar wôé yôp.

Mboan abé mebun ô ne momo jôm

(1 Sam 21 :1-9 ; 22 :9 ; Besam 92 :8 ; Min 11 :28)

Mfa'a Evet mezik. Maskil David, éyoñ Dôég, mon Edom, a nga zu kate Saul foé na:
David a nto enda Ahimelek.

52 1 Amu jé w'abo mebun, A éwôlô mô't ?

- Amu mbia jam a nga bo nko Zambe woñ ?
Ngum nté mô's w'abôndé mbia be mam me éndaman.
- 2 Oyeme viôé ô ne akab ôtyenjeñ,
Vi abo mam me njoñ.
- 3 W'anye'e abé adañ mvaé,
A nlaane minsos adañ nkobane zôsôô. Sélah !
- 4 W'anye'e mejô mese m'ajian,
A wo ôyeme medu'an.
- 5 Zambe a ye jiane wo aval ete nnôm éto;
A ye wo bi a vaa wo e ntendé wé été.
A ye nyu'u wo si e si bevevee be bôt. Sélah !
- 6 Bezôsôô b'aye yene de, a ko woñ,

- Nde b'aye woé nye, a jô na,
7 Tame yen, mỗt a nga bo te bo Zambe asoé dé,
Ve a nga tabe abui akume dé mebun,
A nga jeñ asoé e akume dé été.
8 Ve mfa'a wom, me ne aval ane nyumen élé ôlivié e nda Zambe été :
Me too mvame Zambe mebun nnôm éto a nnôm éto
9 M'aye kañe wo nnôm éto, amu ô boya de.
M'aye kañete jôé dôé, amu e ne abeñ,
E mise me beko Zambe woñ.

Asuk a Ezezam bôt

(Besam 14)

Mfa'a Evet mezik: aval ane Mahaloth.

Maskil David.

53

- 1 Okukut ô jôya e nleme wé été na, Zambe a ne momo.
Be maneya boé, a be boya angôndô abé;
Te ke mỗt a né, nyô a bo mvaé.
2 Zambe a nga fombô bone be bôte si a too e yôb été,
A yen nge bevo'o ya été be ne fek, ba be nga jeñe Zambe.
3 Bese be maneya kobe zen,
Bese avale da be maneya wu ntuk,
Teke'e wua a né nyô a bo mvaé;
Koko, teke'e wua.
4 Ye beboabé be bili fo'o ñyemane mam,
Ba b'adi bôt bam aval ane b'adi fembe,
A bo te loene Zambe ?
5 Vôm ate be né, e beta woñ été,
E woñ été, aval e nji tame boban !
Amu Zambe a tyamelane bivese bi nyô a wosane wo;
B'aye veban ôsone nyô, amu Zambe a beneya be.
6 Ngo'o nge nkôtan Israël ô nga so ke e Siôn !
Eyoñe Zambe a bulane bôte bé be nga ke e minkôm;
Eyoñ été Yakob a ye vak, a Israël a ye yene mvaé.

Meye'elane ya ja'é nkaman mfa'a besiñ

(1 Sam 23:14-28; 26:1)

Mfa'a Evet mezik; a bibôbôma minsañ.

Maskil David, éyoñ Zifit be nga ke kate Saul foé na: David a solô e be bia.

54

1 Nyi'i ma, A Zambe, a jôé dôé.

Kunu ma a ngule jôé.

2 Wô'ô meye'elane mam, A Zambe,

Ke' alo mfa'a mejô ya anyu dam.

3 Amu bejin be tebeya ma e ngame yat,

A bôt be ne évô b'ajeñ ényiñe jam :

Be ne te telé Zambe ôsu viap. Sélah !

4 Tame yen, Zambe a ne mvolô wom ;

YEHOVA a ne mba'ale nsisime wom.

5 Aye ya'ane minziziñe miam a abé ;

A jiane be amu benya mejô bôt.

6 M'aye ve wo metuna'a a mbamba nlem;

M'aye ve jôé dôé akéva, A YEHOVA, amu e ne mvaé.

7 Amu a nga vaa ma e nju' ôse été ;

A dise dam e yeneya jam me nga yene ndañan e be besiñe bam.

Meye'elane ya ja'é njañane bôte medu'an

(2 Sam 15 :12, 16 ; Besam 35)

Mfa'a Evet mezik : a bibôbôma minsañ

Maskil David.

55

1 Ke' alo mfa'a ya meye'elane mam, A Zambe;

A bo te solé womien e nja'ane wom.

2 Vô'ôlô'ô ma, a yalane ma;

Nju'u wom ô dañeya ma.

3 M'andéñe li a li amu éduñ nsiñe wom,

Amu ékpwe'ele bikotekote bi bôt.

Amu b'akute ma abé e nyô,

A éyoñ b'ayaa b'akpwe'ele ma.

4 Nleme wom w'adañe wô'ô mintae e abum été :
A beangôngô (**bengôndô**) be mame ya awu be kuya ma e yôp.

5 Woñ a benyeñenyeñe bi biya ma,
A angôndô a viseya ma e yôp.

6 Ane me nga jô na, Ngo'o nge me bili ke mefap aval ane zum !
Eyoñ éte me nga ye yeke tabe awo'an.

7 Yaa, me nga ye ke tabe ôyap,
Me nga ye ke tabe e nkôle si. Sélah!

8 Me nga ye bo avôle ya yen asoé,
A mate beta évñulu a ôkôs.

9 Ji'ane mefe'e map, A YEHOVA, a zametan ayeme dap;
Amu me yeneya évô a ntañete e nlam été.

10 Môs baa alu b'andên mbôma'ane e mimfine yôp;
Abé a nju'u bi ne wô été.

11 Endaman é ne e zañe jé;
Ekpwe'ele a medu'an bi ne te kôlô e nseñ éwônga wé.

12 Sa ke nsiñe wom nnye a nga kpwe'ele ma,
Me nga ye jibi de;
Sa ke nsiñe wom nnye a nga bo me nkpwala,
Me nga ye sobô nye.

13 Ve a mbe wo, mô't a ne aval ane ma,
Mô't wom, mvôé a awosa dam,

14 Bi wô'ô laane mbamba minlañ fufulu;
E nda Zambe été bi wô'ô ke mfula'ane.

15 Awu e kuik e be be, be kele'e Shéôl be vee;
Amu mbia bemam be ne étaba'a jab été, e zañe jap.

16 Mfa'a wom, m'aye loene Zambe;
A YEHOVA, a ye nyii ma.

17 Mamengôé, mametyé, a zañe mô's,
M'aye vebe édudu a tat;
Nde a ye wô'ô tyiñe jam.

18 A ye nyii nsisime wom mvo'é mvo'é,
Mfa'a ya bita m'alumane bi,
Amu ba be nga sengane ma be mbe abui.

19 Zambe a ye kee alo, a sili be si,
Nyô a too éto njôô aso kôa,
Amu be ne te ba'ale memvinda,
Nalé fe te ko Zambe woñ. Sélah !

- 20 Môô wom a sameya wo a lumane bemvôé bé a tyam élate jé.
 21 Anyu dé e mbe ékôkon adañ avoñ,
 Ve bita bi mbe e nleme wé été;
 Mejô mé me mbe nkonenkon adañe mbon,
 Ve me mbe minsoé mi fansoñ.
 22 Ke'e YEHOVA mbe'e wôé,
 Nde a ye ba'ale wo;
 A vo'o yebe na zôsôa môt a fô'ôsan.
 23 Ve wo, A Zambe, w'aye wua be e febebee ébé si,
 Bôte metyi a bekoñe bôt,
 B'aye bo te nyiñ akui étune ya melu map,
 Ve m'aye tabe wo mebun.

Nja'an nyian a ntabane Zambe mebun

(1 Sam 21: 10-15; 24: 15-16; Besam 34; 54; 57; 59; 112:7; 8)

Mfa'a Evet mezik : e zum Beterebinth be ne ôyap. Jia David Eyoñ

Filistia be nga bi nye Gath.

56

- 1 Ko ma éngôngo, A Zambe,
 Amu bôt b'atibi ma e yôp;
 Ngum nté môs bôte mewosan b'abametane ma.
 2 Besiñe bam b'atibi ma e yôp ngum nté môs;
 Amu abui bôt d'alumane ma nlumane mebun.
 3 Eyoñ m'ako woñ,
 Me too mebun be wo.
 4 E be Zambe, nyô m'akañ ajô dé,
 E be Zambe, nnye me too nye mebun te ko woñ :
 Minsôn mi ne ngule ya bo me jé ?
 5 Ngum nté môs b'ajeñe na be ndaman ajô dam;
 Minsimesane miap mise mi ajeñe zene ya bo me abé.
 6 B'alate bebien nsamba fufulu, b'atebe e nsom,
 B'afombô bibô'a mebo biam,
 Aval ane be maneya yabe ényiñe jam;
 7 Ajô ete, Yaka'ane be mbia abé wop,
 Sô'ôlô'ô meyoñe me bôte si, éyoñ w'ayaa, A Zambe.
 8 O nga bo ve lañ ndeñendeñe wom,
 Fiti'i mili'i mam e ñyombo été !

- Ye me nji bo e kalate wôé été ?
- 9 Eyoñ éte besiñe bam b'aye bulan e mvus e môs m'aloen :
Jame di nde m'ayeme na Zambe a ne e be ma.
- 10 E be Zambe, nyô m'aye kañ ajô dé,
E be YEHOVA, nyô m'aye kañ ajô dé,
- 11 E be Zambe, nyô me too nye mebun te ko woñ,
Môt a ne ngule ya bo me jé ?
- 12 M'ayiane bo mintiñetane miam ya e be wo, A Zambe;
M'aye ve wo mimveane ya akéva.
- 13 Amu ô nyiia nsisime wom e awu;
Yaa, mebo mam mfa'a ya ku,
Ane m'aye wulu asu Zambe e éfufube ya ényiñ été.

Meye'elane ya ja'é nyian mfa'a bekpwe'ele

(1Sam 24; Besam 108:1-7; 142)

Mfa'a Evet mezik: e ébôbôma: Te w'andaman.

Miktam David, éyoñ a nga mate Saul e mbas akok.

57

- 1 Ko me éngôngo, A Zambe, ko me éngôngo;
Amu nsisime wom ô solô e be wo :
E éjjine ya mefabe môé si, nne m'aye sobô été,
Akekui éyoñ ôkôse ya njañan vi aye lôt.
- 2 M'ayôn e be Zambé Nyô a Dañe Mbetane Yôp,
E be Zambe, nyô a tôé fe'e jé e be ma.
- 3 A ye lôm nyian ô so'o e yôp, a nyii ma;
A ye ve bôt b'atibi me yôb ôsone nyô. Sélah !
Zambe a lôme mvame jé a benya mejôô bé !
- 4 Me bôô si e bizezañe beñbweñbwem,
Mindôndo'o mite mi alalé bone be bôt;
Mmbe mesôñe map me ne mekoñ a bilaé bi mfan,
Ayeme dap e ne akabe fansoñ.
- 5 Bo'o mbetane yôp, A Zambe, a dañe yôp !
Etoto'o jôé é tabe'e si se e yôp.
- 6 Be yaya mebo mam avot ;
Nsisime wom ô nto mvitibane si :
Be fa'aya ma ébé ôsu
Ve bebien be kuya été. Sélah !

- 7 Nleme wom ô yeme ngu, A Zambe,
Nleme wom ô yeme ngu.
M'aye yia bia, m'aye lome tyiñ !
- 8 Ve'e, A nleme wom, ve'e A mvet a éngombé :
Mamien m'aye kune vee ôyo !
- 9 M'aye ve wo akéva, A YEHOVA,
E zañe meyoñe me bôt été.
M'aye yia wo bia bi ékaña'a e meyoñ été.
- 10 Amu mvame jôé é ne anen é kui e yôb été,
A benya mejôô bôé m'akui e minkut.
- 11 Bo'o mbetane yôp, A Zambe, a dañe yôp !
Etôto'o jôé é tabe'e si se e yôp !

Meye'elane ya ja'é melep mfa'a bikotekot

(Besam 82; EKK 3:16, 17)

Mfa'a Evet mezik : e ébôbôma : Te w'adaman.

Miktam David a bo na be wôé nye.

- 58** 1 Ye mi alôme fo'o mvinda ya jam e ne zôsôô, A mia bezambe ?
Ye mi atyi'i mejô me bone be bôt zôsôô ?
- 2 Kokoo, mi abôndé mbia mefek e minlem été,
Mo menan m'abo évô e si nyô.
- 3 Bikotekote bi bôt bi akobe zen aso mebialé,
B'akob aso mebialé, a kobô minsos.
- 4 Be bili nsu aval ane nsu nyo,
Be ne aval ane ndôndo' akpwe w'adibe melo mé.
- 5 Ajô ete a bo te wô'ô tyiñe befôlô benyo,
Nge atyeñe mfôlô nyo.
- 6 Bu'u mesôñe map, A Zambe, e menyu mab été;
Téé mintye'e mi bone beñbweñbwem, A YEHOVA !
- 7 Kañese'e na be mane jañesan aval ane mendim m'ake e nké,
Aval ane ôbut, kañese'e na be ko'otôban a mebo, a kôt.
- 8 Be bo' aval ane koé j'anyeme a ayôñ,
Aval ane nsolôkane mon ô nga bo te yene jôp.
- 9 Eyoñ vie' ô ngenane te wô'ôtan ayoñe nduane nja'a biyo,
Ja'ane bi bi ne nyumen nge nkabane nduan,
A ye vaseban a ôlende.

- 10 Môt a ne zôsôô a ye vak éyoñ a yen akuna'a :
A ye sôbe mebo mé a metyi bikotekote bi bôt.
- 11 Nalé ate bôt b'aye jô na, Zôsôa môt a bili fo'o meya'an :
E Zambe a tyi'i mejô e si nyô a ne fo'o.

Meye'elane ya ja'é nyian e be besiñ

(1 Sam 19:11; Besam 28; 56; 140)

Mfa'a Evet mezik : e ébôbôma : Te w'andaman.

Miktam David, éyoñe Saul a nga lôme bôt be ba'ale nda jé na be wôé nye.

59

- 1 Nyi'i ma e be besiñe bam, A Zambe wom :
Kame' ma e be ba b'akôlô si a wosane ma.
- 2 Nyi'i ma e be beboabé,
A nyii ma e be bôt b'anye'e be kuli'i metyi.
- 3 Amu, ô lôô, b'ayabe ényiñe jam, miñyôyo'o mi bôt mi atôkane fufulu a wosane ma.
Sa amu ntyaman atiñe wom, nge amu abé dam, A YEHOVA.
- 4 Sa amu évus éziñ é ne énjam, b'ake mimbi a kômesan :
Kôlô'ô si, za'a volô ma, a yen !
- 5 Wo, YEHOVA Zamba minsamba mewosan, ô ne Zamba Israël.
Ve'e na ô ndeñele meyoñe bikule mese;
O bo te liñe wua ya bôt b'abôndé fe'e medu'an. Sélah !
- 6 Ngô'é ése, b'abulane mvus, b'anyé ane bemvu,
B'atyinêlan nlam mbôma'ane.
- 7 Mmbe le b'ake b'akuli avul e menu map;
B'ake b'abañe mesôñ a biyaé biap,
Amu b'asimesane na Za a ye wô'ô bia ?
- 8 Ve wo, A YEHOVA, w'aye woé be;
W'aye bi meyoñe mese fianga.
- 9 A ngule jam, m'aye yia wo bia bi ékaña'a;
Amu wo, A Zambe, ô ne ôleme viam.
- 10 Zambe wom aye tôbane ma a mvame jé;
Zambe wom a ye kañese na me fôn e be besiñe bam.
- 11 Te wôé be, bôte bam be za vuan : Tya'a be a ngule jôé, a sili be si,
A YEHOVA, ébene jam !
- 12 Amu abé ya menu map, a mejô ya biyaé biap,

- Be bili'i e mebune mab été,
Amu biyo'é minsos be nga nkobô.
- 13 Ji'ane be a ayaa,
Ji'ane be akekui be nji beta bo,
Ane bôt b'aye yeme na Zambe nnye a jôô Yakob,
Akekui e susu'a si nyô. Sélah !
- 14 Ngô'é ése b'abulane mvus, b'ake b'anyé ane bemvu,
B'atyinêlan nlam mbôma'ane.
- 15 B'ake b'andên akôé a nké a ja'é bidi,
A tabe ngum alu nge b'abo te jaé.
- 16 Ve m'aye yia ngule jôé bia,
M'aye yia mvame jôé tyiñ ngu mametyé.
Amu ô nto ôleme viam a asoé dam môs m'ayene njuk.
- 17 A ngule jam, m'aye yia wo bia bi ékaña'a,
Amu wo, A Zambe, ô ne ôleme viam.
Zambe, nyô a liti me mvam.

Du amu nkuane ya bita, a meye'elane ya ja'é mvolan

(2 Sam 8 :1-14 ; Besam 44 ; 108 : 7)

Mfa'a Evet mezik : e ébôbôma Shusham Eduth. Miktam David;
ajô ñye'elan, éyoñ a nga wosan Aram-Naharaim, a Aram-Tsoba, a Yôab a nga bulan,
a wôé bôte ya Edom toyini awôm a ébaé e Mbi'ili Nku.

- 60** 1 A Zambe ô maneya bene bia, ô maneya tyame bia;
O yaaya; hôé, va'a bia ngul e minlem.
- 2 O nga fô'ô si, ô saleya fe je :
Saé mimbu'ane ya été; amu j'afô'ôsan.
- 3 O nga bo na bôte bôé be tôbane nju'u mam;
O nyuuya bôte bôé wain a bo bia mekut.
- 4 O teléya nlinga e be ba b'ako wo woñ,
Ane nlinga w'aye kebelan amu benya mejôô. Sélah !
- 5 Nde ete bôte bôé w'anye'e b'aye nyiñ.
Va'a bia ndañan a mbonnôme wôé, a yalane bia !
- 6 Zambe a maneya kobô e nda ntendé jé été,
A mevak, m'aye kandé Sikem a ngab é so'o e Mbi'ili Sukkot.
- 7 Galaad a ne éñwom, a Manassé a ne éñwom ;
Efraim fe e ne ékôngô jam,

- Yuda a ne ntume njôô wom.
- 8 Môab a ne ésua mewobane jam ;
M'aye wua ékôndé jam e Edom :
A Filistia, bete'e tyiñe yôb amu ma.
- 9 Za a ye kee ma e éwôlô nlam éte éte ?
Za a nga lilti ma e Edom :
- 10 Ye ô nji bene bia, a Zambe ?
O nji wulu e minsamba mewosane miangan, A Zambe.
- 11 Va'a bia mvolane ya wosane besiñe bangan,
Amu mvolane môô ô ne momo jôm.
- 12 Amu Zambe bi aye dañe bo ngu,
Amu nnye ate a ne nyô a ye tibi besiñe bangan e si.

Mbulane mba'alane Zambe

(2 Sam 7 :29 ; 17 :22 ; Besam 42 ; 43 ; 63)

Mfa'a Evet mezik : e bibôbôma minsañ.

Sam David.

- 61** 1 Wô'ô ñyône wom, A Zambe;
Vôlô'ô meye'elane mam.
- 2 M'aloene wo me too e susu'a si,
Eyoñ nleme womô te'eya :
Kelee ma e vôm ako'o d'adañe me ôyap e yôp;
- 3 Amu ô ne asoé dam,
Ewôlô ôlem ajô nsiñe wom.
- 4 Bo'o na me tabe e nda ntendé jôé nnôm éto !
Yaa, na me tabe mvo'é e asoé ya mefabe môé si. Sélah !
- 5 Amu wo, A Zambe, ô wô'ôya mintiñetane miam :
O veyá me ngabe ya ba b'ako jôé dôé woñ.
- 6 Bo'o ényíñe njo bôt éyap (ayap ?) ;
Mimbu mié mi langa'an akui miaé mise !
- 7 A tabe' éto njôô nnôm éto asu Zambe ;
Bo'o na mvam a benya mejôô bi mombô nye !
- 8 Nalé m'aye yia jôé dôé bia bi ékaña'a nnôm éto,
Ane me ne ya'ane mintiñetane miam môs ane môs.

Zambe étam a ne vôme ya sobô bôte be njoñ a bekpwe'ele

(2 Sam 15 :13 ; Besam 91 ; 146 ; Min 18 :10 ; Yer 17 : 5-8; Miny 3 : 24-26)

Mfa'a Evet mezik e ébôbôma Yeduthum.

Sam David.

62

- 1 Amu Zambe étam nleme wom w'ayange ô too évô;
E be nye nyiane wom w'aso.
- 2 Nnye étam a ne ako'o dam a nyiane wom, a ôleme viam;
M'aye bo te dañe fô'ôsan.
- 3 Ntaa vé aye vibane môte wua yôp,
Ane mi aye wôé nye , mia bese;
Aval ane mfin ô luu, aval ane aka'a d'andênetan ?
- 4 B'abo ve mefe'e ya sô'ôlô nye si,
A vaa nye éto дума jé ;
B'ayene minsosse mvaé, b'abotan a menyu map ve b'ayo'é e minlem été ; Sélah !
- 5 A nleme wom, yange'e ve Zambe, ô to évô;
Amu ndinleme jam j'aso e be nye.
- 6 Nnye étam a ne ako'o dam a nyiane wom :
A ne ôleme viam : m'aye mbo te fô'ôsan.
- 7 Nyiane wom a étôto'o jam bi ne e be Zambe;
Ngungul ako'o wom, asoé dam e ne Zambe.
- 8 A mia bôt, taba'ane nye mebun biyoñe bise;
Sô'éane minleme mienan asu dé;
Zambe a ne asoé mfa'a wongan. Sélah !
- 9 Bôt be ne e bito ya si be ne fo'o ve mvebe,
A bôt be ne e bito ya yôp be ne minsos :
E minlôt été b'aye bete yôp;
Bese be ne étua éveves ane mvebe.
- 10 Te tabe ndinlem a ñwôlan akum,
Te télé ndinlem mfa'a ya wup; n
Nge akum d'abo abui, te ve nleme wôé été.
- 11 Zambe a kobôya éyoñe jia;
Ve me wô'ôya de biyoñe bibaé
Na, ngul é ne jôme Zambe ;
- 12 A na, A YEHOVA, mvam é ne jôme jôé.
Amu w'aye ya'ane môte ase aval ane ésaé jé é né.

Nlem w'awô'évé w'ajaé e be Zambe

(1 Sam 24 akui 26 ; 2 Sam 15 : 23-28 ; Besam 42 ; 61 ; 84)

Mfa'a Evet mezik : a ébôbôma minsañ.

Sam David.

63

- 1 A Zambe, ô ne Zambe wom, m'ajeñe wo.
Nsisime wom w'awô'ô wo évé;
Minsône miam mi ayi wo vôme si é ne nkôt a nju'an, mendim momo.
- 2 Nalé me nga fombô wo e mfufube nda wôé été,
A yen ngule jôé a étoto'o jôé.
- 3 Amu mvame jôé é ne mvo'é é dañ ényiñ,
Biyae biam bi aye kañe wo
- 4 Nalé m'aye se'e wo nté me vee;
M'aye bete mo mam a loene jôé dôé.
- 5 Nleme wom w'aye jaé di didi (bidi ?) bi bili foñ a avoñ,
A anyu dam d'aye kañ wo a biyaé mevak;
- 6 Eyoñ m'asimesane wo e énoñe jam e yôp,
A simesane wo e nlem e memombô ya a alu se.
- 7 Amu ô nga too mvolane wom,
M'aye vak e éjijine ya mefabe môé si.
- 8 Nleme wom ô tii e be wo :
Mboonôme wôé w'aye bete ma e yôp.
- 9 Ve ba b'ajeñe na be jiane nsisime wom,
B'aye ke ôyap e bido'o bi si été;
- 10 B'aye veban mfa'a ya ngul nkpwaté mekôn,
B'aye bo ngap bemvak.
- 11 Ve njô bôt a ye vak e be Zambe;
Ba bese b'akalane nye b'aye wum;
Amu anyu bekobô minsos d'aye diban.

Meye'elane ya jaé mba'alan e be besiñ be solô

(Besam 7; 10; 12; 28; 58; 140)

Mfa'a Evet mezik. Sam David.

64

- 1 Wô'ô tyiñe jam, A Zambe, ane m'ayôn :
Ba'ale ényiñe jam, amu woñ m'ako nsiñe wom,
- 2 Solé'é ma e be nsolane fe'e mô't a ne ékotekot, ajô zô'é beboabé ;

- 3 Ba b'ajeb ayeme dab aval ane fansõñ ;
Ba b'asõñ ayõle mejô aval ane bilaé,
- 4 Ane b'aye lum mvômvo'é e asoé :
B'aye wua nye a temetem, a bo te ko woñ.
- 5 Be na mban a mbia fe'e wop ;
B'abôndé fe'e ya ya bikoé e asoé ;
B'asimesane be jô'ô na, Za a ye yene bia ?
- 6 Za a ne ngule ya kulan mbia be mam bangan ?
Bi maneya bôndé fe' atyeñ,
Amu fe'e ya nlô a nleme môl é ne édok !
- 7 Ve Zambe a ye wua be élaé jé;
B'aye balé aveñ a temetem.
- 8 Amu ayeme dap a ye be mane jian;
Ba bese b'ayene be b'aye fô'ô minlô miap.
- 9 Wôna bôte bese b'aye ko woñ;
B'aye kañiete mboane Zambe;
B'aye simesane fe'e mboane jé.
- 10 Bezôsôô be tame vak e be YEHOVA a sobô e be nye !
Ba bese be ne zôsôô e minlem be tame wum !

Abui mvame Zambe mfa'a ya si a bôt

(Deut 12 :5-12 ; Besam 132 :13-16 ; 144 : 13 ; 147)

Mfa'a Evet mezik. Sam David. Jia.

- 65** 1 A Zambe, ékaña'a j'ayiane wo e Siôn ;
Mintiñetan mi ayiane boban e be wo,
- 2 A wo, nyô a wô'ô meye'elan ! Nsôn ôse w'aye zu e be wo,
3 Amu ajô mam abé.
Eyoñ mintyamane metiñ mi adañe bia ngu,
Wo w'aye jamé mie.
- 4 Ebotan a nyô a nga top, a dutu nye bebé na, a tabe'e e bitune menda biôé été !
Bi aye jaé a mbamba be mam ya nda jôé, mfufube tempele wôé !
- 5 W'ayalane bia a beangôndô mimboane ya nkôtane wôé,
A Zambe ya nyiane wongan,
Wo ô ne ndinlem ya meku'u mese ya si nyô,
A ba be ne ôyab e mañ été;

- 6 Wo ô nga telé minkôl a ngule jôé,
O too njalan ases a ngule jôé.
- 7 Nyô a tooé ndume mañ évô,
Ndume ya mintyôa mié a zô'é meyoñ.
- 8 Nalé fe ba be too e meku'u me si b'ako mendeme môé woñ;
W'ave avak mfa'a jôp d'atôô mametyé a mfa'a d'adim mamengô'é.
- 9 W'ajome si, a ve je mendim,
W'adañe ve je biôm abui ;
Osôé Zambe ô ne mendim ne lut ;
Wo w'ave be mvoñe jap amu nalé ô nga kôme si.
- 10 W'asôé mendim abui e mintyetya'a, a senane bikôndôk,
W'abo je nte'an a mveñ, a botane meyaé me biôme bié.
- 11 W'ajalé mbu a ékate ya afo'o dôé,
A mezene môé m'alene mevoñ.
- 12 Miñyanebe ya fé mi asôéban mendim,
A minkôle mi be'e avak aval ane ases :
- 13 Miñyanebe mi ajaé a mimbam biyem;
A mibi'ili fe mi nto mbutan a fôn,
Mise mi aloñe bityi'a a yia bia mevak.

Ekaña'a amu beta mimboane mi Zambe a ñyalane meye'elane wé

(2 Mink 32:20-23; Esd 8:21-23, 31-35; Besam113; 114; 116; 124)

Mfa'a Evet mezik. Jia. Sam.

66

- 1 Sôane Zambe a sô'é mevak, si nyô ése.
- 2 Yi'an étôto'o jé bia ;
va'ane nye ékaña'a ôlu'u !
- 3 Jô'ô Zambe na, Za aka'a angôndô mimboane miôé mi né !
- 4 Si ése j'aye kañe wo ;
J'aye yia wo bia bi ékaña'a,
J'aye yia jôé dôé bia bi ékaña'a. Sélah !
- 5 Za'a yenane mam Zambe a maneya bo :
A ne angôndô e mimboane mié ya zañe bôt.
- 6 A nga kôñelane mañ me bo nkôte si ;
Bôt be nga dañ ôsôé a mebo :
Vôm ate bi nga vak e be nye.
- 7 Nyô a jôô a ngule jé nnôm éto,

- Nyô mise mé m'afombô meyoñe me bôt :
 Bôte metyama'ane be bo'o te bete bebiene yôp. Sêlah !
- 8 Tameka botane Zambe wongan, mia meyoñe me bôt,
 A bo'ane na tyiñe ya ékaña'a jé é wô'é;
- 9 Nyô a nga ba'ale bia e zañe bevevee,
 A bo te kañese na mebo mangan me sendé.
- 10 Amu wo, A Zambe, ô nga ve'ele bia,
 O nga tume bia aval ane silba a tumban.
- 11 O nga kee bia e avot été;
 O nga beté bia adite mbe'e e mimvi'i.
- 12 O nga bo na bôt be wulu bia e minlô yôp;
 Bi nga lô e nduan e mendim été;
 Ve ô nga vaa bia a kee bia e vôm a ne ndam.
- 13 M'aye zu e nda jôé me bili mimvean b'adi'i,
 M'aye ya'ane wo mintiñetane miam.
- 14 Mmie mite biyaé biam bi nga tot,
 A anyu dam e nga tiñeti, éyoñ me nga yene njuk.
- 15 M'aye ve wo mimveane b'adi'i, mi ne betite mevoñ,
 Mfulan a ôtita beyôm mintômba;
 M'aye tyi'i beyôm binyaka a bikela. Sêlah !
- 16 Zaka wô'an, mia bese mi ako Zambe woñ,
 A m'aye kañete jam a boya nleme wom.
- 17 Me nga yôn a loene nye tyiñe yôp,
 Ane a nga nyoñ ôlu'u ya ôyeme viam.
- 18 Nge me nga ye bôndé mbia jam e nleme wom été,
 YEHOVA, a nga ye bo te vô'ôlô ;
- 19 Ve bebela na Zambe a nga vô'ôlô;
 A nga vô'ôlô tyiñe meye'elane mam.
- 20 Zambe a bo' ébotan,
 Nyô a nga bo te bene meye'elane mam,
 Nge vaa mvame jé e be ma.

Meyoñ m'alebane na me kañe Zambe

(Met 12:2, 3; Besam 96; 98; Luk 2:25-32; Rôm 15:8-12)

Mfa'a Evet mezik : a bibôbôma minsañ.

Sam. Jia.

67 1 Zambe, ko bia éngôngo, a botane bia,

A bo' asu dé na e faé e be bia. Sêlah !

- 2 Nde zene jôé b'aye yeme je e si nyô,
Nyiane wôé e meyoñe mese été.
- 3 Meyoñe me bôt mese me kañe' wo, A Zambe;
Meyoñe me bôte mese me kañe' wo.
- 4 Meyoñe me bôt me tama ke yen mvaé, a yia bia amu avak;
Amu w'aye tyi'i meyoñe me bôt mejô zôsôô,
A jôô meyoñ e si nyô. Sélah !
- 5 Meyoñe me bôt me kañe' wo, A Zambe;
Meyoñe me bôte mese me kañe' wo.
- 6 Si é nga wum bibuma bié;
Zambe, Zambe wongan a maneya botane bia.
- 7 Zambe a maneya botane bia ;
Meku'u mese ya si nyô me tame ko nye woñ.

YEHOVA Zambe ya Sinai a nda ntendé

(Bety 5 :2 ; Sam 10 :15-19 ; Besam 24 ; 47 ; Ef 4 :7-13)

Mfa'a Evet mezik : a bibôma minsañ.

Sam. Jia.

- 68** 1 Zambe a kôlô'ô si, besiñe bé be tyamela'an;
Ba fe b'asiñe nye be mate' asu dé.
- 2 Aval ane ôtita vi avas, nalé ate va'a be;
Aval ane éko j'anyeme e mfôme nduan,
Nalé ate bikotekote bi bôt bi jañe' asu Zambe.
- 3 Ve besôzôô be bôt be va'ak;
Be tame tyele si asu Zambe;
Be tame kute fas a mevak !
- 4 Yi'ane Zambe bia, yi'ane jôé dé bia bi ékaéna'a :
Fa'ane nyô a ke a wulu a fé été mfaka;
Jôé dé e ne YEHOVA; mi kutane fas asu dé.
- 5 Esaa bobenyui, a nkale minkus,
A ne Zambe a too e mfufub étaba'a wé été.
- 6 Zambe a tooé ntote mô̄t e menda me bôt été :
A suu mimbôk mi kelek a mefok ;
Ve bôte metyama'ane be to e si é ne nkôt.
- 7 A Zambe, éyoñ ô nga bo ô wulu'u bôte bôé ôsu,
Eyoñ ô nga tulane nkôte si. Sélah !

- 8 Si é nga fô'ôsan,
Yôbe fe e nga noo mveñ asu Zambe;
Sinai nyôlé a nga fô'ôsan asu Zambe, Zambe Israël.
- 9 Wo, A Zambe, ô nga lôm abui mveñ,
O nga ve ngabe jôé ngu éyoñ é mbe atek.
- 10 Nkunda bôte wôé ô nga yen étaba' été :
Wo, A Zambe, ô nga mvamane mimbubua mi bôt a mvame jôé.
- 11 YEHOVA a ve mvinda; beta nkunda bôt a nga kate mbamba foé.
- 12 Bejôô ya minsamba mewosan b'amate, b'amate;
Binga ya ja b'akabane biôm bi nsa.
- 13 Eyoñ be bôô e zañe mebemba mintômba,
Mefap me zum me ne ñyañan a silba,
A mefabe mé me ne ñyañan a évele gôlt.
- 14 Eyoñ Nyô A ne Ngul Ese a nga tyamelane bejô bôt,
Efumulu mfôô ane sut é nga ku e Tsalmôn.
- 15 A ngungul nkôl, Nkôle Basan,
A nkôl abui mebôbôn, Nkôle Basan.
- 16 Mi afombô a mise minyamete a jé,
A nkôl abui mebôbôn,
Nkôle Zambe a nga kômbô bo étaba'a jé,
Yaa, vôme YEHOVA a ye tabe nnôm éto ?
- 17 A mingungule bikalik, betoyini awôm biyoñe bibaé,
Betoyini betoyini,
YEHOVA a nga so e Nkôle Sinai, a kui e mfufube wôm wé.
- 18 O nga bete nkôl ô ne ôyabe yôp,
O kele a minkôm e nsamba wôé,
O nyoñe mimvean e be bôt,
Ja'ana e be bôte metyama'ane,
Ane YEHOVA a ye tabe été.
- 19 YEHOVA a bo' ébotan, nyô a be'e bia yôp môs ôse ;
Zambe a ne nyiane wongan. Sélah !
- 20 Zambe wongan a ne Zamba nyian;
E be Zambe, YEHOVA, nkôtane ya awu ô ne jôme jé.
- 21 Ve Zambe a ye tya'a minlô besiñe bé,
Ozomezome nlô ésile môt a wulu e mezene mekua mé été.
- 22 YEHOVA a nga jô na, m'aye beta bulane be be so'o e Basan,
M'aye beta bulane be be so'o e bido'o bi mañ;
- 23 Nalé w'aye dup mebo môé e metyi été,

- Nalé ayeme bemvu bôé d'aye bi ngabe jap e be besiñe bôé.
- 24 Mulu minsamba miôé me maneya yené, A Zambe;
Mulu minsamba mi Zambe wom, Njôô wom, éyoñ a nga bo akele e mfufube vôme wé.
- 25 Beyia bia be kele ôsu, bebôme biôm be tôñe mvus,
Ezezañe jap, bengone be binga be bôm mengom :
- 26 Mi kañe Zambe e bikôan été,
Kañane YEHOVA, mia mi ne ba be ya anjeñ Israël !
- 27 Vôm ate ôyôme Benyamin njôô wop, a né mfa'a ya nsamba,
Bone bejô bôt be Yuda mfa'a ya nsamba wop,
Bone bejô bôt be Zabolôn, bone bejô be Nafthali,
- 28 Jô'ô ngule jôé, A Zambe,
Liti'i ngule jôé, A Zambe, mfa'a ya jam ô nga bo bia.
- 29 Amu tempele wôé ya Yérusalem,
Bejô bôt b'aye zuu mimvean e be wo.
- 30 Bame'e tite ya fé é to e nkaé été,
Nsamba beyôm binyaka, a bitoñe binyika ya meyoñe me bôt,
Tibi'i ba b'anyamete bifase bi silba e mebo si;
Tyamela'ane meyoñe me bôt m'anye'e bita.
- 31 Mvot é so'ok e Egipten;
Ethiôpia a jika'a sam mo mé e be Zambe.
- 32 Yi'iane Zambe bia, A mia bijôé ya si nyô;
Yi'ane YEHOVA bia bi ékaña'a. Sélah !
- 33 E be nyô a wulu e yôb été, yôbe ya nnôm éto;
Tame yen a lôme tyiñe jé, éwôlô tyiñ.
- 34 Va'ane Zambe duma;
Nyô étôto'o é ne Israël e yôp,
A ngule jé é ne e miñyeme ya yôb été.
- 35 Zambe a ne angôndô e nda ntendé jé été, Zambe Israël,
A ve bôte bé ngul a éwôlô.
Zambe a bo' ébotan.

Nyôn amu minaté (*mintáé ?*), biyo'é ya besiñ

(Besam 22 ; 40 ; 109 ; Luk 24 : 26 ; I Pét 1 :10, 11)

Mfa'a Evet mezik : ane ébôbôma sam Lili.

Sam David.

1 Nyi'i ma, A Zambe !

Amu mendim me zuya me kui e nné tyiñ.

2 M'adimesan édo'o ndobo' été,

Vôm a ne te ke atebe :

Me kuiya e édo'o mendim été,

Vôm ndôn j'ayandane ma e yôp.

3 Me nto atek a ñyône wom ;

Tyiñe jam é nto ntanan;

Mis m'adime ma a ñyangan m'ayange Zambe wom.

4 Ba b'avini ma te étom be ne abui be dañ ésile ya nlô wom ;

Ba be nga ye jiane ma, b'avini ma évinivini, ba b'alumane ma a minsos ;

Jôm me nga bo te nyoñ, m'aya'ane je.

5 A Zambe, w'ayem asu'u dam;

Bivus me nga bo bi nji bo wo nsolan.

6 Te kañese na ba b'abuni wo be veban ôson amu ma,

A YEHOVA, Zamba minsamba mewosan,

Te kañse na, ba b'ajeñe wo be wô' ôson amu ma,

A Zambe ya Israël.

7 Amu na, amu ajô dôé me jibiya ékpwe'ele;

Oson ô butiya ma asu.

8 Me nto mô t bobejañ be ne te yem,

A njin e be bone be nyia wom.

9 Amu nyanan m'anyane nda jôé ô jianeya ma;

A meta ba b'ata wo me kuiya e be ma.

10 Eyoñ me nga yi a ndeñele nsisime wom a mbômbane zaé,

A nto me jam minkomekan.

11 Eyoñ me nga bo nkuta ngômesane jam,

Me nto jôme nkana mfa'a wop.

12 Ba be too e mbé yôp b'akobô ajô dam;

A me nto jia benyu bilam.

13 Ve mfa'a wom, meye'elane mam me ne e be wo, A YEHOVA.

Eyoñ j'ayian, A Zambe,

Amu abui mvame dôé, yala'ane ma.

14 A mvolane wôé ya buni, nyi'i ma,

Me za nyoñ e ndobo' été;

Nyi'i ma e be besiñe bam,

A vaa ma e édo'o mendim été.

- 15 Te kañese na ndôn é yandane ma e yôp,
Nge kañese ne édo'o mañ é mine ma;
Nge kañese na ébé é dibe ma anyu dé yôp.
- 16 Yala'ane ma, A YEHOVA, amu mvame jôé é ne mvaé :
Aval ane abui nkoan éngôngole dôé e né, kôñela'an e be ma ;
- 17 Te solé mboésané wôé asu dôé ;
Amu me tele e nju' été ; yala'ane ma avô.
- 18 Subu'u ma bebé, a kôté ma,
Telé' é ma nti mfa'a besiñe bam !
- 19 W'ayem bijô biam, ôsone wom a nyé jam ;
W'ayem besiñe bam bese.
- 20 Meta me tya'aya ma nlem,
Nde me nto fe'e njañan.
M'ajeñe mô't a ko ma éngôngo, te ke mô't ;
Bôt be ne volô ma nlem, be be nji bo.
- 21 Be nga ve ma nsu aval ane bidi,
Mfa'a ya évé jam, be nga viane me ve sañe wain na me nyu.
- 22 Tawôlô wob a bo'o be ékoé ôsu viap,
Bidi metuna'a biap bi bo'o be ôlam.
- 23 Mise map me bo'o dibi na be bo te yen;
A mengeteñe map me nyeñeba'ane kom ése.
- 24 Sô'é be ayaa dôé e nyô,
A ayôñ ayaa dôé e ko'ane be.
- 25 Etaba'a jap é bo'o bilik,
Mô't a bô'o te tabe e bentendé bap.
- 26 Amu b'akpwe'ele nyô ô nga bibi a nyô ô nga ba'é meveñ,
Nnye b'abulu dañe ve ôlun.
- 27 Kô'ôlane be éndeñela' a éndeñela'a.
Be bo'o te yene jôme ya kôtéban a je e be wo.
- 28 Be tyamba'an e kalate bevevee été ;
Be bo'o te tiliban baa bezôsôô be bôt.
- 29 Ve me bili ôlun a mintané;
Nyiane wôé, A Zambe, ô to'é ma mfa'a ya yôp.
- 30 M'aye kañe jôé Zambe a jia;
M'aye wumulu nye a mvean akéva.
- 31 Jame di nde YEHOVA a ye' dañe yen mvaé adañe mia' ényaka,
Nge nnôm ényaka a nee minlak a bibo'os.
- 32 Bewu' ékpwe'ele be yene de, a wô'ô mvaé,

- Mia bôt mi ajeñe Zambe, minleme mienan mi bo'o ngu.
- 33 Amu YEHOVA a vô'ôlô mimbubua,
A ne te biasé mimbô'ô mié mi fete.
- 34 Yôb a si, kañane nye,
Mañ a jôm ése j'awulu été.
- 35 Amu Zambe a ye nyii Siôn,
A beta lôñe minlam mi Yuda;
A bebobisaé bé b'aye tabe été a binga bap.
- 36 Bone bebobisaé bé b'aye nyoñe ngab été,
A ba b'anye'e jôé dé b'aye tabe été.

Meye'elane ya ja'é mvolan amu ékpwe'ele

(Besam 13 ; 35 :19-28 ; 40 :14-18)

Mfa'a Evet mezik : Sam David, mveane ya ôsimesan.

70

- 1 Kañese'e, A Zambe, na ô nyii ma !
A YEHOVA, bo' avôle ya volô ma !
- 2 Kañese'e na, be veban ôsone nyô a jañe fek, ba b'ajeñ ényiiñe jam !
Be bula'ane mvus a wô' ôson,
Ba b'ayen mvaé ane m'ayen abé !
- 3 Be bula'ane mvus amu ôsone viap,
Ba b'ajô na, Eñhee, eñhee !
- 4 Ba bese b'ajeñe wo be va'ak,
A yen mvaé e be wo !
Ba b'anye'e nyiane wôé be jô' éyoñ ése na,
Zambe a bo'o duma.
- 5 Ve me ne nzôzoé a ôsame ;
Bo' avôle ya zu, A Zambe :
O ne mvolane wom a Nyii wom, A YEHOVA, te langan !

Meye'elane me nnôme mô't w'aja'é mvolan

(2 Sam 17 ; Besam 31 ; 55 akui 57 ; 70)

71

- 1 A YEHOVA, m'asobô e be wo;
Te kañese na, me veban ôsone nyô ne tya !
- 2 A zôsô wôé, nyi'i ma a kôté ma :

- Tame kee alo dôé e be ma, a nyii ma.
- 3 Bo'o ma ako'o m'asobô été,
Ewôlô ôleme j'anyii ma,
Amu ô ne ako'o dam a ôleme viam.
- 4 Kôté'é ma, A Zambe wom, a vaa ma e mo me mbia mô, t,
Mfa'a ya mô, t a ne ôkotekot a njet.
- 5 Amu, A YEHOVA, ô ne ndinleme jam,
Éto mebune jam, A YEHOVA, aso mongô.
- 6 Me nga ye'ebe e be wo aso abialé dam : wo ô nga vaa ma me so'o e abume nane:
Ekaña'a jam éne e be wo éyoñ ése.
- 7 Me nto ane éye'ane mô, t be e bôt abui;
Ve wo ô ne éwôlô ôleme jam.
- 8 Anyu dam d'aye jaé ne lut a ékaña'a jôé,
A дума dôé môs ôse.
- 9 Te wua ma fé éyoñ me nto nnôm ;
Te li'i ma éyoñ ngule jam j'aman.
- 10 Amu besiñe bam b'atote ma ;
Ba b'amombô nsisime wom, b'abôndane mefe'e fufulu.
- 11 A jô na, Zambe a li'iy a nye :
Tita'ane nye a biane nye ;
Amu mô, t e ya nyii nye a ne momo.
- 12 A Zambe, te tabe ma ôyap ;
A Zambe wom, bo' avôle ya volô ma.
- 13 Kañese'e na, be veban ôsone nyô a jañ,
Ba be ne besiñe be nsisime wom;
Jalé'é be a ékpwe'ele a ôson,
Ba b'ajeñe zene ya bo ma abé.
- 14 Ve m'aye tabe ndinlem kom ése,
A m'aye dañe bulu kañe wo.
- 15 Anyu dam d'aye kañete bezôsô mimboane bôé,
Ajô mimboane ya nyiane wôé môs ôse,
Amu tañe jap j'adañ ñyemane wom.
- 16 M'aye zu a biwôlô miboane mi YEHOVA Zambe :
M'aye wumulu zôsô wôé, ve éñwôé étam.
- 17 A Zambe, ô ye'eleya ma aso mongô ;
A azukui éyoñe ji, me nga kañete bitua bi mam biôé.
- 18 Yaa, ja'an éyoñe me nto nnôm a nyub e nlô,
A Zambe, te li'i ma,

- Akekui m'amane kañete foé ya ngule jôé e miaé mise mi azu.
- 19 Ngule jôé a zôsôô wôé, A Zambe,
Bi akui ôyab e yôb été ;
Wo, ô ne nyô a nga bo beta be mam,
A Zambe, za a ne aval ane wo ?
- 20
Wo ô nga liti ma abui mbia minjuk,
W'aye beta ve ma ngul e nlem,
A w'aye beta nyoñe ma me so'o e bido'o ya si nyô.
- 21 W'aye nene duma dam, a beta volô ma nlem.
- 22 M'aye fe kañe wo a mvet,
Amu fulu jôé ya buni, A Zambe wom,
M'aye yia wo bia bi ékaña'a a éngombé,
A wo, Mfufub ya Israël.
- 23 Biyaé biam bi aye tôlan a mevak,
Eyoñ m'ayia wo bia bi ékaña'a;
A nsisime wome fe, ñwô ô nga kôté.
- 24 Oyeme viame fe vi aye kobô ajô zôsôa mvolane wôé ngum nté môs;
Amu be maneya veban ôsone nyô a bo fe'e ne vema,
Ba b'ajeñe zene ya bo ma abé.

Njôane Zôsôa Njô Bôt

(1 Bejôô 3:5-14; 4:20-25; Yes 9:5, 6; 11:1, 65:16-25; Yér 23:5, 6;
Zak 9: 9, 10; Luk 1:31-33, 68-75)

- 72** 1 Va'a Njô bôt zôsôa ntyi'ane mejô, A Zambe,
A zôsôô wôé e be mona njô bôt !
- 2 A Tame tyi'i bôte bôé mejô zôsôô,
Nalé fe minzôzoé miôé a zôsôa ntyi'an !
- 3 Beta minkôl mi wumu bôte bôé mefok;
A bone minkôl, a zôsôô wôé !
- 4 A ye kam ajô nzôzoé ya bôte bôé,
A ye bo nkôtan mfa'a mimbubua, afit ñkpwe'ele bôt!
- 5 A tame nyiñ nté jôp d'alangan,
Nalé fe, nté ngon é tele akekui miaé mise !
- 6 A ye sus ntyi'ane bilo'o yôp aval ane mveñ,
Aval ane mveñ ôkôs j'ave si mendim !

- 7 Zôsôô a bu'uban éyoñ melu jé,
Nalé fe mvo'é é fôék akekui ngon j'aye bo momo !
- 8 A jô'ô fe ataté mañ akekui mañ,
A ataté Osôé ôte akekui susu'a ya si nyô !
- 9 Besiñe bé be kumbu'u si asu dé,
A minziziñe mié mi aye nyiane mbuluk !
- 10 Bejô bôte ya Tarsis a ba ya bikôte bi mañ,
Be yaka'ane nye tas,
A bejô bôte ya Saba b'aye ve biôm.
- 11 Ya, bejô bôte bese b'aye ku si asu dé;
Meyoñe me bôte mese m'aye bo nye ésaé.
- 12 Amu a ye nyii mbubua éyoñ a loen,
A môô a ne nzôzoé, nyô a nji bi myolô.
- 13 A ye ko ntetek a mbubua, éngôngo,
A ye nyii minsisim mimbubua.
- 14 A ye kôte minsisime miap mfa'a ya ékpwe'ele a évô;
A metyi map m'aye bo ényan e mise mé.
- 15 A nyiñik ayap,
Gôlt ya Séba a veba'ane e be nye ! Be bo'o meye'elan amu ajô dé kom ése,
Be tote bibotan amu ajô dé éyoñ ése !
- 16 Abui fôn e bo'o si nyô;
Ja'ana e mebôbône minkôle yôp j'aye fô'ôsan;
Bibuma bié bibo' aval ane Liban;
A bôte ya minlam b'aye bu'uban aval ane ôbute ya mefub !
- 17 Jôé dé d'aye langan nnôm éto,
Duma dé e kel ôsu nté jôb e tele !
Bôt be bota'ane bebien amu nye,
Meyoñe me bôte mese m'aye loene nye ébotan !
- 18 Ebotan é bo'o YEHOVA Zambe, Zamba Israël,
Nyô étam a bo bitua bi mam !
- 19 Etôto'o jôé jé é bo' ébotan nnôm éto !
Si ése é bo'o njalan a duma dé !
Amen a Amen !
- 20 Meye'elane me David, mon Isai, me maneya.

KALATE LALE

Asu'ulane bikotekot d'ave'ane di bezôsô

(Besam 37 ; 49 ; Yér 12 :1 ; 2 ; Yôh 13 :7)

Sam Asaf.

73

- 1 Zambe a ne mvo'é a Israël,
Nalé fe a bôt be ne mfubane minlem.
- 2 Ve mfa'a wom, mebo mam me mbe bebé ya kopetan;
Metele mebo mam me nga to bebé ya sendé.
- 3 Amu me nga nyamete bôt be ne mebun,
Eyoñ me nga yen nnenane bikotekote bi bôt.
- 4 Amu be nji bi mintae mi éziñ ya awu,
Menyôle map ve mvo'é a avem.
- 5 Be nji yen njuk aval ane bôte befe;
Nalé fe be nji biban a bibubua aval ane bôte befe.
- 6 Ajô ete, mebun me ne ngôkobô ya tyiñe jap ;
Evô j'abuti be aval ane ngômesan.
- 7 Mise map m'asoé a avoñ :
Minleme miap mi afuluku mam m'akut.
- 8 B'akpwe'ele a kobô a mbia nlem,
B'akobô bivuvu'u bifia a ka'a bôt melep.
- 9 B'atelé menyu map mfa'a ya yôp,
A ôyeme viap vi awulu e si nyô.
- 10 Ajô ete, bôt b'akoñelan a kañe be;
A be ne te yen abé éziñ e be be.
- 11 Nde b'ajô na, Zambe a yem aya ?
Ye ñiyemane mam ô ne e be Nyô a Dañe Mbetane Yôp ?
- 12 Tame yen, bikotekote bi bôte bi;
Be to mvo'é éyoñ ése, b'anen mfa'a ya akum.
- 13 Me nga tune fo'o nleme wom e zesé, a sôbe mo mam me ne te bijô ;
- 14 Amu me nga biban a bibubua ngum nté môs,
Me nga bômban tyé ése ?
- 15 Nge me nga ye jô na, M'aye kobô nalé ;
Ve me nga ye du'u miaé mi bone bôé.
- 16 Ve éyoñ me nga simesan ane m'aye yeme jame di,
A nga yené e be ma ane zesé nju' ésaé.
- 17 Akekui me nga kui e mfufube nda Zambe ;
Nde me nga yem asu'ulane dap.
- 18 W'atelé fo'o be vôm a ne asen ;
W'asô'ôlô be si be ku mfa'a ya njañan.

- 19 Ngo'o be jañeya été été !
Be jañeya ne meñ a beangôndô be mam !
- 20 Be ne aval ane biyeyem éyoñ mô't a vee ôyo,
Eyoñ w'avee, A YEHOVA, w'aye biasé éve'ela'a jap.
- 21 Eyoñ nsisime wom ô nga bo ayô,
Ane me nga tya'aban e nelm.
- 22 Me nga bo asuk a ndiman,
Me nga bo ane tit mfa'a wôé.
- 23 Akôsabo nalé, me to e be wo éyoñ ése;
Wo, w'abi mbonnôme wom.
- 24 W'aye wulu ma a fe'e jôé,
A éyoñ éte, w'aye nyoñe ma vôme ya дума.
- 25 Za me bili yôb éte, ve wo ?
A te ke mô't a ne si nyô, nyô m'akômbô, ve wo.
- 26 Minsône miam a nleme wom, bi ne jemban,
Ve Zambe a ne ngule ya nleme wom a ngabe jam nnôm éto.
- 27 Amu na , tame yen, ba be ne wo ôyap b'aye jañ :
W'ajiane ba bese b'abo bijabô ya kôlô e be wo.
- 28 Ve a ne mvaé mfa'a wome na, me subu Zambe bebé;
Me boya YEHOVA Zambe wom vôm'm'asobô,
Ane m'aye kañete ajô ya mimboane miôé mise.

Nyôn amu besiñ benga sa si

(2 Mink 36 :19 ; 20 ; Besam 79 ; Yes 64 :8 ; Yér 39 :10 ; Miny 1 akui 4)
Maskil Asaf.

- 74** 1 A Zambe, amu jé w'awua bia e fé nnôm éto ?
Amu jé ayaa dôé d'ayôñ e nyôle mintômba ya ñyanebe wôé ?
- 2 Simesa'an ékôane bôte jôé, nje ô nga nyôñ melu kôa;
Nje éte ô nga kôté e bo étunga bôte ya ngabe jôé;
Simesa'an Nkôle Siôn, vôm ô nga too.
- 3 Tél'é mebo môé ô ke e bili'i ya nnôm éto;
Nziziñ ô maneya ndamane jôm ése e mfufube nda wôé !
Besiñe bôé b'abam ézezañ mfufube vôme wôé;
Be maneya telé minlinga miap ane mendeme map.
- 5 B'afunan ane bôt b'abete avôn e yôp,
A ba'é vôm bilé bi ne afip.

- 6 A éyoñe ji minkpwelane mi biôm mise,
B'abôé mie a ôvôn a akuta'a.
- 7 Be bo'éya mfufube nda wôé nduan;
Be biaséya étaba'a ya jôé dôé akui si.
- 8 Be nga jô e minleme miab été na,
Bi tame ndamane be ne meñ :
Be maneya di'i be vôm bese ya bisulane mfa'a ya si éte.
- 9 Bi nji yene mendeme mangan :
Nkulemejô éziñ a nji fe bo ;
Nalé fe te ke môte ya be bia a yem nté.
- 10 Ntaa vé, A Zambe, besiñe b'aye kpwe'ele ?
Ye besiñ b'aye kobô jôé dôé ébiasé nnôm éto ?
- 11 Amu jé w'adutu mbonnôme wôé e mvus,
Va'a wô e tôé jôé a jiane be.
- 12 Ve Zambe a ne Njô bôte wom aso nnôm éto,
A bo'o nyian ézezañe ya si nyô.
- 13 O nga kandé mañ a ngule jôé;
O nga tya'a minlô bedragon be to e mendim été.
- 14 O nga bôé minlô mi zo'omañ,
O nga ve nye ane bidi bikôkôma bi to e nkôte si éte.
- 15 O nga fa'a menjeñ a atôñ ;
O nga kôtô atôñ e nga bo e lôtok kom ése.
- 16 Môs ô ne éñwôé, alu fe e ne éndôé ;
O nga télé bifufub a jôp.
- 17 O nga tyi'i minné mise ya si nyô ;
O nga bo éseb a ôyôn.
- 18 Simesa'ane jame di, A YEHOVA, aval ane nsiñ a kpwe'ele ana,
Mvimvin ayon w'akôme biasé jôé dôé.
- 19 Te ve tite ya fé nsisime zume jôé :
Te vuan ényiñe bingôngole bi bôte bôé nnôm éto.
- 20 Simesa'an élate jôé ;
Amu vôm a ne dibi e si nyô a nto njalan a bito ya évô.
- 21 Te kañese na, môat a tya'abane si a veban ôsone nyô ;
Kañese'e na minzôzoé a mimbubua mi kañe jôé dôé.
- 22 Kôlô'ô si, A Zambe, kobô'ô ajô dôé womien ;
Simesa'an ane mvimvine môat w'akpwe'ele wo ngum nté môs !
- 23 Te vuane tyiñe besiñe bôé,
Zô'é bôte b'asengane wo j'abet e yôp kom ése !

Zambe a sili bôte mebun e si, ve a beté bezôsôô e yôp

(I Sam 2 :1-10 ; 2 Bejôô 19 :19-37 ; Besam76)

Mfa'a Evet mezik : e bibôbôma : Te w'ajian.

Sam Asaf. Jia.

75

1 Bi ave wo akéva, A Zambe;

Bi ave akéva.

Bi aloene jôé dôé, a kañete bitua mimboane biôé.

2 Eyoñ me nga telé,

M'aye tyi'i mejô zôsôô.

3 Eyoñe si j'afô'ôsan, a bôte bese ya été,

Ma m'akale mekône ya été. Sélah !

4 M'ajô bôte mebun na, Te boane mebun,

A bikotekote bi bôte na, Te betan nla'a e yôp.

5 Te betan nla'a wonan ôyab e yôp,

Nge kobane tyiñ élañ.

6 Amu sa mfa' a jôp d'atôô,

Nge mfa'a jôp d'adim,

Sa ke mfa'a ya nté, ñwô mbetane yôp w'aso.

7 Ve Zambe nnye a bo ntyi'ane mejô :

A suu wua si, a bete nyô mbo'o yôp.

8 Amu kob é ne e wo YEHOVA été,

A wain a kui avu, mbamlba mfu'an ;

Nne a sôé nye éte, a bikotekote ya si nyô, bi aye nyu je akui ébitik.

9 Ve m'aye va'a melu mese,

M'aye yia Zambe Yakob bia bi ékaña'a.

10 A ye bu'u minla'a bikotekote bi bôt ;

Ve minla'a mi bôt be ne besôsôô mi aye beteban e yôp.

Ngul ndañan Zamba Yakob

(2 Bejôô 19 :19-37 ; Besam 46 ; 75)

Mfa'a Evet mezik : a bibôbôma minsañ.

Sam Asaf. Jia.

76

1 B'ayeme Zambe e Yuda été ;

Jôé dé e ne éwôlô e Israël été.

2 Etaba'a jé é nga telébane fe e Salem,

- A éto jé é ne e Siôn.
- 3 Vôm ate a nga bu'u mekoñ me élaé,
Eben, a fansoñ, a mewosan. Sélah !
- 4 O ne дума a étôtok,
A dañe beta minkôle mi bili betite b'abi.
- 5 Bôt be ne ayo'o minlem akume dap e nga saban;
Be keya ôyo viap;
Bôte mewosane bese be nji bi ngule ya belan a mo map.
- 6 Amu mvam ô nga bam, A Zamba Yakob,
Ñwulu baa ékabela bebaane, be keya ôyo mbim.
- 7 Ve wo, ô ne angônda mô !
Za a ne ngule ya tebe asu dôé, éyoñ ayaa dôé e valéya si ?
- 8 Aso e yôp, ô nga bendé ntyi'ane mejô ;
Si é nga ko woñ a ku évô,
- 9 Eyoñe Zambe a nga tebe na a yemete ntyi'ane
Ya nyii ba bese b'awu ékpwe'ele e si nyô. Sélah !
- 10 Bebela, ayaa bôt d'aye kañe wo ;
Eyoñ w'aye jaé mebuka'a me ayaa e angeteñ.
- 11 Tôéane mintiñetane mienan e be Zambe, Zambe wônan, a bo mie ;
Ba bese b'abômane nye be za'a mimvean e be nyô a yiane kobane woñ ;
- 12 Nyô a tyi'i nsisime bone bejô bôt :
Nyô a ne angôndô e be bejô bôte ya si nyô.

Mvolan nlem éyoñe ya njuk w'aso e nsimesane

biwôlô mimboane mi Zambe

(Besam 44 ; 89 ; 105 : Miny 3 :1, 17-33)

Mfa'a Evet mezik : e ébôbôma Yeduthum.

Sam Asaf.

77

- 1 M'ayône tyiñe yôp e be Zambe,
Tyiñe yôp e be Zambe, Ane a ye wô'ô ma.
- 2 Môs m'ayen njuk, m'aye jeñe YEHOVA;
Wo wom ô nga to nsaman a alu se, te jombô si;
Nleme wom ô nga bene volôban.
- 3 M'asimesane Zambe, a jeme benyeñeyeñe,

- M'abindi mam e nelm,
Nde fe nsisime wom w'aku som. Sélah !
- 4 Wo w'abi biyakole biame na bi bo te diban;
M'adañe yen njuk ane me se ngule ya kobô.
- 5 M'asimesane melu kôa,
Mimbu ya melu mvus.
- 6 M'asimesane mezi'i mam a alu se;
M'abindi a fase mam e nleme wom mamien;
- 7 Ye YEHOVA a ye tyili kom ése,
Ye te fe beta mvaman ?
- 8 Ye mvame jé é keya akeake nnôm éto ?
Ye mintiñetane mié mi kuiya e suk nnôm éto ?
- 9 Ye Zambe a vuaneya bo mvam ?
Ye a diliya mvame jé amu ayaa ? Sélah !
- 10 Me na, A ne ôlune viam,
Nde mbonnôme Nyô A Dañe Mbetane Yôp ô tyendéya.
- 11 M'aye simesan mimboane mi YEHOVA e nlô;
Amu m'aye simesane bitua bi mam biôé ya kôa.
- 12 M'aye tyô'ô fe ésaé jôé ése,
A fase biwôlô mimboane biôé e nlem.
- 13 Zen jôé, A Zambe é ne étyi.
Za zambe a ne éwôlô ane Zambe wongan ?
- 14 Wo ô ne Zambe a bo bitua bi mam,
Wo ô nga liti ngule jôé e meyoñe me bôt été.
- 15 Wo ô nga kôté bôte bôé a wo wôé,
Bo be fam be Yakob a Yôsef. Sélah !
- 16 Eyoñ asôé e nga yene wo, A Zambe,
Éyoñ asôé e nga yene wo, e nga ko woñ,
Yaa, bido'o bi nga fô'ôban.
- 17 Minkut mi nga sôé mendim;
Miñyem mi yôp mi nga lôm mendim :
Mekoñ me élaé fe me nga mialan.
- 18 Nkuane ndum mveñe wôé ô mbe ôlende ôkôs été;
Feleves é nga faé si ése,
Si é nga fô'ôsan a fô'ôban.
- 19 Zene jôé é nga tulane mañ,
A mezene môé e beta be asôé été,
Ve bibô'a mebo biôé bi mbe te yené.

20 Wo ô nga wulu bôte bôé aval ane mbam biyem,
A wo Môze baa Aaron.

Nlitane Zambe a liti bôte bé zen, ja'ana be ne bisô

(Néh 9:9-28; Besam 105; 106)

Maskil Asaf.

78

1 Ke'ane melo, A bôt bam, mfa'a ya ñye'elane wom;
Vitane melo menan mfa'a ya mejô ya anyu dam :
2 M'aye kuui anyu dam a kan nkane;
M'aye kobô minsolane mejô ya melu kôa,
3 Mam bi nga wôk a yem,
Ma beésaa bangan be nga kañete bia.
4 Bi aye bo te solé me bone bap,
Ve kañete me miaé bôt w'aye zu, mimboane mi YEHOVA, a ngule jé,
A bitua bi mam bié a nga bo.
5 Amu a nga télé nkañete e be Yakob,
A nga bo atîñ e Israél,
Nde a nga bendé betate bangane na, be ye'ele me bone bap;
6 Ane miaé bôt w'aye zu w'aye yeme me,
Ja'ana bon be ngenane te bialé,
Mbe b'aye kôlô si a kañete me bone bap;
7 Ane b'aye bi ndinleme jab e be Zambe,
A bo te vuane mimboane mi Zambe,
Ve ba'ale metiñe mé;
8 A na be bo te bo ane beésaa bap,
Miaé bôt ô ne melo a ébiase,
Miaé bôt nleme wop ô nji bo zôsôô,
Wu nleme wop ô nji buni Zambe.
9 Bone be Efraim, be mbe nkômesane bita, be be'e bilaé,
Be nga bulane mvus e môse mewosan.
10 Be nga bo te ba'ale élate Zambe,
Ve be nga bene wulu aval ane atiñe dé.
11 Be nga vuane mam a nga bo,
A bitua bi mam a nga liti be.

- 12 Bitua bi mam a nga liti beésaa bap be lôô,
Si ya Egipten, afôla ya Tsôan.
- 13 A nga kandé mañ, a bo be na be lôt e zañ;
Ane a nga bo mendim me tebe ane avis.
- 14 A môs fe a nga wulu be a nkut,
A ngumba alu a éfufube nduan.
- 15 A nga sale meko'o e fé été,
Ane a nga nyuu be mendim abui
Aval ane m'aso e bido'o bi asôé.
- 16 A nga dutu fe asôé e so'o e ako'été,
Ane a nga bo na mendim me lôt aval ne asôé.
Ve be nga bo be leme ôsu a dañe bo nye abé,
A bo Nyô A Dañe Mbetane Yôp melo e fé été.
- 18 Ane be nga ve'ele Zambe e minleme miab été,
A nsilane bidi be nga kômbô.
- 19 Be nga kobô Zambe abé, a jô na,
Ye Zambe a ne ngule ya kôme tawôlô e fé été ?
- 20 Tame yen, a nga bibi akok, nalé mendim me nga vam, a asôé en nga bo ndôn;
Ye a ne fe ngule ya ve fembe ?
Nge yene tite ya ve bôte bé ?
- 21 Ajô ete, éyoñe Zambe a nga wôk, ane a nga yaa;
Ane nduan é nga bo'obane Yakob e nyô,
Ayaa dé e nga yôñ Israël e nyô.
- 22 Amu be nga bo te buni Zambe,
A bo te tabe ngule nyiane jé mebun.
- 23 Ve a nga bendé miñyeme ya yôp ;
ane a nga dii mimbé ya yôp ;
- 24 Ane a nga noo be manna ya di,
A nga ve be fese j'aso e yôp.
- 25 Môt a nga di fembe beéngel :
A nga lôme be bidi abui abui.
- 26 A nga bo évuñulu ya jôp d'atôô na é vuñ e yôb été;
A ngule jé a nga wulu évuñulu ya nké.
- 27 A nga noo fe be tit aval ane mbuluk,
A anone mefab aval ne nsele'e ya mañ.
- 28 A nga noo de e kpwa' e zañe minkan, mbôma'ane ya bito biap bise.
- 29 Nalé be nga di, a tu'a jaé;
Ane a nga ve be aval ane be nga kômbô.

30 Ve be ngenane te tame jalé nkômbane wop,
Bidi bi ngenan e menyu mab été,
31 Ane ayaa Zambe e nga zu e be be,
A nga wôé ba be nga dañe biwôlô été,
A nga jiane bendômane ya Israël.
32 Akôسابо jam ese di, be nga ke ôsu a abé dap,
Akôسابо bitua bi mam bié, be nga bo te buni.
33 Nde a nga bo na melu map me man ane mvebe,
A mimbu miap e beangôndô été.
34 Eyoñ a nga wôé be, éyoñ éte be nga sili nye;
Ane be nga singi a jeñe Zambe nya njeñane.
35 Ane be nga simesane na Zambe nnye a mbe ako'o dap,
Nyô A Dañe Mbetane Yôp nnye a ne Nyii wop.
36 Ve be nga se'e nye a menyu map;
Be nga laa nye minsos a ayeme dap.
37 Nleme wob ô nji timbi e be nye;
Be nji bo ba ya buni mfa'a ya élate jé,
38 Ve nye, amu a mbe mvam, a nga jamé mbia be mam map, nde a nga bo te jiane be;
A nga vaa ayaa dé biyoñ abui,
A nga bo te kuli ayaa dé ese.
39 Ane a nga simesane na, be ne ve minsôn,
Evuñulu j'alôt, a bo te beta bulan.
40 Biyoñe tañ aya, be nga bo nye melo e fé été,
A ve nye ôlun nlem e fé été !
41 Ane be nga ve'ele nye biyoñe biyoñ,
A soñe Nyô ya Israël a ne Etyi.
42 Be nga bo te simesane ngule jé e nlô,
Nge môs a nga kôté be e be nsiñ;
43 Eyoñ a nga bo mendeme mé e Egipten,
A bitua bi mam bié e fé ya Tsôan.
44 A nga kôñelan asôé e bo metyi,
Nalé be nga bo te ngule ya nyu mendim.
45 A nga lôme dute minlo vôm be nga too, mmie mite mi nga di be ;
A minkongo mi nga jiane be.
46 A nga ve fe bikukum bidi biap,
A bitandak ésaé jap.
47 A nga jiane mindi'i mi wain miap a meta'a,
A bilé bi sikamor biap a avep.

48 A nga suu biyeme biap bi wu meta'a
A mimbam biyeme miap zo'oyañ é ne ayôñ.

49 A nga sôé be ayo' ayaa dé nyô,
Ayaa, ñyaan a njuk,
Nsamba beéngel b'ajian.

50 A nga bo ayaa dé zen,
A nga bo te kam nsisime wop mfa'a ya awu,
Ve a nga ve ébubua ôkon binyiñe biap.

51 Ane a nga wôé mintôle mi bon mise ya Egipten,
Jôm ése ya ngul é nga taté bialé e bentendé be Kam.

52 Ve a nga kee bôte bé émien aval ane mintômba,
A nga wulu be e fé été aval ane mbam biyem.

53 A nga wulu be mvo' é, nalé ate be nga bo te ko woñ ;
Ve mañ me nga yandane besifne bab e yôp.

54 Ane a nga zuu be be kui e mfufube si wé,
E nkôl, ñwô ôte mbonnôme wé ô nga nyoñ.

55 A nga titane fe be meyoñ ôsu,
A nga kabe be ngabe si a nko,
A nga tooé bitunga meyoñ me Israël e menda bentendé mab été.

56 Ve be nga ve'ele a bo Zambe A Dañe Mbetane Yôp melo,
Ane be nga bo te ba'ale minjôane mié.

57 Ve be nga bulan mvus a koñe nye aval ane beésaa bap;
be nga yale feñ aval ane élaé é ne te lôl.

58 Be nga soñe nye a yaa a bito biabe ya bikôndôk;
A be nga tindi nye a bo aban a mikpwelane bengunemelan miap.

59 Eyoñe Zambe a nga wô'ô jame di, a nga yaa,
Ane a nga tôlane ben Israël.

60 A nga li'i étaba'a jé e Silô,
Nda ntendé a nga too e zañe bôt.

61 Ane a nga ve ngule jé é ke e minkôm,
A étôto'o jé e mo me nsiñe wé.

62 A nga ve bôte bé be wu a fansoñ,
A nga yaa ngabe jé.

63 Nduan é nga di'i bendômane bap,
A bengô bap be nga bo te bi jia aluk.

64 Bepretre bap be nga wu a nkpwaté mekôn,
A minkuse miap mi nga bo te yi du.

65 Eyoñ éte YEHOVA a nga vee ane môl a so ôyo,

- Aval ane éwôlô mô t j' ayôtan amu wain.
- 66 Ane a nga tulu besiñe bé be tup;
A ve be ôsone ya nnôm éto nyô.
- 67 Nalé a nga bene nda ntendé Yôsef,
A bo te tob étunga Efraim.
- 68 Ve a nga tob étunga Yuda,
Nkôle Siôn, ñwô a nga nye'e.
- 69 Ane a nga lôñe mfufube nda wé aval ane minkô,
Aval ane si, nje a nga telé nnôm éto.
- 70 A nga tobe David mboésaé wé,
A nga nyoñe nye a so'o e mebemba mintômba;
- 71 A nga nyoñe nye a tôñe benyia mintomba be bili bon,
A bo Yakob bôte bé, a Israël ngabe jé.
- 72 A nga ba'ale be a nlem ô ne zôsôd,
A nga wulu be a atyeñe wo dé.

Du amu ntyamane Yérusalem a meye'elane ya ja'é mvolan

(Besam 74 ; Miñy 1 akui 5)

Sam Asaf.

- 79** 1 A Zambe, meyoñe biku me kuiya ngabe jôé ékukua;
Be maneya ve mfufube tempele wôé mvin;
Be maneya bo Yerusalem mevise mekok.
- 2 Be maneya ve mimbim bebobisaé boé anon ya ñyem na be di,
Minsône mimfufube miôé e betite ya si.
- 3 Be maneya sôé metyi map ane mendim mbôma'ane Yerusalem;
A môte ya jame be a mbe momo.
- 4 Bi nto jôm ékpwe'ele e be bemvôé bangan,
Jôm ébiasé a fianga e be ba b'abômane bia.
- 5 Ntaa vé, A YEHOVA ? Ye w'aye yaa nnôm éto ?
Ye aban ayaa dôé d'aye yôñ ane nduan ?
- 6 Sô'é ayaa dôé e be meyoñe bikul me ne te yeme wo,
E be bijôé bi ne te loene jôé dôé !
- 7 Amu be diya Yakob,
A tyam étaba'a jé.

- 8 Te simesan mbia be mam bemvamba mfa'a wongan :
Nya mvame wôé a jika'a tóbane bia;
Amu bi dañeya silibane si.
- 9 Volô'ô bia, A Zambe ya nyiane wongan, amu дума ya jôé dôé;
Nyi'i bia, a jamé mbia be mam mangan, amu jôé dôé.
- 10 Meyoñe bikul m'aye jô aya na, Zambe wop a ne vé ?
Kañese'e na, nkunane metyi bebobisaé bôé, mme me ne nsôan,
Be yeme wô e meyoñe bikul été bi lôô !
- 11 Kañese'e na mintate minkôm mi kui asu dôé;
Aval ane éwôlô ngule jôé é né,
Kame' ba be ne ntelane ya wôéban.
- 12 Bulana'ane bôt bia be be bi too e tôé jap mebime zañbwa,
Ekpwe'ele nje be nga kpwe'ele wo, A YEHOVA !
- 13 Nalé ate bia bôte bôé a mintômba ya ñiyanebe wôé
Bi aye ve wo akéva nnôm éto :
Akôlô miaé wu akui wu, bi aye kañete ékaña'a jôé.

**Meye'elane ya ja'é Zambe nyian mfa'a ya
mam abé b'ayen**

(2 Mink 30:1-11; Besam 44; Yes 5:1-7)

Mfa'a Evet Mezik; e ébôbama Lili.

Nkañete Asaf. Sam

80

- 1 Ke'alo; A Mba'ale Israél,
Wo w'awulu Yôsef aval ane mbam mintômba;
Wo ô to e bekerubim e yôp, tame faé éfufup.
- 2 Asu Efraim, a Benyamin a Manaséé, kuli'i ngule jôé,
A zu nyii bia !
- 3 Beta'a bulane bia, A Zambe;
Bo' asu dôé na e faé,
Nalé bi aye nyiñ!
- 4 A YEHOVA Zamba minsambe mwosan,
Ntaa vé w'aye yaa meye'elane me bôte bôé ?
- 5 Wo ô maneya yale be a fembe milik,
A ve be mili'i na be nyu e njalan ôvek.
- 6 W'abo bia jôm ékpwe'ele e be bemvôé bangan;

- A besiñe bangan bebiene bebien b'awoé.
- 7 Beta'a bulane bia, A Zamba minsamba mewosan;
Bo' asu dôé na e faé, nalé bi aye nyiñ !
- 8 O nga soo ndi'i wain e Egipten :
O nga titane meyoñe bikul, a be wô.
- 9 O nga mane kôme li wô si;
O nga bembe édo'o si été, a jalé si.
- 10 Minkôl mi nga butiban a éjijine jé,
Mefase ya été me nga bo ane bekédar be Zambe.
- 11 Mintya mié mi nga mialan akui e mañ,
A bifa'ale ya été bi akui e Osôé ôte.
- 12 Amu jé ô nga tyam meka'a ya été,
Nalé ate ba bese b'alôte zen éte b'afaté wô ?
- 13 Nnôme ngôé ya fé a ndamane wô,
A zesé betite ya fé j'adi wô.
- 14 Beta'a bulan, bi aye'elane wo, A Zamba minsamba mewosan :
Tame fombô si ô too e yôp, a yen, a jom ndi'i wu.
- 15 Ndi'i mbonnôme wôé o nga bé,
A afas ô nga ve ngul mfa'a wôé womien.
- 16 O nto ndi'an a nduan, ô nto ntyi'an :
Be tame jañ a melebe ya asu dôé !
- 17 Ve wo wôé ô tabe'e e be môt a ne wo e mbonnôm,
E be Mone môt, nyô ô nga ve ngul mfa'a wôé womien.
- 18 Nalé ate bi aye bo te ve'ele ke e mvus e be wo;
Va'a bia ényiñ, a bi aye loene jôé dôé.
- 19 Beta'a bulan, A Zamba minsamba mewosan !
Bo' asu dôé na e faé, a bi aye nyiñ.

Mvame Zambe a mboan abé Israël

(Deut 16:1-3; Besam 85: 9; 95; Yes 55:3)

Mfa'a Evet mezik : e ébôbôma Gittith.

Sam Asaf.

- 81** 1 Yi'ane Zambe a ne ngule jangan bia tyiñe yôp :

- Sôane Zamba Yakob a zô'é mevak !
- 2 Tata'ane jia, bôman ngom,
Mbamba éngombé a mvet.
- 3 Loñane toñ éyoñ mfefé ngon ô téya,
Eyoñ ngon é ne abôm, môs ésulane bidi jangan.
- 4 Amu e ne ntelane mvinda mfa'a Israël,
Njôane Zamba Yakob.
- 5 A nga télé de e be Yôsef e bo nkañete,
Eyoñ a nga ke a wulu e si Egipten,
Vôm me nga wô'ô nkobô me nji yem.
- 6 Me nga vaa mbe'e étule jé,
Mo mé me nga vas e nkoé.
- 7 O nga loen éyoñ ô nga yen njuk,
Ane me nga nyii wo ;
Me nga yalane wo e asoé ndum mveñ été ;
Me nga ve'ele wo e mfôm mendim me Mériba. Sélah !
- 8 Tameka wô'an, A bôte bam, a m'aye kañete mia ; A Israël, nge ô nga wô'ô ke ma !
- 9 Njina Zambe a ye ke bo e be wo;
Nalé fe w'aye bo te kañe zambe ya ayoñ afe.
- 10 Me ne YEHOVA Zambe wôé,
Nyô a nga vaa wo e si ya Egipten :
Ku'i anyu dôé ndam, a m'aye jalé de.
- 11 Ve bôte bam be nga bo te vô'ôlô tyiñe jam;
A Israël a nga bene ma.
- 12 Nalé ate me nga jô'é be be ke tôn ayete minleme dap,
Nde b'aye wulu a mefé'e map bebien.
- 13 Ngo'o nge bôte bam be nga kômbô ke vô'ôlô ma,
Nge Israël a nga kômbô ke wulu e mezene mam !
- 14 Me nga ye ji'a te'e bôt b'asiñe be;
A kôñelane wo wom ô yaa besiñe bap.
- 15 Bevini YEHOVA be nga yiane ve nye mewôk :
Ve melu map me nga ye tabe nnôm éto.
- 16 A nga ye fe ve be nlisi a dañ mvaé;
A me nga ye jalé wo a wôé w'aso e ako' été.

Melebe ya bikotekote mintyi'ane mejô

(2Mink 19:5-11; Besam 58; Yes 1:16-26)

Sam Asaf.

82

- 1 Zambe a tabeya éto jé e ékôane bôte be Zambe été ;
A tyi'i mejô e bezambe été.
- 2 Ntaa vé mi aye tyi'i mejô ékotekot,
A liti ôbangam e be bikotekot ? Selah !
- 3 Tyi'i ntete'e mô't a moneyui ajô zôsôô.
Bo'o mô't a wu ékpwe'ele a ôwutuk zôsôô.
- 4 Nyi'i mô't a ne éngôngol a ôsame :
va'a fe be e mo me mbia be bôt.
- 5 B'adimi, nalé fe be ne te yem;
B'ake b'andênendên e dibi été :
Mimbô'ane mi si mise ya si nyô mi be mfô'ôsan.
- 6 Me nga jô na, Mi ne bezambe,
A mia bese, bone be Nyô A Dañe Mbetane Yôp.
- 7 Akôsabo nalé mi aye wu aval ane bôt,
A ku aval ane mô'te wua ya bone bejô bôt.
- 8 Kôlô'ô si A Zambe, tyi'i si nyô mejô ;
Amu meyoñe mese m'awô'ô a wo !

Meye'elane ya ja'é Zambe na a zametane fe' besiñe bé

(2 Mink 20; Besam 48)

Jia. Sam Asaf.

83

- 1 A Zambe, ô be ku évô :
Te ku évô, bo'o te tabe ne mieññ, A Zambe.
- 2 Amu na, tame yen, besiñe bôé b'abo zô'é;
A ba b'avini wo be beteya nlô yôp.
- 3 B'abôndé bôte bôé fe'e medu'an,
A bebien b'akobô ane b'aye ndamane bôte bôé w'aba'ale.

- 4 Be jôya na, Zaka bi vose be ane b'aye bo te bo ayoñ;
Ane jôé Israél, bôt b'aye bo te beta simesane de.
- 5 Amu bebien be nga kobô a tyiñe jia;
B'abo élate ya bo wo jam :
- 6 Menda bentendé ya Edom a étunga bôt Ismaél,
Môab a étunga bôt Hagar,
- 7 Gébal, Ammon baa Amalek,
Filistia a betabe nlame ya Tir ;
- 8 Assiria fe a fubuya e be be ;
Be ne éwôlô wo ya bone be Lot. Sélah !
- 9 Bo'o be aval ane ô nga bo Madian,
Aval ane ô nga bo Sisera, a Yabin, e mfôm ôsôé Kison;
- 10 Mbe bete be nga jañ e En-Dor,
Mbe bete be nga bo ane mebi ya si.
- 11 Bo'o biwôlô bi bôte biap bise aval ane Oreb baa Zeeb;
Yaa, bone bejô bôte bap bese aval ane Zebak baa Tsalmunna;
- 12 Mbe bete be nga jô na, Zakane biabebien bi nyoñane bito bi Zambe.
- 13 A Zambe wom, bo'o be aval ane mbulu'u ya ôlende;
Aval ane bikumba'a vôm évuñulu é né.
- 14 Aval ane nduan j'adi'i afan,
Aval ane nkaba'a nduan w'akalan e beta minkô.
- 15 Nalé ate, tône be a beta ôkôse wôé,
Adañe ve be woñ e minlem a ôkôse viôé :
- 16 Jalé'é mesu map ôson ne lut,
Nde b'aye jeñe jôé dôé, A YEHOVA.
- 17 Kañese'e na, be veban ôsone nyô, a fe'e ne vema, nnôm éto;
Yaa, kañese'e na, be bo nzametane ya jañ.
- 18 Nde ete b'aye yeme na, wo étam,
Nyô jôé dé e ne YEHOVA,
One Nyô A Dañe Mbetane Yôp, a jôô si ése.

Nkômbane ya kañe Zambe e tempel été

(2 Sam 15 :25, 26 ; Besam 42 ; 43 ; 63)

Mfa'a Evet mezik : e ébôbôma Gittith.

Sam bone be Kôré.

- A YEHOVA minsamba mewosan !
- 2 Nsissime wom w'adañe kômbô, yaa, w'aku som,
Amu bitune ya nda YEHOVA;
Nleme wom a minsône miam bi ayia bia mevak e be vevea Zambe.
- 3 Yaa, mvokuma a yeneya émiene nda,
A nguleyebe a yeneya émiene dumba'a, vôm a ne ngule ya bôé bone bé;
Ja'ane e bealtar bôé, A YEHOVA minsamba mewosan,
Njôô wom a Zambe wom.
- 4 Ebotan a ba be too e nda jôé,
B'aye bo ve kañe wo ! Sélah !
- 5 Ebotan a môt ngule jé é ne e be wo;
Mezen m'ake e Siôn me ne e nleme wé été.
- 6 Eyoñ b'alôt e mbi'ili Du, b'abo wô vôme ya menjeñ ;
Yaa, mveñ ôsu j'abuti wô a bibotan.
- 7 Ngule jap j'ake ve ôsu ôsu,
Zambe ya bezambe a ye yené e Siôn.
- 8 A YEHOVA Zambe minsamba mewosan, tame wô'ô meye'elane mam;
ke' alo, A Zambe Yakob. Sélah !
- 9 A Zambe ébene jangan, tame fombô,
A lôbô asu môt ô nga wo'o mbon.
- 10 Amu môse wua e bitune menda biôé ô ne abeñ adañe toyini ya vôm mfe.
Me nga nye'e me too mba'ale mbé ya nda Zambe wom,
Adañe ntaban e menda bentendé be mbia be mam.
- 11 Amu YEHOVA Zambe a ne jôb a ében :
YEHOVA a ye ve mvam a дума ;
A ye bo te nyume bôt b'awulu zôsôô jôm é ne mvaé.
- 12 A YEHOVA minsamba mewosan;
Ebotan a môt a to wo mebun.

Meye'elane ya ja'é mvame Zambe mfa'a ayoñ ete

(Esd 1 akui 3, Besam 126)

Mfa'a Evet mezik. Sam bone be Kôré.

- 85** 1 A YEHOVA, ô mvamaneya si jôé ;
O bulaneya minkôm mi Yakob.
- 2 O O jaméya mboan abé bôte bôé;
O butiya abé dab ese. Sélah !

- 3 O vaaya ayaa dôé ese;
O kôñelaneya a li'i ñyaane ya ayaa dôé.
- 4 Bula'ane bia, A Zambe ya nyiane wongan,
A bo ñyaane w'ayaa bia na ô man.
- 5 Ye w'aye yaa bia nnôm éto ?
Ye w'aye limiti ayaa dôé akekui miaé mise ?
- 6 Ye w'aye bo te ve bia ngul e minlem,
Ane bôte bôte b'aye va'a e be wo ?
- 7 Liti'i bia mvam jôé, A YEHOVA;
A ve bia nyiane wôé.
- 8 M'aye wô'ô jam YEHOVA a ye kobô;
Amu a ye kobô bôte bé, mimfufub mi bôte mié, mvo'é,
Ba b'aveñesan e be nye a minleme miap.
- 9 Nyiane wé ô ne fo'o bebé e be ba b'ako nye woñ,
Nde дума d'aye tabe e si jangan.
- 10 Mvam a benya mejôô bi tôbaneya;
Zôsôô a mvo'é bi alatane menyu.
- 11 Benya mejôô m'afaa si,
A zôsôô a ye fombô si a too e yôp.
- 12 Yaa, YEHOVA a ye ve jam e ne mvaé ;
A si jangan j'aye yô mvoñe jé.
- 13 Zôsôô a ye ke nye ôsu,
A ye bo bibô'a mebo bié zene ya wulu.

Sam ya meye'elan a ntabane mebun

(Besam 31; 142; 143)

Mey'elane me David.

- 86** 1 Tame vit alo dôé e si, A YEHOVA, a yalane ma;
Amu me ne éngôngol a ôsame.
- 2 Ba'ale'e nsisime wom, amu me ne môta Zambe :
Nyi'i mboésaé wôé, nyô a to wo mebun.
- 3 O ne Zambe wom ; ko me éngôngo, A YEHOVA ;
Amu m'ayôn e be wo ngum nté môs.
- 4 Va'a nlem moboésaé wôé mevak;
Amu e be wo, A YEHOVA, m'abete nlemé wom e yôp.

- 5 Amu wo, A YEHOVA, ô ne mvaé, a avôle ya jamé,
A mvam abui e be ba bese b'aloene wo.
- 6 Ke' alo, A YEHOVA, mfa'a ya meye'elane mam;
A vô'ôlô tyiñe ya minja'ane miam.
- 7 Môs m'ayen njuk, m'aye loene wo :
Amu w'aye yalane ma.
- 8 Te ke Zambe ya bezambe a ne aval ane wo, A YEHOVA;
Nalé fe te ke mimboane mife mi ne aval ane émiôé.
- 9 Meyoñe mese ô nga té, m'aye zu kañ ôsu viôé, A YEHOVA ;
A m'aye wumulu jôé dôé.
- 10 Amu ô ne éwôlô, w'abo bitua bi mam ;
Wo étam ô ne Zambe.
- 11 Ye'ele'e ma zene jôé, A YEHOVA ;
Ane m'aye wulu e benya mejôô môé été ;
Yemete'e nleme wom ô ko jôé dôé woñ.
- 12 M'aye kañe wo, A YEHOVA Zambe wom, a nleme wom ôse ;
A m'aye wumulu jôé dôé nnôm éto.
- 13 Amu mvame jôé é ne anen mfa'a wom ;
O nyiia nsisime wom e bido'o ya Shéôl.
- 14 A Zambe, bôte mebun be kôlôya si a sengane ma,
A nsamba bôt be ne évô w'ajeñ ényiñe jam,
Be nji telé wo ôsu viap.
- 15 Ve wo, A YEHOVA, ô ne Zambe a ne nkoan éngôngol a mvam,
O ne te ji'a yaa, a abui mvam a nyô ya buni.
- 16 Tame bulan e be ma, a ko ma éngôngo ;
Va'a mboésaé wôé ngule jôé,
A nyii mone étu'a minga jôé,
- 17 Liti'i ma ndem ya mvaé jôé,
Nde ba b'avini ma b'aye yene je,
A veban ôsone nyô.
Amu wo, A YEHOVA, ô nga ka ma a volô ma.

Mvom ntabe nlam ya Siôn

(Besam 48, Yes 2 :2, 3 ; 60 ; Yer 3 :17)

Sam bon be kôré. Jia.

87

- 1 E mfufube nkôl e yôp,
Nlam a nga bôndé ô tele.
- 2 YEHOVA a nye'e mimbé mi Siôn,
Adañe bitaba'a bi Yakob bise.
- 3 Bitôto bi mam bi ne nkañetan ajô dôé,
A nlame Zambe. Sélah !
- 4 M'aye tote Rahab a Babilôn, ba b'ayeme ma été ;
Tame fombô, Filistia a Tir a Ethiôpia ;
Môt nyô a nga bialé wôé, nalé b'ajô.
- 5 Yaa, b'aye jô ajô Siôn na,
Nyina baa nyôlé be nga bialé été ;
A Nyô A Dañe Mbetane Yôp, émien a ye wô télé.
- 6 YEHOVA a ye lañ aval ane môt a nga tili meyoñ,
Nyina a nga bialé été. Sélah !
- 7 Beyia bia a bejem avale da, b'ajô na,
Menjeñe mam mese me ne e be wo.

Meye'elane ya nyii môt mfa'a ya awu

(Miñy 3:1-20; Besam 6; 39; 89: 39; 102:1-13)

Jia Sam bone be kôré. Mfa'a ya Evet: e ébôbôma Mahalath Leannoth. Maskil Héman mon Ezrahit.

88

- 1 A YEHOVA Zambe ya nyiane wom,
Me nga yôn môs baa alu asu dôé;
- 2 Kañese'e na, meye'elane mam me kui asu dôé,
Viti' alo dôé mfa'a ya ñyône wom.
- 3 Amu nleme wom ô nto nju'u ne lut,
A ényiñe jam j'asubu bebé e Shéôl.
- 4 Me nto nlañan a ba b'ake ébé si;
Me nto aval ane môt a nji bi ngu.
- 5 Nwuane fé vôm miñwuan mi né,

- Aval ane ba be ne minwôéane be jô'ô e soñ été,
 Aval ane mô't ô ne te beta simesam,
 A be nto mvasan e mo mô'é.
- 6 O nga bô'é ma e ébé j'adañ édo'o si,
 Vôme ya dibi e bido' été.
- 7 Ayaa dô'é d'adañe tibi ma e yôp ;
 O yandaneya ma a mintyôa miô'é mise. Sélah !
- 8 O nga bo na bemvô'é bam be sa'ale ma;
 O boya ma jôm é ne mfa'a wop;
 Me dibiya, a me se ngule ya tup.
- 9 Dise dam d'adim amu ôlun,
 Môs ôse m'aloene wo, A YEHOVA,
 M'asam mo mam e be wo.
- 10 Ye w'aye liti miñwuan bitua bi mam ?
 Ye ba be wuya b'aye kôlô si a kañe wo ? Sélah !
- 11 Ye b'aye kañete mvame jô'e e soñe si ?
 Nge mvo'é jô'e Vôme ya Awu ?
- 12 Ye bitua bi mam biô'é bi aye yemban e dibi été,
 A mvolan nyiane wô'e e si ya ôvuan ?
- 13 Ve me nga yôn a loene wo, A YEHOVA,
 A mametyé, meye'elane mam m'aye kui asu dô'é.
- 14 A YEHOVA, amu jé w'awua nsisime wom e fé ?
 Amu jé w'asolé ma asu dô'é ?
- 15 M'awu ékpwe'ele, me tele fefel awu aso mongô :
 Eyoñ m'ajibi beangôndô be mam bô'é, me nto te fe fek.
- 16 Ayo'o ñyaane dô'é e dañeya ma e yôp,
 Beangôndô bô'é be jianeya ma.
- 17 B'abômane ma aval ane ndôn ngum nté môs ;
 B'abômane ma bese ne kpwok.
- 18 Evuvumane jam a mvô'é ô maneya bo na be tyetebe ma ;
 Dibi nde e nto bemvô'é bam.

Elat YEHOVA ba David. Alun Israël

(2 Sam 7:12-16; 23:5; 2 Bejôô 24:8-12; Besam 44; 77)

Maskil Ethan, mon Ezrahit.

A anyu dam, m'aye kañete benya mejôô bôé e miaé mise.
2 Amu mvame jôé é nga tebe nnôm éto,
A benya mejôô bôé be yeme ngul aval ane yôp.
3 O nga jô na, Me boya élat bia ntobane wom,
Me nga kalane David mboésaé wome na:
4 M'aye telé mvoñe bôte jôé nnôm éto, a lôñ éto njôane jôé akekui mia mise. Sélah !
5 Yôb e kañe bitua bi mam biôé, A YEHOVA,
A benya mejôô bôé e ékôane mimfufub été !
6 Amu na, za a ne e ñyem été a ne ngule ya ve'ane YEHOVA ?
Za ya biwôlô bi bôt ya yôb a ne aval ane YEHOVA,
7 Zambe, nyô a kobane woñ e nsamba mimfufub été,
Anen a angôndô a dañe ba bese b'abômane nye ?
8 A YEHOVA Zambe minsambe mewosan,
Za a ne éwôlô môêt aval ane wo, A YEHOVA ?
Benya mejôô bôé be bôma'ane wo ?
9 Wo w'ajôô mebune me mañ;
Eyoñ mintyôa mié mi abet, w'atooé mie évô.
10 Wo ô nga ko'o Rahab aval ane mbim;
O nga tyamelane besiñe bôé a ngule wo jôé.
11 Yôb e ne éndôé, si fe é ne énjôé :
Si nyô a biôm bise bi ne été, wo ô nga té bie.
12 Akôé a nké, wo ô nga té bie ;
Tabor a Hermon b'akañe jôé dôé a mevak.
13 O bili éwôlô wo,
Akule wo dôé e ne ngu, A mbonnôme wôé ôyabe yôp.
14 Zôsôô a ntyi'ane mejô zôsôô bi ne mbôka'a ya éto njôane jôé :
Mvam a benya mejôô bi ake wo ôsu.
15 Ebotan a bôt b'ayem ayenga ya abôk,
Ba b'awulu a éfufube ya asu dôé,
16 Ba b'avak a jôé dôé ngum nté môs ;
B'abete zôsôô wôé yôp.
17 Amu ô ne дума ya ngule jap ;
A nla'a wongan ô ne mbetane yôb amu mvame jôé ;
18 Amu ébene jangan é ne jôme YEHOVA ;
Njôô wongan a ne Mfufubu ya Israél.
19 Biyoñe ya kôa ô nga kobô mbuni wôé e miñyenan été, a jô na,
Me maneya bete ékat e be môêt a ne éwôlô,
Me maneya bete ntobane wom e be bôt.

- 20 Me yeneya David mboésaé wom ;
Me maneya wo'o nye mfufube mbone wom.
- 21 Nalé ate wo wom w'aye tabe e be nye,
Akule wo dame fe d'aye ve nye ngu.
- 22 Nsiñe wom a ye ke dañe nye e fek,
Nalé fe ékotekote mô't j'aye ke te'e nye,
- 23 M'aye ko'o besiñe bé asu dé,
A wôé ba b'avini nye.
- 24 Benya mejôô bam a mvame jam bi aye tabe e be nye,
A amu jôé dam nla'a wé w'aye beteban e yôp.
- 25 M'aye télé wo wé e mañ, a mbonnôme wé e asôé.
- 26 A ye loene ma na, O ne Esaa wom,
Zambe wom, a Ako'o ya nyiane wom.
- 27 Ma fe m'aye bo nye ntôle mone wom, nyô a dañedañe bejô bôte ya si.
- 28 Mvame jam, m'aye ba'ale je e be nye kom ése,
A élate jam j'aye tebe ngul mfa'a wé.
- 29 M'aye ba'ale mvoñe jé é tebe nnôm éto,
A éto njôane jé ane melu ya yôp.
- 30 Nge bone bé b'aye li'i memvinda mam,
A te wulu aval ane minjôane miam ;
- 31 Nge b'atyam mintelane memvinda miam,
A bo te ba'ale metiñe mam,
- 32 Eyoñ éte m'aye ve ntyamane metiñe wop meleb a ôlé,
A abé dab a minkasa;
- 33 Ve m'aye bo te vaa mvame jam e be nye,
Nge bo évus a benya mejôô mam.
- 34 M'aye bo te ke tyam élate jam,
Nge selane te bo ajô e nga kui e biyaé biam.
- 35 Ve éyoñe jijia me nga kalan a étyi jame na :
M'aye bo te laa David minsos :
- 36 Mvoñe bôte jé j'aye tabe nnôm éto ;
Eto njôane jé nté jôb e tele ôsu viam.
- 37 Aval ane ngon j'aye tebe ngul nnôm éto;
J'aye tebe ane ngaa nté ñyeme yôb ô too. Sélah !
- 38 Ve éyoñe ji, ô wuaya fé a ben ;
O nto njalan a ayaa mfa'a ñwo'ane wôé.
- 39 O beneya élat mia mboésaé wôé;
O biaséya ékate jé a wua je e mbuluk.

- 40 O Maneya bu'u meka'a mé mese ;
O tyameya aleme dé e bo mintyaman.
- 41 Ba bese b'alôte zen éte b'asa nye :
A nto jôm ékpwe'ele e be bemvôé bé.
- 42 O maneya bete mbonnôme besiñe bé ;
O maneya bo na minziziñe mié mi vak.
- 43 Yaa, O maneya bulan ayo fansoñe dé e mvus,
O maneya bo na a bo te fe tebe e mewosan.
- 44 O vaaya ntume njôd e wo wé été,
A wua éto njôane jé si.
- 45 O maneya tyi'i melu ya éyoñe mongô jé, étun ;
O jaléya nye ôsone nyô. Sélah !
- 46 Ntaa vé, A YEHOVA ? Ye w'aye sobô nnôm éto ?
Ntaa vé ayaa dôé d'aye yôñ ane nduan ?
- 47 Tame simesan A YEHOVA, aka'a étun, éyoñe jam é ne :
Amu za aka'a momo jôm ô nga té de bone be bôte bese !
- 48 Môt mbé a ne nyô a ye nyiñ a bo te yen awu,
Nyô a ye vaa nsisime wé e ngule ya Shéôl ? Sélah !
- 49 A YEHOVA, mvame jôé ya kôa é nto vé,
Nje ô nga kalane David a benya mejôd bôé ?
- 50 Tame simesan A YEHOVA, ane mboésané wôé a yen ékpwe'ele;
Ane me be'e e tôé jam meta mese ya meyoñe me bôt ;
- 51 Mme besiñe bôé be nga ta, A YEHOVA ;
Mme be nga kpwe'ele metele mebo me ñwo'ane wôé.
- 52 YEHOVA a boo ébotan nnôm éto.
Amen, a Amen.

KAKATE NYINI

Ntabane nnôm éto Zambe a Nlôtane môd

(Nlañ14 :22-38 ; Ekk1 :4 ; Yak 4 :14)

Meye'elane me Môze, môta Zambe

- 1 A YEHOVA, ô nga too bia étaba'a jangan e miaé mise.
- 2 Osusua ya minkôle mi ngenane te téé,
Nge na, valé ô ngenane te té si, a si bi too nyô,
Aso nnôm éto a nnôm éto, ô ne Zambe.
- 3 Wo w'abulane mô't e mbuluk,
A jô na, Bula'an, mia bone be bôt !
- 4 Amu toyina mimbu, e mise mô'é,
A ne aval ane angô' é éyoñ e lôteya,
Nge aval ane amombô da ya alu.
- 5 Wo w'avaa bôt ; be nto aval ane biyeyem,
Aval ane bilok mbie bi abo mfefé mametyé.
- 6 Mamatyé, bi afaa a yaé;
Mamengô' é bi nga jo'olan a kôt.
- 7 Amu bi ajañ a ñyaane wô'é,
A bi ayen njuk a ayaa dô'é.
- 8 O teléya mbia be mam mangan asu dô'é,
A mam abé mangan me solô, e éfufube ya asu dô'é.
- 9 Amu melu mangan mese m'alôt e ayaa dô'é été,
Bi amane mimbu miangan aval ane mvebe.
- 10 Melu ya ényiñe jangan me ne mewôme zañbwaa,
Nge mô't a ne ngul, ane tabe mimbu mewôm muam ;
Ve mebune map, me ne ve ésaé a njuk ;
Me mbeme mane ke, wôna bi ayele a ke.
- 11 Za a tyô'ô ngule ya ayaa dô'é,
A ñyaane wô'é, abim b'ayiane ko wo woñ ?
- 12 Ye'ele'e bia na, bi lañe melu mangan,
Nalé bi aye bi minlem mi ne fek.
- 13 Bula'an, A YEHOVA, Ntaa vé ?
Ko bebobisaé bô'é éngôngo !
- 14 Tame jalé bia mvame jô'é mametyé,
Nalé bi aye vak a yen mvaé melu mangan mese.
- 15 Va'a bia mevak nté melu ô nga jalé bia njuk,
A nté mimbu bi nga yen abé.
- 16 Yebe'e na, ésaé jô'é é yené e be bebobisaé bô'é,
A duma dô'é e be bone bap.
- 17 Yebe'e na, mvame YEHOVA Zambe wongan é tabe e be bia,
Va' ésaé ya mo mangan ngul e be bia ;

Ya, ésaé ya mo mangan, va'a je ngu.

Mvoé ya nyô a to YEHOVA mebun

(Deut 33:12, 28; Yiôb 5:19-26; Besam 34; 62; 121; Minka 18:10)

- 91**
- 1 Nyô a too asoé e be Nyô A Dañe Mbetane Yôp,
Nyô a to e éjjine Nyô a ne Ngul Ese, si;
 - 2 A ye jô YEHOVA na, A ne asoé dam a ôleme viam;
Zambe wom, nnye me too nye mbun.
 - 3 Amu a ye nyii wo e ékoé ñwôé anon,
A mfa'a ya ébubua ôkon j'awôé bôt.
 - 4 A ye buti wo a mesaé mé,
E mefabe mé si w'aye ke sobô :
Benya mejôô bé be ne ében a ébuta'a ya tôé.
 - 5 W'aye bo te ko angônda jame woñ a alu,
Nge akoñ élaé d'aye a môs;
 - 6 Amu ébubua ôkon j'awulu e dibi été,
Nge amu awu d'ajiane bôt a môs.
 - 7 Toyina bôt a ye ku wo e fefe,
A bôt toyini awôm b'aye ku wo e mbonnôm;
Ve d'aye bo te zu wo bebé.
 - 8 W'aye bo ve fombô a mise môé, a yene meya'ane me bikotekokte bi bôt.
 - 9 Amu ô boya YEHOVA asoé dôé !
Nyô a Dañe Mbetane Yôp, étaba'a jôé;
 - 10 Te ke abé d'aye kui e be wo,
Nalé fe ébubua ôkon éziñ j'aye bo te zu bebé e nda ntendé jôé.
 - 11 Amu a ye ve beéngel ésaé ya ajo dôé
Na, be ba'ale woe mezene môé mese.
 - 12 B'aye bete wo a mo map,
Abo dôé e za kômôtô akok.
 - 13 W'aye tibi ñbweñbwem a akpwe yôp :
A étoñ ñbweñbwem a nyo w'aye tibi e mebo si.
 - 14 Amu a tii e be ma a nye'an, m'aye nyii nye :
M'aye kame nye, amu a yeme jôé dam.
 - 15 Eyoñ a ye loene ma, m'aye yalane nye;
M'aye tabe e be nye éyoñ a ye yene njuk,
M'aye nyii nye, a ve nye duma.

16 M'aye nye jalé ényiñ ayap,
a liti nye nyiane wom.

Ekaña'a amu mvame YEHOVA

(Besam 1; 33; 37)

Sam. Jia ya môse sabbat.

92

1 A ne mbamba jam ya ve YEHOVA akéva,
A yia jôé dôé bia bi ékaña'a,
A wo, w'Adañe Mbetane Yôp;
2 Mfa'a ya liti mvame jôé mametyé,
A mvo'é jôé alu se,
3 E mezi'i me mfañ a mvét;
A mbamba tyiñ éngombé.
4 Amu wo, YEHOVA, ô veyá ma ava'a nlem amu ésaé jôé;
A bisaé ya mo môé m'aye yia bia.
5 Ngo'o aka'a anen bisaé biôé bi né, A YEHOVA !
Minsimesane miôé mi ne étua édok.
6 Nsusu'u môê ô ne te yem ; nalé fe ôkukut ô ne te yeme jame di :
7 Na, Eyoñe bikokote bi afaa aval ane bilok,
A éyoñ beboabé bese b'aye nenenen ;
E ne na, b'aye jañ nnôm éto.
8 Ve wo, A YEHOVA, ô ne e yôb été nnôm éto kom.
9 Amu tame yen, besiñe bôé, A YEHOVA,
Amu tame yen, besiñe bôé b'aye jañ ;
Beboabé bese b'aye tyamelan.
10 Ve ô betéya nla'a wom e yôb aval ane wu nnôme nyat ;
me nto ñwo'an a mfefé mbon.
11 Mise mam me yeneya nkuane besiñe bam,
Melo mam me nga wô'ô njañane besiñe bam.
12 Bezôsôô b'aye faa aval ane alen,
A yaé aval ane kédar ya Liban.
13 Be ne mbéan e nda YEHOVA été,
B'ayaé e menda me Zambe wongan été.
14 B'aye bo be wumu bibuma éyoñ be nto minnôm,
Be ne kom ése njalan a mekemete me ne nyumen.
15 A liti na, YEHOVA a ne zôsôô;

A ne ako'o dam, a te ke ékotekot é ne e be nye.

Etôto'o YEHOVA

(Besam 46 ; 96 ; 97 ; 99 : Yes 59 :19)

93

- 1 YEHOVA a jôô ; a be'e étôto' ane ngômesan ;
YEHOVA a be'e ngu, a jaléya je émien angeteñ ;
Yaa, si fe é ne ñyeman ; nde é se ngule ya fô'ôsan.
- 2 Eto njôane jôé é ne ntelane kom :
O too ataté nnôm éto.
- 3 Ndôn é beteya yôp, A YEHOVA,
Ndôn é beteya tyiñe jab e yôp ;
Ndôn j'abete mintyôa miab e yôp.
- 4 A dañe mesô'ô ya abui mendim,
Beta mintyôa mi mañ,
YEHOVA a ne éwôlô e yôb été ;
- 5 Minjôane miôé mi ne fo'o été ;
Etyi j'ayian nda jôé,
A YEHOVA, nnôm éto.

Meye'elane ya ja'é Zambé nkunane bôte bé

(Yiôb 19 :29 ; Besam 5 ; 7 :7-18 : 10 ; Nahum 1 :2)

94

- 1 A YEHOVA, wo Zamba akuna'a,
Wo Zamba akuna'a, faé éfufup.
- 2 Kôlo'ô si, wo Ntyi'i mejô ya si nyô ;
Va'a bebo mebun mam b'ayiane nyoñ.
- 3 A YEHOVA, ntaa vé, bikotekot,
Ntaa vé bikotekot bi aye fôn ?
- 4 B'akuli bifia mebune biap,
B'abo énguñ, beboabé bese.
- 5 B'afite bôte bôé, A YEHOVA,
A ve ngabe bôte jôé ôlun.

6 B'awôé minkus a mintabe,
A wôé bobenyui.

7 B'ajô na, YEHOVA a ye bo te yen;
Nalé fe Zambe Yakob a ye bo te simesan.

8 Simesa'an, mia bôt mi adañ asuk !
Mia mekut, éyoñ évé mi aye bo fek ?

9 Nyô a nga bem alo, ye a ye bo te wôk ?
Nyô a nga bo dis, ye a ye bo te yen ?

10 Nyô a lebe meyoñe biku, ye a ye bo te ve melep,
Nyô a ye'ele bôt ñyeman ?

11 YEHOVA a yem minsimesane mi bôt,
Na mi ne momo jôm.

12 Ebotan a môt nyô w'alep, A YEHOVA,
Nyô w'aye'ele metiñe môé;

13 Nde w'aye ve nye awo'an melu ya njuk,
Akekui ébé j'aye fa'aban mfa'a mbia be bôt.

14 Amu YEHOVA a ye bo te jô'é bôté bé ;
Nalé fe a ye bo te li'i ngabe bôte jé.

15 Amu zôsôa ntyi'ane mejô a ye bulan e be bezôsô be bôt;
A ba bese be ne minlem mvo'é b'aye tôñe wô

16 Za a ye kôlô si a kame ma e be mbia be bôt ?
Za a ye tebe a kame ma mfa'a beboabé ?

17 Nge YEHOVA a nga ye bo te bo mvolane wom,
Nsisime wom ô nga ye ji'a tabe si ya évôl.

18 Eyoñ me nga simesane na, Abo dam d'asendé,
Mvame jôé, A YEHOVA, é nga sus'u ma.

19 Eyoñ minsimesane ya nleme wom me ne abui,
Mimvolane minleme miôé mi ave nleme wom avak.

20 Ye bikotekote bejôô bi aye fulane wo mam,
Mbe b'abôndé ézezam a zene mintelane memvinda ?

21 B'asulane vôme wua na be ndaman ényiñe zôsôa môt,
a ve metyi me ne te bijô mekua.

22 Ve YEHOVA a nga bo ôleme viam ô ne ôyabe yôp,
A Zambe wom, ako'o ya asoé dam.

23 A ye bulan abé dap bebien e nyole jap,
A ye sili be ne meññ amu mbia be mam map ;
YEHOVA Zambe wongan a ye sili be ne meññ!

Nkañiane YEHOVA, a mveane bisô melep

(Besam 81; 100; Behéb 3:6-19; 4:1-11)

95

1 Tameka zuan, ñyi'ane YEHOVA bia;

Zaka bi boan ako'o ya nyiane wongan zô'é mevak.

2 Nkelan asu dé a mvean akéva;

Zaka bi boane nye zô'é mevak a bia bi ékaña'a!

3 Amu YEHOVA a ne éwôlô Zambe,

A éwôlô Njôô j'adañe bezambe bese.

4 Bido'o bi si nyô bi ne e wo wé été;

Nalé fe mebôbône me beta minkô me ne jôme jé.

5 Mañ me ne émmé, nnye a nga bo me ;

A mo mé me nga té kindik.

6 Tameka zuan, bi kañ a kimbu si ;

Zaka bi kutane meboñe si asu YEHOVA Nté wongan :

7 Amu a ne Zambe wongan ;

A bia bi ne bôte ya nyanebe wé, a mintômba ya wo wé.

Ngo'o nge mi aye wô'ô tyiñe jé den !

8 Te boane minleme mienan ayet,

Aval ane e mfôme Mériba,

Aval ane môse ya Massa, e fé été ;

9 Eyoñ beésoo benan be nga ve'ele ma,

Be nga bôbôlô ma, akôsabo be nga yen ésaé jam.

10 Nté mimbu mewôm menyin me nga juk a miaé bôt ôte,

Ane me nga jô na, Be ne bôt b'adimi e minlem été,

A be boya te yeme mezene mam :

11 Nde me nga kan ngana éyoñ me nga yaa,

Na, b'aye bo te nyiin e awo'ane dam été.

Nloene ya kañe YEHOVA Zôsôa Nyi'i Mejô

(1 Mink 16 :23-33 ; Besam 67 ; 97 ; 98)

96

1 Tame Yia YEHOVA mfefé jia :

- Yi'a YEHOVA jia, si nyô ése !
- 2 Yia YEHOVA jia, kañe jôé dé ;
Kañete'e foé ya nyiane wé môs ane môs.
- 3 Kañete'e дума dé e meyoñe bikul mese,
Biyua mimboane bié e meyoñe mese été
- 4 Amu YEHOVA a ne éwôlô, b'ayiane dañe kañe nye :
B'ayiane ko nye woñ a dañe bezambe bese.
- 5 Amu bezambe bese ya meyoñe biku be ne bengunemelan ;
Ve YEHOVA nnye a nga té yôp.
- 6 Duma a étôtok bi ne ôsu vié :
Ngul a abeñ bi ne e mfufube nda wé.
- 7 Va'ane YEHOVA, mia meyoñe me bôt,
Va'ane YEHOVA дума a ngu.
- 8 Va'ane YEHOVA дума d'ayiane jôé dé :
Za'an a mvean, a nyiin e menda mé.
- 9 Tameka kañane YEHOVA mi be'e mimfufup mengômesan :
Fô'ôba'an asu dé, si nyô ése.
- 10 Jô'an e meyoñe me bôt été na, YEHOVA a jôô.
Si fe é ne ñyeman nde é se ngule ya fô'ôsan ;
A ye tyi'i meyoñe biku mejô zôsôô.
- 11 Yôb e yene' mvaé, a si é va'ak,
Mañ me duñuk, a biôm bise bi ne été ;
- 12 Afub e va'ak, a jôm ése é ne été ;
Eyoñ éte bilé ya afan bi aye yia bia mevak
- 13 Asu YEHOVA, amu a zu,
Amu a zu tyi'i si nyô mejô :
A ye tyi'i si nyô mejô a zôsôô,
A meyoñe me bôte mejô a benya mejôô.

Ngul Njôane YEHOVA

(Besam 96 ; 99 ; 113)

- 97** 1 YEHOVA a jôô ; si nyô é va'ak ;
Bikôt abui bi yene' mvaé !
- 2 Minkut a dibi bi abômane nye !

- Zôsôô a mvo' é bi ne mbôka' a ya éto njôane jé.
- 3 Nduan j'ake nye ôsu,
A j'adi'i besiñ mbôma'ane.
- 4 Zo'oyañe jé j'ave si nyô éfufup,
Si nyô j'ayen, a fô'ôsan.
- 5 Beta minkôl mi nga nyeme aval ane éko asu YEHOVA,
Amu YEHOVA ya si nyô ése.
- 6 Yôp d'akañete zôsôô wé ;
A meyoñe me bôte mese m'ayene дума dé.
- 7 Ba bese b'akañe miñkpwelane mi biôm be veban ôsone nyô,
Ba b'abo énguñ a bengunemelan :
Kañane nye mia bezambe bese.
- 8 Siôn a nga wôk, a yen mvaé,
A bengone be Yuda be nga vak,
Amu mintyi'ane mejô miôé, A YEHOVA.
- 9 Amu wo, A YEHOVA, ô ne ôyabe yôp adañe si nyô ése :
O ne mbetan ôyabe yôp adañe bezambe bese.
- 10 A mia bôt mi anye'e YEHOVA, vina'an abé :
A ba'ale minsisim mimfufube mié;
A vaa be e mo me mbia be bôt.
- 11 Efufup j'atôô e be bezôsôô be bôt,
A mevak e be ba e ne minlem mvo' é.
- 12 Va'an e be YEHOVA, mia bezôsôô,
A ve mfufube jôé wé akéva !

Nloene kañe YEYOVA amu zôsôô wé

(Besam 96; Luk 1:49-55, 68-75; Yes 49: 6; Nkul 11:15-18)

98

- 1 Tame yia YEHOVA mfefé jia;
Amu a boya bitua bi mam :
Mbonnôme wé, a mfufube wo wé, bi nga bo nye ndañan.
- 2 YEHOVA a litiya bôt ndañane wé,
A litiya akuna'a dé e mise meyoñe biku ;
- 3 A nga simesane mvame jé a mvo' é jé mfa'a nda bôt Israël.
Meku'u me si mese ya si nyô me nga yene ndañane Zambe wongan.
- 4 Sôane YEHOVA a zô' é mevak ; si nyô ése ;

Kuta'an a jia mevak a yia bia bi ékaña'a !
 5 Yi'ane YEHOVA bia bi ékaña'a a éngombé, A éngombé, a abeñe tyiñ !
 6 A metoñ a tyiñe mfañ,
 Sôan a zô'é mevak asu Njô bôt, YEHOVA.
 7 Mañ me duñuk, a biôm bise bi ajaé été ;
 Si nyô a ba bese be to été !
 8 Asôé e kute' fase jap,
 Bone minkôl be fula'ane tyiñ ya yia jia mevak
 9 Asu YEHOVA, amu a zu jôô si nyô.
 A ye tyi'i si nyô mejô a zôsôô,
 A meyoñe me bôt a mvo'é.

Nkañane YEHOVA amu mvo'é a bo Israël

(Besam 95; 97)

99

1 YEHOVA a jôô; meyoñe me bôt me fô'ôba'an!
 A to ntabane njôô e be bekerubim e yôp; si nyô é fô'ôsa'an.
 2 YEHOVA a ne éwôlô e Siôn été ;
 A ne mbetane yôp a dañe meyoñe mese.
 3 Kañese'e na, be kañe jôé dôé e ne éwôlô a angôndô !
 A ne étyi !
 4 Ngungule Njô bôt, Nye'e zôsôô,
 Wo ô nga yemete mvo'é,
 Wo ô nga bo zôsôa ntyi'ane mejô a zôsôô e be Yakob.
 5 Mi beta'ane YEHOVA Zambe wongan e yôp,
 A kañan e mfôm ételé mebo jé :
 A ne étyi !
 6 Môze baa Aaron be nga too e nsamba bepretre bé,
 Samuel fe a nga too e nsamba ba be nga bo be lo'ene jôé dé.
 Be nga loene YEHOVA ane a nga wô'ô be.
 7 A nga kobô be e nsum nkut été :
 Be nga ba'ale minjôane mié,
 A mintelane memvinda a ga ve be.
 8 O nga yalane be, A YEHOVA Zambe wongan :
 O mbe Zambe a nga jamé be,
 Akôsabo ô nga ve be melebe ya mimboane miap.

- 9 Mi beta'ane YEHOVA Zambe wongan e yôp,
A kañan e mfôm mfufube nkôle wé;
Amu YEHOVA Zambe wongan a ne étyi.

Bôt bese b'alebane na be kañe Zambe

(Besam 95:1-7; 117)

Sam ya mvean akéva.

100

- 1 Sôane YEHOVA a zô'é mevak, mia mesi mese.
2 Bo'ane YEHOVA ésaé a mevak :
Za'an asu dé a ñyiane bia !
3 Yemekane na, YEHOVA nnye a ne Zambe !
A ne nyô a nga té bia, a bi ne émbé ;
Bi ne bôte bé, a mintômba ya ñyanebe wé.
4 Nyi'ane mimbé mié a mvean akéva,
A menda mé a ékaña'a :
Va'ane nye akéva a kañe jôé dé.
5 Amu YEHOVA a ne mvaé ; mvame jé é too nnôm éto,
A ntôane mejô wé akekui miaé mi bôte mise.

Esaé zôsôa ntili Sam

(Met 18 :19 ; Yas 24 :15; 2 Sam 8:15; 23:3, 4;

Besam 1; M.M. 24:16)

Sam David.

101

- 1 M'aye yia bia bi mvam a nya ntyi'ane mejôô :

- A YEHOVA, m'aye yia wo bia.
- 2 M'aye vô'ôlô zen é ne te bijô,
Eé, w'aye zu e be ma éyoñ évé ?
M'aye wulu e nda jam été a nlem ô ne nya mvo'é.
- 3 M'aye bo te télé mbia jôm e mise mam :
M'avini ésaé ya ba b'ayale feñ ;
J'aye bo te kabetan e be ma.
- 4 Ekotekote nlem j'aye bo ma ôyap ;
M'aye bo te yene jam e ne abé.
- 5 Nyô a so'é mô't ba nye be too e asoé,
Nnye ate m'aye jian :
Nyô a ne asu a bete yôp a nlem mebun,
M'aye bo te jibi nye.
- 6 Mise mam m'aye fombô bôt ya buni be ne si éte, ane b'aye tabe e be ma :
Nyô a wulu zen é ne nya mvo'é, nnye ate a ye bo ma ésaé.
- 7 Nyô a bo medu'an a ye bo te tabe e nda jam;
Nyô a kobô minsos a ye bo te langan vô'm me too.
- 8 Tyé ése m'aye jian mbia be bôte bese ya si éte;
A sem beboabé bese, a vaa be e nname YEHOVA.

Meye'elane me mô't a wô'ôlun, a ja'é mvam mfa'a wé a mfa'a Siôn

(Besam 97:2; 136; Yes 51; 52:1-10; Dan 9)

Meye'elane me mô't a wô'ôlun, éyoñ a ku som, a sôé édudu ñyône wé e be YEHOVA.

- 102** 1 Wô'ôp meye'elane mam, A YEHOVA,
Kañese'e na, ñyône wom ô kui e be wo !
- 2 Te solé ma asu dôé mô's m'ayen njuk ;
Tame vit alo dôé e be ma ;
Mô's m'aloen, tame ji'a yalane ma.
- 3 Amu melu mam m'alôt aval ane ôtita,
A bivese biam bi adik aval ane mbe'e nduan.
- 4 Nlem wom ô nto ntya'an aval ane bilok ; a kôt;
M'avuane di fembe jam.
- 5 Amu tyiñe ya ntate wom,
Bivese biam bi akabetan e minsône miam.

6 Me nto aval ane zum ônon ya fé;
Me nto aval ane akuñe ya bilik;

7 M'abômbô si me vee,
Me nto aval ane ntot ônon e andile yôp.

8 Besiñe bam b'akpwe'ele ma ngum nté môs;
Ba b'avini ma b'abelane jôé dam ane di biyo'é.

9 Amu m'adi asub aval ane bidi,
M'afulane mili'i mam a jôm m'anyu.

10 Amu ñyaane wôé a ayaa dôé;
Amu ô beteya ma e yôp, a wua ma e fé.

11 Melu mam me ne éjjine ya mamengô'é ;
A me nto nkôt aval ane bilok.

12 Ve wo, A YEHOVA, ô too éto njôan nnôm éto;
Jôé dôé d'alangan akekui miaé mise.

13 W'aye kôlô si a ko Siôn éngôngo ;
A nto éyoñe ya ko nye éngôngo,
Yaa, éyoñ é ne ntiñetan é kpwaaneya.

14 Amu bebobisaé bôé b'ayem meko'o mé édima,
A ko mbulu'u wé éngôngo.

15 Meyoñe biku m'aye ko jôé YEHOVA woñ,
A bejô bôte bese ya si nyô b'aye ko дума dôé woñ.

16 Amu YEHOVA a ye lôñe Siôn ;
A ye yené e étôto'o jé été.

17 A ye simesane meye'elane me mimbubua,
A ye bo te biasé za'a jap.

18 Jame di d'aye tiliban mfa'a miaé bôt w'aye zu;
Nalé ate bot be ngenane te bialé b'aye kañe YEHOVA;

19 Na, a nga fombô mfa'a ya si a too éyôp (e yôp ?), vôm a ne étyi;
YEHOVA a nga fombô si nyô a too e yôp.

20 Ane a ye wô'ô mintate mimbôk;
Ane a ye suu ba be ne ntelane ya wôéban.

21 Nalé ate bôt b'aye kañete jôé YEHOVA Siôn,
A ékaña'a e Yérusalem;

22 Eyoñ meyoñe me bôt m'aye sulan,
A bijôé na, be kañe YEHOVA.

23 A nga te'elane ngule jam e zene yôp ;
A nga tyi'i melu mam étun.

24 Me nga jô na, A Zambe wom, te vaa ma e ézezañe ya melu mam :

Wo mimbu miôé mi ne akekui miaé mi bôte mise !
 25 Melu kôa ô nga bôé mbôka' a ya si nyô;
 A yôb e ne ésaé ya mo môé.
 26 Mbie bi aye jañ, ve wo w'aye tabe;
 Yaa, bise bi aye bo minnôm aval ane ngômesan;
 W'aye kôñelane bie aval ane ngômesan, a bi aye lô :
 27 Ve ô too avale da,
 A mimbu miôé mi aye bo te nné.
 28 Bone bebobisaé bôé b'aye tabe mvo' é,
 A mvoñe bôte jap j'aye bo ngul asu dôé.

Nkañan amu mvame YEHOVA

(Besam 30 ; 116 ; 145 ; Kol 3 : 15 ; I Tes 5 : 18)

Sam David.

103

1 A nleme wom kañe' YEHOVA;
 A mam mese me ne ma e nlem, kañane mfufube jôé wé.
 2 A nleme wom, kañe' YEHOVA,
 A bo te vuane mam mé mese me ne mvaé :
 3 Nyô a jamé mbia be mam môé mese;
 Nyô a yete akone dôé ese;
 4 Nyô a kôté ényiñe jôé e Awu;
 Nyô a kôté wo ényiñe jôé e Awu;
 Nyô a jalé wo ékate ya mvam a nkoan éngôngo;
 5 Nyô a jalé wo a mbamba be mam nté ô vee,
 Nalé éyoñe mongô jôé j'abeta bo mfefé aval ane ndôé.
 6 YEHOVA a bo akuna' a a zôsôa ntyi'ane mejô
 Mfa' a ba bese b'awu ékpwe'ele.
 7 A nga liti Môze mezene mé,
 A bone be Israël mimboane mi mam mié.
 8 YEHOVA a ne nkoane bôt éngôngol a mvam.
 A ne te ji' a yaa, a ne fe mvam abui.
 9 A ye bo te lebe bôt melu mese,
 Nalé fe a ye bo te jibi nnôm éto.
 10 A nji bo bia ane d'ayiane mam abé mangan,
 nge ya'ane bia ane d'ayian mbia be mam mangan.
 11 Amu ane jôp d'akandane si nyô ôyabe yôp,
 Abim ete fe mvame jé é ne mfa' a ba b'ako nye woñ.
 12 Nté vôm jôp d'atôô a kandane vôm d'adim,

- Nté ôte fe a vaaya bia mintyamane metiñe miangan.
- 13 Aval ane ésa a ko bone bé éngôngo,
Nalé ate YEHOVA a ko ba b'ako nye woñ, éngôngo.
- 14 Amu a yem ntéane wongan,
A simesane na bi ne metek.
- 15 Amu mfa'a mô, melu mé me ne aval ane bilok;
A sam aval ane sam meyañ ya afup.
- 16 Amu évuñulu j'alôte je yôp, é keya hik;
A vôm é nga too aye bo te fe yeme je.
- 17 Ve mvame YEHOVA é too nnôm éto akekui nnôm éto e be ba b'ako nye woñ,
a zôsô wé akui e bendaé;
- 18 E be ba b'aba'ale élate jé,
A simesane bo memvinda mé.
- 19 YEHOVA a kômeya éto njôane jé e yôb été,
A éjôé jé j'ajô biôm bise.
- 20 Mia beéngle bé, kañane YEHOVA,
Mia biwôlô bi bôt mi abo mejô mé, mi avô'ôlô tyiñe ya ajô dé!
- 21 Kañane YEHOVA, mia minsamba mewosan mié mise,
Mia bebobisaé be, mi abo mam a nye'e.
- 22 Kañane YEHOVA, mia bisaé bié bise, vôm ase ya éjôé jé :
A nleme wom, kañe' YEHOVA !

Ane YEHOVA a ba'ale biôm a nga té

(Met I; Besam 8; 19:1-7; 147; 148; Nkul 4:11)

104

- 1 A nleme wom, kañe' YEHOVA.
A YEHOVA Zambe wom, w'adañ éwôlô;
O be'e duma a étôtok !
- 2 Nyô a jalé émien a éfufub aval ane ngômesan,
Nyô a ndamé yôb aval ane éndelé ;
- 3 Nyô a bem mekône ya menda mé e mendim été,
Nyô a bo minkut bikalik bita bié ;
Nyô a wulu e mefabe me évuñulu yôp ;
- 4 Nyô a bo biviñulu minlômane mié ;
Nduan a minkaba'a bebobisaé bé ;
- 5 O nga telé si e mimbôka'a mié yôp,

- Nde ete j'aye bo te ke'e fô'ôsan.
- 6 O nga buti je mañ aval ane ngômesan ;
Mendim me nga yandane beta minkôl e yôp.
- 7 Me nga mate nlebane wôé ;
Me nga ji'a kôlô a tyiñe ndum mveñe wôé.
- 8 Beta minkô be nga tebe, mimbi'illi mi nga silane si,
Akui vôm ô nga kôme mie.
- 9 O nga tyi'i minné ane m'aye bo te lôl ;
Ane m'aye bo te beta bulan a yandane si.
- 10 O nga bo menjeñ me kui e mimbi'ili été ;
M'alôt e zañe minkô ;
- 11 M'anyuu tit ése ya fé mendim ;
Bijakase ya fé bi atyi'i évé jap.
- 12 Anone ya yôt e bili éto jab été ;
D'akobô e zañe mintya bilé.
- 13 W'asôé beta minkô mendim m'aso e ôzolom éto wôé :
Si é nto ne lut a bibuma ya ésaé jôé.
- 14 W'abo ôbute na ô faa mfa'a biyem,
A bilo'o na môl a bé;
Nde ete a ye yô bidi bi so'o e si ;
- 15 A wain a ve nleme môl mevak,
A mbone ya bo asu dé e faé,
A bidi bi ave nleme môl ngu.
- 16 Bilé bi YEHOVA bi asôébane mendim,
Bekédar be Liban, mbe a nga bé ;
- 17 Vôm ate anon d'alôñe mumba'a map :
Bingo a bili mvô'ô jé e bilé bi sipres.
- 18 Beta minkôle mi ne ôyabe yôp mi ne jôme bikela ya fé ;
Mekôm meko'o me ne asoé mfa'a sôn.
- 19 O nga télé ngon mfa'a ya biyoñe mimbu :
Jôp d'ayem éyoñ d'adim.
- 20 W'abo dibi, a alu e ntoo,
Eyoñ éte betite bese ya fé b'akui atan.
- 21 Bitoñe beñbweñbwem bi abam a tôñe betit b'aye bi,
A jeñe bidi biap e be Zambe.
- 22 Eyoñe jôp d'atôô, be ve kôlô,
A bô'ôbô si e bibô'a biap.
- 23 Môl a kui atan a ke e ésaé jé,

- A bo ésaé jé akekui mamengô'é.
- 24 A YEHOVA, ngo'o aka'a abui bisaé biôé bi né !
O nga té bie bise a fek :
Si é nto ne lut a bitétéa biôé.
- 25 Mañ me ne valé, anen a ndam,
Nne biôm bi awulu été te ke alaíé,
Betit be ne tyôtyoé a ba be ne anen bebaane.
- 26 Nne miel mi awulu été ;
Vôm ate zo'omañ ô nga té na a bo bivoé été.
- 27 Biôm bise bi bi ayange wo,
Ane w'aye be bie bidi biap éyoñ j'ayian.
- 28 Eyoñ w'ave be bie, bakôan;
Eyoñ w'akui wo wôé, b'ajaé a mbamba be biôm.
- 29 Eyoñ w'asolé asu dôé, fe'e j'ajañe be,
Eyoñ w'avaa mvebe wop, b'awu a bulan e mete'e map.
- 30 Eyoñ w'alôm Nsisime wôé, b'atéban;
A bo na si é yené mfefé.
- 31 Duma YEHOVA e tabe'e nnôm éto;
YEHOVA a va'ak a bisaé bié.
- 32 Nyô a fombô si, a j'afô'ôsan ;
A nambe beta minkô, a mi akui ôtita.
- 33 M'aye yia YEHOVA bia nté me vee :
M'aye yia Zambe wom bia bi ékaña'a éyoñ me bili ényiñ.
- 34 Osimesane viam ô bo'ô zam e be nye :
M'aye va'a e be YEHOVA.
- 35 Kañese'e na beboabé be jañ e si nyô,
A mbia be bôt be bo te fe tabe !
A nleme wom, kañe' YEHOVA !
Kañe YEHOVA !

Bitua bi mam YEHOVA a bo amu Israël

(Deut 8 :2 ; 1 Mink 16: 8 -22 ; Neh 9 :6-25 ; Besam 78 ; 103 :2 ; M.M. 7 :2-38)

- 105** 1 Tameka veane YEHOVA akéva, lo'ene jôé dé;
kañeta'ane minmboane mié e meyoñe me bôt été.

2 Yiane nye bia, yi'ane nye bia bi ékaña'a;
La'an ajô bitua bi mame bié minlañ !

3 Wuma'ane e mfufube jôé wé été :
Nleme ba b'ajeñe Jehova ô va'ak

4 Jeñane YEHOVA a ngule jé;
Jeñan asu dé mbane mban !

5 Simesa'ane bitua bi mame bié a nga bo,
Mam mé ya semé, a mintyi'ane mejô a nga kobô.

6 A mia mvoñe bôt Abraham mboésaé wé,
Mia bone be Yakob, mintobane mié.

7 A ne YEHOVA Zambe wongan :
Mintyi'ane mejô mié mi ne si ése.

8 A nga simesan élate jé melu mese,
Ajô a nga jô toyina miaé mi bôt.

9 Elat a nga bo a Abraham,
A minkale mié ya be Isaak.

10 Ane a nga yemete mie e be Yakob mi bo ntelane mvinda,
A bo mie Israël élate ya nnôm éto.

11 A jô na, Wo m'aye ve si Kanaan,
Akabe ya ngabe jôé.

12 Eyoñ be mbe ve ôbe abime bôt mfa'a ya tañ,
Yaa, tyôtyoé a mintabe ya été.

13 Ane be nga ke b'andeiñ e meyoñe meyoñi,
Ataté éjôé jia akui ayoñe bôt avok.

14 A nji kañese na môť a kpwe'ele be;
Yaa, a nga lebe bejô bôt amu ajô dap,

15 A jô na, Te nambane bôt bam be ne ñwo'ane mbon,
A te boane bekulumejô bame jôm.

16 Ane a nga loene mfubale zaé e si éte;
A nga bu'u ntum bidí ôse.

17 A nga lôme be môť ôsu;
Yôsef, be nga kuan ane ôlo;

18 Be nga bo mebo mé mintae a bibom;
A nga vambe e mengôkobe bityé été,

19 Akekui ajô a nga jô e nga boban,
Ajo YEHOVA e nga ve'ele nye.

20 Njô bôt a nga lôme bôt be kuli nye ;
Njôô ya meyoñe me bôt a nga suu nye a ke zesé.

21 A nga telé nye évete ya nda jé,
A njôô ya biôme bié bise ;

22 A ka'a bone be njô bôte bé ane a nye'e,
A ye'ele'e bemvendé bé ñyemane mam.

23 Israél fe a nga kui e Egipten;
A Yakob a nga bo ntabe e si Kam.

24 Ane YEHOVA a nga dañe fôlô bôte bé,
A nga bo be ngu be dañe besinë bap.

25 A nga kôñelane minleme miap na be siñe bôt bé,
A bo bebobisaé bé mam biles.

26 A nga lôme Môze mboésané wé,
A Aaron, nyô a nga top.

27 Be nga liti mendeme mé e zañe jap,
A bitua bi mam e si Kam.

28 A nga lôme dibi, a bo je dibi;
Ane be nga bo mejô mé melo.

29 A nga kôñelan asôé dap e vesane bo metyi,
A nga wôé kose jap.

30 Si jap é nga jaé minkongo
E menda bejô bôte bab éte.

31 A nga kobô, ane dute minlo e nga so,
A beédañsi jab ése.

32 A nga ve be meta'a ane mveñ,
A nkaba'a nduan e si jap.

33 A nga ndamane fe mindi'i mi wain miap a bilé bi fige biap,
Ane a nga bu'u bilé ya mesi map.

34 A nga kobô, ane bitanda'a bi nga so,
A bamba'a, te ke alañé,

35 A be nga di élo' ése ya si jap,
A be nga di bibuma ya afube dap.

36 A nga wôé fe ntôl ôse ya si jap,
Atata'a ya ngule jab ése.

37 A nga liti Israél zene ya kôlô a silba a gôlt;
Nde te ke môte ya bitunga bi bôte bi a nga te'ebe été.

38 Egipten a nga yen mvaé éyoñ be nga kôlô;
Amu woñ be nga ko ô nga bi be.

39 A nga ndamé nkut ô bo ébuta'a,
A nduane ya ve éfufub a alu.

40 Be nga sili, ane a nga soo abem,
Ane a nga ve be fembe ya yôb abui abui.
41 A nga dii akok, ane mendim me nga vam;
Me nga lô t vôm si é mbe nkôt aval ane asôé.
42 Amu a nga simesane mbamba atiñe wé,
A Abraham mboésaé wé.
43 A nga liti bôte bé zene ya kôlô a mevak,
A bôte bé a nga tob a ñyiane bia.
44 Ane a nga ve be mesi meyoñe biku;
Nde be nga nyoñe bibuma ya ésaé meyoñe me bôt ane jôme jap.
45 Asu'ulane ya été e ne na, b'aye ba'ale mintelane memvinda mié,
A ba'ale metiñe mé. Kañane YEHOVA !

Melo me Israël a minyiane mi YEHOVA

(Neh 9:26-35; Besam 78; 105; Rôm 11:23, 25-29)

106 1 Kañane YEHOVA !

Tameka veane YEHOVA akéva; amu a ne mvaé;
Amu mvame jé é to nnôm éto.
2 Za a ne ngule ya tote biwôlô mimboane bi YEHOVA,
Nge liti дума dé ese ?
3 Ebotan a ba b'aba'ale zôsôa ntyi'ane mejô,
A nyô a bo zôsô biyoñe bise.
4 Simesa'ane ma, A YEHOVA, a mvam w'amvamane je bôt bôé ;
Tame jome ma a nyiane wôé.
5 Nde m'aye yene mefo'o mintobane miôé,
Nde m'aye vak a ava'a ya ayoñe dôé,
Nde m'aye wum a ngabe jôé.
6 Bia betate bangan bi nga bo abé,
Bi nga bo mbia jam, bi nga bo ékotekot.
7 Betate bangan, éyoñ be mbe e Egipten,
Be nga bo te simesane mefo'o ya mvame jôé,
Ve be nga bo Nyô a Dañe Mbetane Yôp melo e mfôme mañ,

E mfôm Evele Mañ.

8 Akôsabo nalé, a nga nyii be amu jôé né (dé ?).
Ane a nga liti abui ngule dé.

9 A nga bame fe Evele Mañ, ane é nga kôt :
Nalé ate a nga lôto be e bido'été,
Aval ane e nkôte si.

10 Nalé a nga nyii be e mo me nsiñe wop,
Ane a nga kôté be e mo me nsiñ ate.

11 Ane mendim me nga yandane besiñe bap e yôp ;
Te ke wua ya été a nga li'i.

12 Eyoñ éte be nga buni mejô mé;
Be nga yia дума dé bia.

13 Be nga ji'a vuane mimboane mié ;
Be nga bo te yange mbôndane fe'e wé.

14 Ve be nga dañe bo mbia ndok e nkôte si,
A ve'ele Zambe e fé été.

15 Ane a nga ve be jôm be nga ja'é,
Ve a nga lôme be mbia ôkon e zañe jap.

16 Eyoñe bôt be nga sengane Môze a minkan,
A Aaron, mbamba môta Zambe,

17 Ane si é nga tui a mine Dathan,
A buti nsamba Abiram.

18 Nduane fe é nga tôtan e nsamba wob été;
Nkaba'a nduan ô nga di'i bikotekote bi bôt.

19 Be nga bo mon ényaka e Horeb,
A kañ nluian éve'ela'a.

20 Be nga kôñelane дума Zambe
E bo éfunane nnôm ényaka a di bilok.

21 Be nga vuane Zambe Nyii wop,
Nyô a nga bo beta be mam e Egipten.

22 Bitua bi mam e si Kam,
A beangôndô be mam e mfôm Evele Mañ.

23 Ajô ete, a nga jô na, A ye jiane be –
Nge te Môze, nyô a nga top, a za'a te asu dé,
A vaa ayaa dé na, a za jiane be.

24 Yaa, be nga biasé mbamba si,
Be nga bo te buni ntiñetane wé.

25 Ve be nga kobô menyii e menda betendé bab été,

A be nga bo te vô'ôlô tyiñe YEHOVA.
26 Ajô ete, a nga bete wo, a kalane be na,
A ye mane wua be si e fé été.
27 A na, a ye tyamelan mvoñe bôte jap e meyoñe mese été,
A miase be e mesi mesi.
28 Bebiene fe be nga ke fubu e be Baal-Pérór,
A di biôm be nga tyi'i miñwuan.
29 Ane be nga soñe YEHOVA na a yaa a miboane miap;
Ane ébubua ôkon éte é nga kui e be be.
30 Eyoñ éte, Finehas a nga kôlô si, a vañ ;
A nalé ébubua ôkon é nga tebe.
31 Ane jam ete e nga lañebane mfa'a wé ane mekabe,
Ataté miaé akui miaé nnôm éto.
32 Be nga bo nye na a yaa e mendim ya Mériba,
Nalé ate e nga bo abé mfa'a Môze amu ajô dap;
33 Amu be nga bo nsisime wé ayô,
Ane a nga jopetane bifia a biyaé bié.
34 Be nga bo te jiane meyoñ,
Aval ane YEHOVA a nga bendé be.
35 Ve bebien be nga fulan a meyoñe mete,
A ye'é bo mimboane miap.
36 Be nga kañe bengunemelane bap,
Mbe bete be nga bo ékoé mfa'a wop.
37 Yaa, benga tyi'i mbia minsisim
Bobefame bap a bengo bap.
38 Be nga sôé metyi me ne te bijô,
Metyi me bobefame bap a bengo bap,
Mbe be nga bo be tyi'i bengunemelan ya Kanaan;
Ane si é nga bo nsem a metyi map.
39 Nalé be nga bo mvin a mam be nga bo,
A bo mam bijabô a mimboane miap.
40 Ajô ete ayaa YEHOVA e nga yôñe bôte bé nyô,
Ane a nga wô'ô ngabe jé nyé.
41 Ane a nga ve be e mo meyoñe biku,
Nalé ate ba be nga siñe be be nga jôô be,
42 Besiñe bap be nga kpwe'ele be,
Nde be nga suubane si e ngul éjôé jap.
43 Biyoñ abui a nga nyii be;

Ve be nga bo melo e mefe'e map.
 A suubane si e abé dap été.

44 Akôsabo nalé a nga simesan éngôngole jap,
 Eyoñ a nga wô'ô ñyône wop :

45 Ane a nga simesan élate jé ajô dap,
 A nga jôban aval ane abui mvame dé e né.

46 A nga bo na be kooban éngôngo
 A ba bese be nga bili be minkôm.

47 N'yi'i bia, A YEHOVA Zambe wongan,
 A kôane bia bi kôlô e be meyoñe biku,
 Ane bi aye ve mfufube jôé wôé akéva,
 A wum a дума dôé.

48 Ebotan é bo'o YEHOVA, Zambe Israël,
 Ataté nnôm éto akekui nnôm éto!
 A bôte bese be jô'ô na, Amen !
 Kañane YEHOVA!

KALATE TANE

YEHOVA a nyii bôt mfa'a ya baa minjuk

(Yiôb 33:19-30; 36:8-11; Besam 25:22; 126; Yes 63:7, 9;
 Ezék 36:33-38; Oséa 14:9)

107

1 Tamka veane YEHOVA akéva; amu a ne mvaé;
 Amu mvame jé é to nnôm éto !

2 Minkôtane mi bôt mi YEHOVA mi jô'ô nalé,
 Ba a nga kôté mfa'a ya njuk,
 A kôane be be so'o e mesi mesi,
 Mfa'a jôp d'atôô a mfa'a d'adim,
 Mfa'a ya akôé a mfa'a ya nké.

4 Bevo'o be kele b'andéñ e minkôte mesi,
 Teke yen zen ya nlame ya tabe été;

5 Nwô'ane zaé a évé,
 Nlem ô nga ku be som e abum été.

6 Nde be nga yôn e be YEHOVA éyoñ be nga yen njuk,
 Ane a nga nyii be mfa'a minju'u miap.

7 Ane a nga wulu be e zen é ne zôsôô,
 Akui be nga kui e nlame ya tabe été.

8 Ngo'o nge bôt be nga ye kañe YEHOVA amu mvame jé,
Amu bitua mimboane bié a nga bo bone be bôt !

9 Amu a jalé nleme nyô a wô' évé,
A nlem w'awô'ô zaé a jalé wô mbamba be biôm.

10 Bevo'o be nga too e dibi a e éjijin été,
Mmibô'ô mi éngôgo a e mengôkop bityé été.

11 Amu be nga bo mejô me Zambe melo,
A biasé fe'e Nyô a Dañe Mbetane Yôp.

12 Minleme miap mi nga vitibi si a ayete bisaé
Be nga ku si, a môte ya volô a mbe momo.

13 Nde be nga yôn e be YEHOVA éyoñ be nga yen njuk,
Ane a nga nyii be mfa'a ya minju'u miap.

14 A nga vaa be e dibi a e éjijin été,
Ane a nga té mengata'a map ne tos.

15 Ngo'o nge bôt be nga ye kañe YEHOVA amu mvame jé,
A amu bitua mimboane bié a nga bo bone be bôt !

16 Amu a nga tyam mimbé mi mvot,
A bu'u mimbôñe bityé bitun.

17 Mekute me bôt me nga yen abé amu ntyamane metiñe wop
A amu mbia be mam map.

18 Be nga vini mevale bidi mese,
A subu bebé e mimbé ya awu.

19 Nde be nga yôn e be YEHOVA éyoñ be nga yen njuk
Ane a nga nyii be mfa'a ya minju'u miap.

20 A nga lôm ajô dé, a saé be,
A nga nyii be mfa'a ya njañan.

21 Ngo'o nge bôt benga ye kañe YEHOVA amu mvame jé,
A amu bitua mimboane mié a nga bo bone be bôt !

22 Nde be va'a nye metuna'a me ékaña'a,
A kañete mimboane mié a ñyiane bia.

23 Bevo'o be nga ke e mañ e miele yôp,
A bo akum e beta be asôé yôp.

24 Be nga yen mimboane mi YEHOVA,
A bitua bi mam bié e édo' été.

25 Amu a nga jôô, ane ôkôs évuñulu ô nga bet,
Ñwô ô nga bete mintyôa mi mañ.

26 Be nga bet e yôp, be nga sise si e bido' été ;
Nleme wob ô nga nyeme amu njuk.

27 Be nga yô bendôlô a meñ aval ane beso'o bilam,
A be nga too fé'e ne vema.

28 Nde be nga yôn e be YEHOVA éyoñ be nga yen njuk,
Ane a nga nyii be mfa'a ya nju'u wop.

29 A nga tooé ôkôs évô,
Nalé ate mintyôa ya été mi nga bo ne mieññ.

30 Nde be nga yen mvaé amu be nto ne mieññ ;
Ane a nga kee be e abôn be nga kômbô.

31 Ngo'o nge bôt be nga ye kañe YEHOVA amu mvame jé,
A amu bitua mimboane bié a nga bo bone be bôt !

32 Be wumulu'u fe e ékôane bôt été,
A kañe nye e ékôane bemvendé be bôt été.

33 A kôñelan asôé e bo nkôte si,
A menjeñ me bo si é ne te mendim ;

34 A si é ne atek é bo fé é ne nku,
Amu mbia be mam ya ba be too été.

35 A kôñelane nkôte si ô bo ébata'a mendim ;
A si é ne nkôt é bo mejeñe mendim .

36 A vôm ate a tooé ba b'awô'ô zaé,
Ane b'aye lôñe nlame ya tabe.

37 A miase bidi e mefup, a bé mindi'i mi wain,
Ane b'aye nyoñe bibuma bi awum été.

38 Amu ébotane jé, nalé ate be nga dañe fôé abui ;
A nga bo te yebe na biyeme biap bi wulan.

39 Ve éyoñ be nga beta wulan a vitibi si amu ékpwe'ele, njuk, a ôlun,
40 A nga sôé bone bejô bôt ôsone nyô,
A bo na be ndeñe fé été, vôm zen é ne momo.

41 Ve a bete éngôngole mô e yôp, a vaa nye e ékpwe'ele été,
A bo be menda me bôt aval ane mbam biyem.

42 Bezôsôô be bôt b'ayene de, a yen mvaé;
A abé ese d'aye dib anyu dé.

43 Nyô ase a ne fek, a tame vô'ôlô mam ma ;
Bôt be tame simesan mvame YEHOVA.

Nkañane YEHOVA a meye'elane ya ja'é nye ndañan

(Besam 57:8; 60:7)

Jia, Sam David.

108

- 1 Nleme wom ô ne nkômesan, A Zambe,
Nleme wom ô ne nkômesan !
M'aye yia bia, yaa, m'aye yia bia bi ékaña'a !
Ve' ôyo, A nleme wom !
- 2 Ve' ôyo, a mvet a éngombé;
M'aye vee ôyo mametyé !
- 3 M'aye ve wo akéva, A YEHOVA, e meyoñ été;
A m'aye yia wo bia bi ékaña'a e meyoñ été.
- 4 Amu mvame jé é ne anen a dañe yôp ;
Benya mejôô bôé m'akui e minkut été.
- 5 Bete'e womien e yôb, A Zambe, adañe yôp,
A дума dôé e dañe sí nyô ése.
- 6 Nde môte wôé w'anye'e a ye nyiñ,
Volô'ô a mbonnôme wôé, a yalane ma !
- 7 Zambe a nga tiñeti e mfufube nda wé été :
A mevak, m'aye kabe Sikem, a ve'e Mbi'ili Sukot.
- 8 Galaad a ne éñwom; Manassé a ne éñwom;
Efraim ane fe ékôngô jam;
Yuda a ne ntum éjôé wom ;
- 9 Môab a ne ésua mewobane jam ;
M'aye wua Edom ékôndé jam ;
M'aye fôn e Filista a bia mevak.
- 10 Za a ye kee ma e nlam ô ne nlôñan ôngôla ?
Za a ye li'itane ma e Edom ?
- 11 Ye ô nji ben bia, A Zambe ?
O nji ke e minsambe mewosane miangan, A Zambe.
- 12 Volô'ô bia mfa'a môat a siñe bia ;
Amu mvolane môat ô ne momo jôm !
- 13 Amu Zambe bi aye bo ngu :
Amu nnye a ne nyô a ye tibi besiñe bangan e si.

Nsilan akuna'a mfa'a besiñ

(Besam 35 ; 69 ; M.M. 1 :16-20)

THEOPHILE OYONO MEYE

109

- 1 Te tabe évô, A Zambe ya ékaña'a jam !
- 2 Amu menyu me mbia be bôt a bôte medu'an, me kuibaneya ma e nyô,
B'akobô ma a ayem minsos.
- 3 B'ayabe fe ma a mejô me ziñ,
A b'awosne ma te étom.
- 4 Señe ya nye'ane wom b'ave ma mekua :
Akôsabo éyoñ me m'aye'elan ajô dap.
- 5 Nalé b'aya'ane ma abé mfa'a ya mvaé,
A ziñ mfa'a ya mvaé, a ziñ mfa'a ya nye'an wom.
- 6 Telé'é mbia môt a wosane nye,
A kañese na mbo'olô a tebe nye e mbonnôm.
- 7 Eyoñ b'atyi'i nye ajô, a kui atan a to mekua.
A kañese na, meye'elane mé me veñesan abé.
- 8 Melu mé me bo'o tyôtyoé,
Môt mfe a nyoñe' akume dé.
- 9 Bone bé be bo'o bobenyui,
A minga wé a bo'o nkus !
- 10 Bone bé be kele b'andehn a zak;
be titeba'an e bili'i be too.
- 11 Nsé mvôla a mane'e nyoñe biôm bise a bili;
Bejin be sa bibuma ya ésaé jé !
- 12 Te kañese ma môt a ne ko nye éngôngol a bo;
To'o môte ya mvamane bobenyui bé !
- 13 Mvoñe bôte jé é tyi'iba'an étun ;
Jôé dé e tyamba'an e miaé baa !
- 14 Abé beésaa bé e kui ôsimesan asu YEHOVA ;
A te kañese na abé nyia e tyamban.
- 15 Be tabe' asu YEHOVA éyoñ ése,
A ôsimesane wop ô tyi'i e si nyô !
- 16 Amu a nga bo te simesane bo mvam,
Ve a nga kpwe'ele nzôzoé môt a ôwutuk,
A ba be ne ntya'an minlem akui awu dap.
- 17 A nga nye'e a yoké'é bôt; biyo'é bi kuik e be nye !
A nji nye'e ajô ébotan; nje é bo'o nye ôyap !
- 18 A nga jaé fe biyo'é aval ane alô'ô dé,
E nyi'ine nye nyô aval ane mendim,
Aval ane mbon e bivese bié été !

- 19 E bo' o aval ane ngômesan a vute nyô,
Aval ane ases nde a jalé émien môs ôse !
- 20 Mana me ne meya' ane besiñe bam, mme m'aso e be YEHOVA,
A ma me ba b'akobô nsisime wom abé.
- 21 Ve wo, A Zambe Nti wom,
Bo' o nalé e mvame jam amu jôé dôé;
Amu mvame jôé é ne mvaé, nyi' i ma !
- 22 Amu me ne nzôzoé a ôwutuk,
Nde nleme wom ô tya' abaneya e abum été.
- 23 Me lumbuya aval ane nsisiñ éyoñe ya mamengô' é ;
M'ase'eseban aval ane étandak.
- 24 Meboñe mam me nto atek a mbômbane zaé ;
A minsône miam mi maneya bo nkôte nkôt.
- 25 Me nto jôm ékpwe'ele e be besiñe bam;
Eyoñ b'ayene ma, b'afô'ô minlô miap.
- 26 Volô'ô ma, A YEHOVA Zambe wom !
Tame nyii ma aval ane mvame jôé é né :
- 27 Kañes'e be yeme na, wo wôé le ;
Na, wo YEHOVA, ô boya jam ete !
- 28 Be yoké' é, ve wo bota' an !
Bôt b'akui ma ékukua, b'aye veban ôsone nyô,
Ve mboésaé wôé a ye vak.
- 29 Kañes'e na, besiñe bam be jaé ôsone nyô,
Be jaék ôsone viap bebien aval ane alô'ô !
- 30 M'aye ve YEHOVA beta akéva a anyu dam;
Yaa, m'aye kañe nye e abui bôt été.
- 31 Amu a tele e mbonnôm ôwutuk,
A nyii nye e be ba b'ave nye mekua me awu.

YEHOVA a ve Njô bôt ngul éjôé

(Besam 2 :6-12 ; Mat 22 :41-46 ; M.M. 2 :33-36 ; Beheb 7)

Sam David.

110 1 YEHOVA a jô Nti wome na :

— OYONO MEYE

- Tabé' e mbonnôme wom,
 Akekui m'abo besiñe bôé étélé mebo jôé.
- 2 YEHOVA a ye lôm éwôlô ntume njôô jé, é so'o e Siôn :
 Jô'ô e zañe besiñe bôé.
- 3 Bôte bôé b'aye nye'e be va'a bebien
 Môs w'aliti nsamba mewosane wé e mimfufube minkô,
 Aso e abum melende me tyé,
 Aval ane élok, bendômane bôé b'aye zu e be wo.
- 4 YEHOVA a maneya kalan, a ye bo te jôban :
 O ne pretre nnôm éto, aval ane Melkisédek.
- 5 YEHOVA a to e mbonnôme wôé;
 A ye ko'o bejô bôt e môs a ye yaa.
- 6 A ye tyi'i mejô e meyoñe me bôt été,
 A jalé' é be mimbim mi bôt;
 A ye ko'o bivete ya ngume si wu.
- 7 A ye nyu ôtoñ e zene yôp :
 Ajô ete a ye bete nlô wé e yôp.

YEHOVA a nyoñ ékaña'a amu mvo'é jé

(Deut 4:5-8, 32-40; Besam 145)

111

- 1 Kañane YEHOVA,
 M'aye ve YEHOVA akéva a nleme wom ôse,
 E nsamba bezôsôô be bôt été,
 A e ékôane bôt été.
- 2 Mimboane mi mam mi YEHOVA mi ne anen,
 Ba bese b'ayene mie mvaé b'ayé' é mie.
- 3 Esaé jé é ne njalan a дума a étôtok ;
 A zôsôô wé a too nnôm éto.
- 4 A nga bo bitua mimboane bié jame ya simesan ;
 YEHOVA a ne mvam a nkoane bôt éngôngo.
- 5 A ve ba b'ako nye woñ bidi :
 A simesan élaté jé kom ése.
- 6 A nga liti bôte bé ngule mimboane jé,
 A mvean a nga ve be ngabe meyoñe biku.
- 7 Mimboane mi mam ya mo mé mi ne benya mejôô a zôsôô ;
 Miñye'elane mié mise mi ne mi ya buni.

- 8 Mi ne ntelan mfa'a ya nnôm éto a nnôm éto,
Mi ayiane boban a benya mejôô a zôsôô.
- 9 A nga lôme bôte bé nyian ;
A nga tiñeti élate jé mfa'a ya nnôm éto :
Jôé dé é ne étyia angôndô.
- 10 Nkoane YEHOVA woñ ô ne atata'a ya ñyemane mam ;
Ba bese b'ao metiñe mé be bili nya fe'e.
Ekaña'a jé é too nnôm éto !

Nnenane nyô a ko YEHOVA woñ

(Besam 1; 128; Min 14:26, 27)

112

1 Kañane YEHOVA !

- Mvom a mô t a ko YEHOVA woñ,
Nyô a dañe yen memvinda mé mvaé.
- 2 Mvoñe bôte jé j'aye bo éwôlô e si nyô :
Miaé bezôsôô be bôt w'aye yen ébotan.
- 3 Biôm a akum bi ne e nda jé;
A zôsôô wé a to nnôm éto.
- 4 Efufup j'afaé mô t a ne zôsôô dibi été :
YEHOVA a ne mvam, nkoane bôt éngôngol a zôsôô.
- 5 Mvo'é a mô t a mvamane bôt a kôlé be biôm ;
Nyô a wulu mam mé zôsôô.
- 6 Amu zôsôa mô t a vo'o fô'ôsan;
b'aye simesane nye nnôm éto.
- 7 A ye bo te ko mbia mefoé woñ;
Nleme wé ô yeme, ntaban a tabe YEHOVA mebun.
- 8 Nleme wé ô yeme ngu, a ye bo te ko woñ,
Akekui a ye yene nkômbane wé e be besiñe bé.
- 9 A nga kabe biôm ane a nye'e, a nga ve minzôzôé;
Zôsôô wé a to nnôm éto; nla'a wé ô ne mbetane yôb a duma.
- 10 Mbia mô t a ye yene de, ve wô' abé;
A ye latane mesôñe mé, a nyeme;
nkômban mbia mô t w'aye kui momo.

YEHOVA a bete bôt be ne minlem évôvoé e yôp

(1 Sam 2:1-8; Besam 8; 96; 97)

113

1 Kañane YEHOVA !

Kañan, mia bebobisaé be YEHOVA,

Kañane jôé YEHOVA !

2 Ebotan é bo'o jôé YEHOVA,

Ataté éyoñe ji akeuin nôm éto.

3 Ataté vôm jôp d'atôô akekui vôm d'adim,

Jôé YEHOVA d'ayiane nyoñ ékaña'a !

4 YEHOVA a ne ôyabe yôp a dañe meyoñe mese,

A étôto'o jé j'adañe miñyeme ya yôb ôyabe yôp.

5 Za a ne aval ane YEHOVA Zambe wongan,

Nyô a bili éto jé e yôb été,

6 Nyô a bebe mfa'a ya si a fombô

Biôm bi ne e yôb a e si nyô ?

7 A bete nzôzoé e si a vaa nye e mbulu' été,

A bete mbubua e si a vaa nye e asub été;

8 A toé be baa be bone bejô bôt,

Baa be bone bejô bôt be bôte bé.

9 A ve nkôkôme minga nda,

A bo nye meva'a nyia bon,

Kañane YEHOVA !

Nkôtane YEHOVA a nga nkôté Israéla so'o e Egipten

(Besam 77:12-21; 78:12-16; Hab 3:3-13)

114

1 Eyoñ Israél a nga kôlô e Egipten,

Nda bôta Yakob é nga kôlô e be bôt be ne nkobô mfe;

2 Yuda a nga bo nda jé,

Israél éjôé jé.

3 Mañ me nga yene de, ve mate;

Yôrdan a nga tinikan mvus.

4 Beta minkôle mi nga tyele si aval ane beyôm mintômba,

Bone minkôl aval ane bone mintômba.

5 Jé é bo wo, A wo mañ, ane w'amate ?

Wo Yôrdan, ane w'abulan mvus ?

6 Mia beta minkôl ane mi atyele si aval ane beyôm mintômba;

Mia bone minkôl, aval ane bone mintômba ?

- 7 Fô'ôba'an, wo si, asu YEHOVA,
Asu Zamba Yakob,
8 Nyô a kôñelan akôm akok e bo ébata'a mendim;
A ako'o tyabe e bo anjeñe mendim.

Bengunemelane meyoñe biku b'ave'ane YEHOVA

(Besam 135)

115

- 1 Sa e be bia, A YEHOVA, sa e be bia,
Ve jôé dôé nde va'a duma,
Amu mvame jôé a benya mejôô bôé !
2 Amu jé meyoñe bikul m'aye jô na,
Zambe wob a nto vé ?
3 Zambe wongan a ne e yôb été;
A bo jam ese a nye'e.
4 Bengunemelane bap be ne silba a gôlt,
Mboane mo me bôt.
5 Be bili menyu, ve be be ne te kobô;
Mis, ve be ne te yen ;
6 Be bili melo, ve be ne te wôk;
Môé, ve te ke wô'ô menyum;
7 Be bili mo, ve be ne te nambe;
Mebo, ve be ne te wulu;
Nalé fe te bo éduñ a éngoñe jap.
8 Ba b'abo be b'afunane be;
Nalé ate ba bese b'atabe be mebun be né.
9 A Israél, tabe'e YEHOVA mebun :
A ne mvolane wop a ébene jap.
10 A nda bôt Aaron, mi taba'ane YEHOVA mebun !
A ne mvolane wop a ébene jap?
11 Mia bôt mi ako YEHOVA woñ, taba'ane YEHOVA mebun !
A ne mvolane wop a ébene jap.
12 YEHOVA a nga simesane bia;
A ye botane nda Israél;
A ye botane nda bôt Aaron.
13 A ye botane ba b'ako YEHOVA woñ,
Ba be ne tyôtyoé a ba be ne anen bebaane.

14 YEHOVA a fôlô'ô mia abui abui,
Mia a bone benan !

15 Bo'an ébotan e be YEHOVA,
Nyô a nga té yôb a si.

16 Yôb e ne yôbe YEHOVA;
Ve si nyô a vey a je bone be bôt.

17 Mimbim mi ne te kañe YEHOVA,
To'o nyô ase a ke vôm a ne ne mieññ ;

18 Ve bia bi aye kañe YEHOVA
Ataté éyoñe ji akui nnôm éto.
Kañane YEHOVA !

Mvean akéva amu nkôtane ya awu

(Besam 30 ; 66 :8 ; 86 ; Yes 38)

116 1 M'anye'e YEHOVA amu a nga wô'ô
Tyiñe jam a minja'ane miam.

2 Amu a nga vit alo dé e be ma,
Ajô ete m'aye loene nye nté me vee.

3 Bikoé bi awu bi nga bômane ma,
A mintae mi Shéôl mi nga bi ma :
Me nga yen njuk a ôlun.

4 Eyoñ éte me nga loene jôé YEHOVA :
A YEHOVA, m'aye'elane wo na, nyi'i nsisime wom.

5 YEHOVA a ne mvam a zôsôô ;
Zambe wongan a ne ñwô'ane bôt éngôngo.

6 YEHOVA a ba'ale bivôvoé bi bôt :
Eyoñ me nga silibane si, ane a nga nyii ma.

7 Beta'a bulan e awo'ane dôé, A nleme wom ;
Amu YEHOVA a boya wo abui ésôs.

8 Amu ô vaaya nsisime wom e awu,
A mise mam milik, a mebo mam me za ku.

9 M'aye wulu asu YEHOVA,
E si bevevee.

10 Me nga ba'ale mbunane wom, ja'ana éyoñ menga jô na,
Me nga dañe wu ékpwe'ele :

11 Me nga jô éyoñe fe' é nga jañe me na,
Bôte bese b'atabe a zesé ndinlem.

12 Jé m'aye ve YEHOVA

- Mfa' a ya mbamba be mam a nga bo ma ?
- 13 M'aye bete élaé nyian,
A loene jôé YEHOVA.
- 14 M'aye ya'ane mintiñetane miam e be YEHOVA,
Ôsu bôte bé bese.
- 15 Jôm é ne édima e mise me YEHOVA,
E ne awu mbamba be bôte bé.
- 16 A YEHOVA, me ne fo'o mboésaé wôé ;
Me ne mboésaé wôé, mona mboésaé minga wôé ;
O maneya kuli mengata'a mam.
- 17 M'aye ve wo metuna'a me ne mvean akéva,
A loéne jôé YEHOVA.
- 18 M'aye ya'ane mintiñetane miam e be YEHOVA,
E mise bôte bé bese.
- 19 E bitune menda ya nda YEHOVA,
E ézezañe jôé A Yérusalem,
Kañane YEHOVA !

Sam Ekaña'a

(Besam 66 :8 ; 100 ; Rôm 15:8-12;

Nkul 7:9, 10; 15:4)

- 117** 1 Kañane YEHOVA, A mia meyoñe bikule mese !
- Kañane nye, mia meyoñe me bôt mese !
- 2 Amu mvame jé é ne anen mfa'a wongan;
A benya mejôô me YEHOVA me too nnôm éto.
Kañane YEHOVA !

Mvean akéva amu mbamba be mam ya nyiane wé

(Esd 3:10, 11; 6:16; Besam 68; 110; Mat 21:9, 42;

M.M. 4:11, 12; 1 Pét 2:4-7)

- 118** 1 Tameka veane YEHOVA akéva; amu a ne mvaé;

Amu mvame jé é too nnôm éto.
2 Israél a jô' éyoñe jina na,
Mvame jé é too nnôm éto.
3 Nda bôt Aaron, é jô' éyoñe jina na,
Mvame jé é too nnôm éto.
4 Ba b'ako YEHOVA woñ, be jô' éyoñe jina na,
Mvame jé é too nnôm éto.
5 E nju' u wom été, me nga loene YEHOVA :
YEHOVA a nga yalane ma a telé me nti.
6 Vôm YEHOVA a ne ma e ngam ; m'aye bo te ko woñ :
Môt a ne ngule ya bo ma jé ?
7 YEHOVA a ne e fefele jam mfa'a ya volô ma :
M'aye fombô me fônôk mfa'a ba b'asiñe ma.
8 E ne mvaé ya sobô e be YEHOVA
Adañ ane w'atabe ndinlem e be bôt.
9 E ne mvaé ya sobô e be YEHOVA,
Adañ ane w'atabe ndinlem e be bone bejô bôt.
10 Meyoñe bikul mese me nga bômane ma;
A jôé YEHOVA me nga mane me tyik !
11 Me nga bômane ma, bômane ma mimfa'a mise ;
A jôé YEHOVA me nga mane me tyik !
12 Me nga bômane ma aval ane mvô'ôm,
Me nga yôñ aval ane nduane biyo ;
A jôé YEHOVA me nga mane me tyik !
13 Me nga sô'ôlôban ngu, nde me nga ku,
Ve YEHOVA a nga volô ma.
14 YEHOVA a ne ngule jam a jia jam ; A nto nyiane wom.
15 Vô'ôlane bia meva'a me ndañan e menda bindelé me bezôsô be bôt été,
Mbonnôma YEHOVA w'abo mam m'adañ.
16 Mbonnôm YEHOVA ô ne mbetane yôp,
Mbonnôm YEHOVA ô boya ngu !
17 M'aye bo te wu, ve m'aye nyiñ,
A kañete mimboane mi mam mi YEHOVA.
18 YEHOVA a bômeya ma abé,
Ve a nji kalane ma e awu.
19 Di'i ma mimbé mi zôsô,
Ane m'aye nyiine mie
A ve YEHOVA akéva.

- 20 Wuna ô ne mbé YEHOVA ;
Bôt be ne zôsôô b'aye nyiine wô.
- 21 M'aye ve wo akéva amu ô yalaneya ma,
O nto nyiane wom.
- 22 Ako'o belôñ be nga ben,
E nto nlô ako'o ya abu'u nda.
- 23 Wuna ô ne mboane YEHOVA ;
O ne jame ya semé e mise mangan.
- 24 Wuna ô ne mosemôse YEHOVA a nga boya ;
Bi tame vak a yen mvaé été.
- 25 Tame nyii bia, bi aye'elane wo, A YEHOVA :
A YEHOVA, bi aye'elane wo, va'a bia ndañan !
- 26 Ebotan a nyô a zu a jôé YEHOVA !
Bi abotane wo bi to e nda YEHOVA.
- 27 YEHOVA a ne Zambe,
A faé bia éfufup.
Tiñeti'i jôm metuna'a a minko, ja'ana
Akekui e minla'a mi altar.
- 28 O ne Zambe wom, m'aye ve wo akéva :
O ne Zambe wom, m'aye bete wo e yôp.
- 29 Tameka veane YEHOVA akéva; amu a ne mvaé;
Amu mvame jé é too nnôm éto.

Minsimesan a meye'elan mfa'a metiñe me Zambe

(Besam 1; 19: 8; Ekk 12:15; Yes 42:21; Mat 5:17-19; M.M. 24:16;
2 Tim 3:15-17; Yôh 5:3)

ALEPH

- 119** 1 Mvom a ba zene jab é ne te bijô,
Ba b'awulu e metiñe me YEHOVA été !
- 2 Mvom a ba b'aba'ale minkañete mié ;
Ba b'ajeñe nye a nlem ôse.
- 3 Ba be ne te bo jam e ne ékotekot,
Ve wulu a mezene mé été !
- 4 O nga bendé miñye'elane miôé na,

Be tu'a ba'ale mie.
5 Ngo'o nge mezene mam me mbe ke nkôman
Ya ba'ale mintelane memvinda miôé !
6 Eyoñ éte m'aye bo te veban ôsone nyô,
Eyoñe mise mam me beme e mebendé môé.
7 M'aye kañe wo a nlem ô ne zôsôô,
Eyoñ m'ayé'é bezôsôô metiñe bôé.
8 M'aye ba'ale mintelane memvinda miôé,
Te li'i mie nya nli'ane.

BETH

9 Ndômane mô't j'aye bo zene jé mfuban aya ?
A mba'alan a ba'ale je aval ane ajô dôé e né.
10 M'ajeñe wo a nleme wom ôse :
Te kañese na, me yale feñ a li'i mebendé môé !
11 Me nga ba'ale mejô môé e nleme wom été,
Ane m'aye bo te bo wo abé.
12 Ebotan a wo, A YEHOVA;
Ye'ele ma mintelane memvinda miôé !
13 A biyaé biam m'aye kañete
Minjôane mise ya anyu dôé.
14 M'anye'e zene minkañete miôé,
Abim ane m'anye' akum ese.
15 M'aye bindi miñye'elane miôé e nlem,
A beme mise mam e mezene môé.
16 M'aye nye'e mintelane memvinda miôé;
M'aye be te vuan ajô dôé.

GIMEL

17 Bo'o mboésané wôé mvaé,
Nde m'aye nyiñ a ba'ale ajô dôé.
18 Ku'i ma mise mam, nde m'aye yen
Bitua bi mam bi aso e metiñe môé.
19 Me ne ntabe e si nyô ;
Te solé ma mebendé môé.
20 Nleme wom w'adik a nkômban
M'akômbô metiñe môé biyoñe bise.
21 W'akomekane bôt be ne mebun, bôte biyo'é,

Ba b'ayale feñ a li'i mebendé môté.
22 Tame vaa ma e ôsone viap a ébiasé jap été ,
Amu me nga ba'ale minkañete miôté.
23 Akôsabo bone bejô bôt b'atabe si a bo ma mbia ésok,
Mmboésaé wôté a ye bindi mintalene memvianda miôté e nlem.
24 Minkañete miôté mi ne jôm m'ayen mvaé,
Mi ne bebôndé mefe'e bam.

DALETH

25 Nleme wom w'akabetan mbuluk :
Va'a ma ngul e nlem aval ane ajô dôé e né.
26 Eyoñ me nga kañete mezene mam, ane ô nga yalane ma :
Ye'ele'e ma mintelane memvinda miôté !
27 Va'a ma ngule ya yeme zene miñye'elane miôté :
Nalé m'aye bindi bitua mimboane biôté e nlem.
28 Nleme wom w'anyeme amu ôlun :
Va'a ma ngul aval ane ajô dôé e né !
29 Bo'o na mezene minsos me ke ma ôyap ;
A ye'ele ma metiñe môté a mvam.
30 Me tobeya zene benya mejôô :
Me teléya metiñe môté mise mam.
31 M'akabetan a minkañete miôté :
A YEHOVA, te ve ma ôsone nyô !
32 M'aye ke mbi e zene mebendé môté,
Eyoñ w'anene nleme wom.

HE

33 Ye'ele ma, A YEHOVA, zene mintelane memvinda miôté;
Ane m'aye ba'ale je akekui asu'ulan.
34 Va'a ma fe'e nlem ane m'aye ba'ale metiñe môté ;
A kale ma a nleme wom ôse.
35 Liti'i mla me ke e zene mebendé môté,
Amu m'ayen mvaé été.
36 Viti nleme wom mfa'a ya minkañete miôté,
sa mfa'a ya minyamete.
37 Va'a mise mam me bo te fombô mame ya momo,
A ve ma ényiñ e mezene môté été.
38 Tame tôé ngaka'a jôé e be mboésaé wôté,

Nje é ne mfa'a ba b'ako wo woñ.
39 Tame vaa ma minkomekan, mmie m'ako woñ ;
Amu minjôane miôé mi ne mvaé.
40 O lô, m'ayi miñye'elane miôé :
Va'a ma ényiñ e zôsôô wôé été.

VAV

41 Kañese'e na mvame jôé é zu e be ma, A YEHOVA,
Nyiane wôé aval ane atiñe dôé e né.
42 Nalé m'aye bi éyalan ya yalane ba b'akpwe'ele ma;
Amu m'atabe ajô dôé mebun.
43 Te vaa ne meññ ajô benya mejôô e anyu dam ;
Amu ndinleme jam é ne e be minjôane miôé.
44 M'aye ba'ale metiñe môé kom ése,
Nnôm éto a nnôm éto.
45 A m'aye wulu me nto nti,
Amu me nga jeñe miñye'elane miôé.
46 M'aye fe kobô minkañete miôé e asu bejô bôt,
a m'aye bo te veban ôsone nyô.
47 Amu m'ayen mvaé jam e mebendé môé été,
Mme m'anye'e.
48 M'asémé mebendé môé, mme m'anye'e ;
M'aye bindi mintelane memvinda miôé e nlem.

ZAYIN

49 Simesa'an ajô ô nga jô mboésáé wôé,
Nde ô nga bo na me tabe ndinlem.
50 Wuna ô ne mvolane nleme wom vôm m'awu ékpwe'ele,
Ane ngaka'a jôé j'ave ma ényiñ.
51 Bôt be ne te ko Zambe woñ b'adimi me bo fianga ;
Ve me ne te lume metiñe môé mvus.
52 Eyoñ m'asimesane minjôane miôé ya kôa,
m'avolôban nlem, A YEHOVA.
53 Ayôñ ayaa e biya ma amu mbia be bôt,
B'ali'i metiñe môé.
54 Mintilane memvinda miôé mi nto bia biam,
E nda me nto nneñ été.
55 M'asimesane jôé dôé a alu se, A YEHOVA,

A ba'ale metiñe môé.

56 E mvome nyô é nga ku e be ma,
Ane me nga ba'ale miñye'elane miôé.

HHETH

57 YEHOVA a ne ngabe jam :
M'atiñeti na m'aye ba'ale mejô môé.
58 M'aja'é mvame jôé a nleme wom ôse;
Ko ma éngôngol aval ane ajô dôé e né.
59 Eyoñ m'asimesane mezene môé,
M'akôñelane mebo mam mfa'a ya minkañete miôé.
60 M'abo avô, a te bo njiñelan
Ya ba'ale mebendé môé.
61 Akôsabo mevote me mbia be bôt mi ayabe ma,
Me nji vuane metiñe môé.
62 Zañ alu, m'aye kôlô si a kañe wo,
Amu bezôsô minjôane bôé.
63 Me ne mvôé ba bese b'ako wo woñ,
A ba b'aba'ale miñye'elane miôé.
64 A YEHOVA, si nyô é ne njalan a mvame jôé ;
Ye'ele'e ma mintelane mvinda miôé !

TETH

65 O boya mboésaé wôé mvaé, A YEHOVA,
Aval ane ajô dôé e né.
66 Ye'ele'e ma nya ntyi'ane mejôô a ñyeman ;
Amu m'abuni mebendé môé.
67 Eyoñ me ngenane te wu ékpwe'ele, me nga kobe zen ;
Ve éyoñe ji m'aba'ale ajô dôé.
68 O ne mvaé, w'abo mvaé,
Ye'ele'e ma mintelane memvinda miôé.
69 Bôt be ne te buni b'até minsos mfa'a wom ;
Ve a nleme wom ôse, m'aba'ale miñye'elane miôé.
70 Nleme wob ô nto édôdô'ôté aval ane avoñ,
Ve m'ayene metiñe môé mvaé.
71 E ne me mvaé ane me nga wu ékpwe'ele,
Nalé m'aye yé'é mintelane memvinda miôé.

72 Atiñe ya anyu dôé e ne mvaé,
Adañe minsañe betoyini mi gôlt a silba.

YODH

73 Mo môé me nga té a kôme ma :
Va'a ma fek, nde m'aye yé'é mebendé môé.
74 Ba b'ako wo woñ b'aye yene ma a yen mvaé,
Amu me tabeya ndinlem a ajô dôé.
75 A YEHOVA, m'ayeme na mintyi'ane mejô miôé mi ne zôsôô.
A na, amu benya mejôo bôé, ô nga liti ma njuk.
76 Kañese'e na, mvame jôé e bo mvolane nleme wom,
Aval ane atiñe dôé e be mboésaé wôé.
77 Kañese'e na, abui mvame dôé, e zu e be ma, nde m'aye nyiñ ;
Amu metiñe môé me ne mvaé jam.
78 Kañese'e na, bôt be ne te buni be veban ôsone nyô;
Amu be nga sô'ôlô ma si te étom;
Ve mfa'a wom, m'aye bindi miñye'elane miôé e nlem.
79 Kañese'e na, ba b'ako wo woñ be kôñelan e be ma;
Ane b'aye yeme minkañete miôé.
80 Kañese'e na, nleme wom ô bo te bijô e mintelane memvinda miôé;
Nalé m'aye bo te veban ôsone nyô.

KAPH

81 Nleme wom w'aku som amu nkômbane m'akômbô nyiane wôé;
Ve me to ajô dôé ndilem.
82 Mise mam m'atek nté m'ayange atiñe dôé ;
M'asili na, Eyoñ évé w'aye volô ma nlem ?
83 Amu me nto aval ane nde' ékôb é ne e ôtita été ;
Ve me nji vuane mintelane memvinda miôé.
84 Mboésaé wôé a ye tabe melu tañ aya ?
W'aye ve ba b'akpwe'ele ma mekua éyoñ évé ?
85 Bôt be ne te buni be fa'aya ma bibé,
Mbe be nji bo aval ane metiñe môé me né.
86 Mebendé môé mese me ne été ;
B'akpwe'ele ma a medu'an ; volô'ô ma.
87 Be nto bebé ya sili ma ne meñ e si nyô ;
Ve me nji li'i miñye'elane miôé.

88 A mvame jôé kame' ényiñe jam,
Ane m'aye ba'ale minkañete ya anyu dôé.

LAMEDH

89 Nnôm éto, A YEHOVA, ajô dôé
E ne ñyemetan e yôb été.
90 Benya mejôô môé me to miaé mise ;
O nga télé si nyô, nde é too.
91 Bi nto môse wu aval ane minjôane miôé;
Amu biôm bise bi ne bebobisaé bôé.
92 Nge metiñe môé me nga ye bo te bo mvaé jam,
Ve me jañeya a ékpwe'ele me nga wu.
93 M'aye bo te vuane miñye'elane miôé ;
Amu ô nga ve ma ényiñ a mie.
94 Me ne éñwôé, nyi'i ma ;
Amu me nga jeñe miñye'elane miôé.
95 Mbia be bôt be nga yabe ma ane b'aye jiane ma;
Ve m'aye simesane minkañete miôé.
96 Me yeneya asu'ulane ya nya mvo'é ase;
Ve abendé dôé d'adañ ndam.

MEM

97 Ngo'o aka'a nye'an m'anye'e metiñe môé !
Me ne jôm m'abindi e nlem ngume nté môs.
98 Abendé dôé d'ave ma fek adañe besiñe bam ;
Amu e ne nnôm éto e be ma.
99 Me ne fek adañe beye'ele bam bese,
Amu minkañete miôé mi ne jôm m'abindi e nlem.
100 M'ayeme mam adañe bemvendé,
Amu m'aba'ale miñye'elane miôé.
101 M'akame mebo mam mfa'a ya mbia zen ase,
Ane me ne ba'ale ajô dôé.
102 Me nji yale feñ a lli'i minjôane miôé ;
Amu ô nga ye'ele ma.
103 Ngo'o aka'a zam mejô môé me né e anyu dam, été.
M'adañe wôé zam e anyu dam !

104 Amu miñye'elane miôé nde me ne fek :
Ajô ete m'avini zen ése é ne medu'an.

NUN

105 Ajô dôé e ne lambe e mebo mam,
A éfufup e zene jam.
106 Me kaneya ngana, a me nga yemete je,
Mfa'a ya ba'ale bezôsôô metiñe bôé.
107 Me dañeya wu ékpwe'ele;
Tame ve ma ényiñ, A YEHOVA, aval ane ajô dôé e né !
108 Nyoñe mimvean mi ékaña'a miam, A YEHOVA,
A ye'ele ma metiñe môé.
109 Me bili ényiñe jam e mo été kom ése,
Ve me ne te vuane metiñe môé.
110 Mbia be bôt be yaya ma ékoé;
Ve me nji yale feñ ya lli'i miñye'elane miôé.
111 Minkañete miôé mi ne ngabe jame ya nnôm éto,
Yaa, mi ne meva'a ya nleme wom.
112 Viti nleme wome na me bo mintelane memvinda miôé,
Kom ése akekui asu'ulan.

SAMEKH

113 M'avini bôt be ne minlem mibaé,
Ve metiñe môé mme m'anye'e.
114 O ne vôm m'asobô a ébene jam;
Me to ajô dôé ndinlem.
115 Kôla'an e be ma, mia beboabé,
Ane m'aye ba'ale mebendé me Zambe wom.
116 Bii ma aval ane atiñe dôé e né, nalé m'aye nyiñ,
A te kañese na me wô' ôson mfa'a ya ndinleme jam.
117 Bii ma, ane m'aye tabe mvo'é,
A fombô mintelane memvinda miôé kom ése !
118 W'abiasé ba bese b'ayale feñ a li'i mintelane memvinda miôé,
Yaa, atyeñe dap e ne zesé.
119 W'avaa mbia be bôte bese e si nyô aval ane avu :
Ajô ete m'anye'e minkañete miôé.

120 Minsône miam mi afô'ôban amu woñ m'ako wo;
A m'ako mintyiane mejô miôé woñ.

AYIN

121 Me boya jam e ne mvo'é a zôsôô ;
Te li'i ma e be bôt b'akpwe'ele ma.
122 Bo' éban mfa'a mboésaé wôé amu mvaé ;
Te kañese na bôt be ne te bune be kpwe'ele ma.
123 Mise mam m'atek amu nyangan m'ayange nyiane wôé,
A amu ntôane zôsôô atiñe wôé.
124 Bo'o mboésaé wôé aval ane mvame jôé é né,
A ye'ele ma mintelan memvinda miôé.
125 Me ne mboésaé wôé ; va'a ma fek,
Ane me ne yem minkañete miôé.
126 A nto éyoñ YEHOVA a bo ;
Amu be tyameya metiñe môé.
127 Ajô ete m'anye'e mebendé môé.
Adañe gôlt, yaa, adañe nya gôlt.
128 Ajô ete m'aliti mbo mam zene miñye'elane miôé mise;
A m'avini zen ése é ne medu'an.

PE

129 Minkañete miôé mi ne mi ya semé;
Ajô ete nleme wom w'aba'ale mie.
130 Ntimane mejô môé w'ave éfufup :
Nwô w'ave bôt be ne te yeme mam, ñyeman.
131 M'avebe édudu a nkuian anyu
Amu m'ayep mebendé môé.
132 Kôñela'an e be ma, a ko ma éngôngo ;
Aval ane ô wô'ô bo ba b'anye'e jôé dôé.
133 Yemete'e metele mebo mam e atiñe dôé été,
A bo te kañese na, abé éziñ e jôô ma.
134 Kôté'é ma mfa'a ya ékpwe'ele môé,
Nalé m'aye ba'ale miñye'elane miôé.
135 Bo' asu dôé na e faé mboésaé wôé,
A ye'ele ma mintelane memvinda miôé.

136 Mise mam m' aôé atôñe milik,
Amu bôt be ne te ba' ale metiñe môé.

TSADHE

137 O ne zôsôô, A YEHOVA,
A mintyi' ane mejô miôé mi ne mvo' é.
138 O nga télé minkañete miôé e zôsôô été,
A e benya mejôô été.
139 Nyanan m' anyane me w' awôé ma,
Amu besiñe bam be vuaneya mejô môé.
140 Atiñe dôé d' atu' a yené mvo' é,
Ajô ete mboésaé wôé a nye' e de.
141 Me ne tyôtyoé a mbiasan,
Ve me nji vuane miñye' elane miôé.
142 Zôsôô wôé a ne zôsôô nnôm éto,
A metiñe môé me ne bebela.
143 Njuk a abé bi biya ma ;
Ve mebendé môé me ne mvaé jam.
144 Minkañete miôé mi ne zôsôô nnôm éto :
Tame ve ma fe' e nlem ane me nyiñ.

QOPH

145 M' aloene wo a nleme wom ôse ; yala' ane ma, A YEHOVA :
M' aye ba' ale mintelane memvinda miôé.
146 M' ayôn e be wo; nyi' i ma,
A ne me ne ba' ale minkañete miôé.
147 M' akune loen éyoñe tyé é ngenane te lende a yi mvolan;
Me to ndinlem a mejô môé.
148 Mise mam me nga taté vee ôyo adañe bennonô nlam ya alu,
Ane me ne bindi atiñe dôé e nlem.
149 Wô' ô tyiñe jam aval ane mvame jôé é né;
A YEHOVA, a zôsôô wôé, tame kale ényíñe jam.
150 B' asubu bebé, ba b' akpwe' ele ma a mbia fek ;
Be ne ôyab a metiñe môé.
151 Ve wo ô ne bebé, A YEHOVA;
A mebendé môé mese me ne bebela.
152 Me nga yeme minkañete miôé kuba,

Na, ô nga kôme mie nnôm éto.

RESH

- 153 Fombôô ékpwe'ele jam, a nyii ma ;
Amu me ne te vuane metiñe môé.
- 154 Tame vañ ajô dam a kôté ma :
Va'a ma ényiñ aval ane atiñe dôé e né !
- 155 Nyian ô ne ôyab a mbia be bôt,
Amu be ne te jeñe mintelane memvinda miôé.
- 156 Mvame jôé é ne anen, A YEHOVA ;
Tame ve ma ényiñ aval ane zôsôô wôé a né.
- 157 Bekpwe'ele bam be ne abui a besiñe bam,
Ve me ne te lese zene ya minkañete miôé.
- 158 Me nga fombô bôt be njoñ mise me ziñ,
Amu be nji ba'ale mebendé môé.
- 159 Tame simesan ane m'anye'e miñye'elane miôé !
Tame kale ényiñe jam ane mvame jôé é né.
- 160 Ngume tañ ya ajô dôé ô ne benya mejôô ;
A njôan ôse ya bezôsôô minjôane bôé ô too nnôm éto.

SHIN

- 161 Bone bejô bôt b'akpwe'ele ma te étom ;
Ve nleme wom w'ako mejô môé woñ.
- 162 M'avak a ajô dôé,
Aval ane môêt a som abui biôm bi nsa.
- 163 M'avini a wô'ô minsos angôndô ;
Ve metiñe môé mme m'anye'e.
- 164 M'akañe wo môse wua biyoñe zañbwaa,
Amu bezôsôô metiñe bôé.
- 165 Ba b'anye'e metiñe môé be bili abui mvo'é ;
Te ke jôm é ne bo na be kolé ôbak.
- 166 Me too nyiane wôé ndinlem, A YEHOVA,
A m'abo mebendé môé.
- 167 Nleme wom w'aba'ale minkañete miôé :
A m'adañe nye'e mie.
- 168 M'aba'ale miñye'elane miôé a minkañete miôé :
Amu mezene mam mese me ne asu dôé.

TAV

- 169 Kañese'e na, ñyoñe wom ô kui asu dôé, A YEHOVA;
Tame ve ma fe'e nlem aval ane ajô dôé e né !
- 170 Kañese'e na, meye'elane mam me kui asu dôé :
Nyi'i ma aval ane ajô dôé e né.
- 171 Kañese'e na, biyaé biam bi kobô ékaña'a;
Amu w'aye'ele ma mintelane memvinda miôé.
- 172 Oyeme viam vi aye yia ajô dôé bia,
Amu mebendé môé mese me ne mvo'é
- 173 Kañese'e na, wo wôé ô bo nkômane ya volô ma;
Amu me nga top miñye'elane miôé.
- 174 Me nga yi nyiane wôé, A YEHOVA,
A metiñe môé me ne mvaé jam.
- 175 Kañese'e na me nyiñ, ane me ne kañe wo,
Kañese'e na minjôane mmiôé mi volô ma.
- 176 Me nga kobe zen aval ane ntômba ô nga dimi; tame jeñe mboésané wôé ;
Amu me ne te vuane mebendé môé.

Meye'elane ya ja'é nkôtan e mo me bôt be ne njoñ

(Esd 4 ; Besam 12)

Jia mimbetan.

120

- 1 Me nga yôn a loene YEHOVA, éyoñ me nga yen abé, na, a yalane :
- 2 Nyi'i nsisime wom, A YEHOVA, mfa'a biyaé bi ne minsos,
A mfa'a ôyem ô ne medu'an.
- 3 Jé j'aye veban e be wo, a za jam afe d'aye boban e be wo,
Wo ôyem medu'an ?
- 4 Akab bilaé bi ñyôyo'o mô't, a ma'a me nduan me élé genestra ma yôñ !
- 5 Ngo'o ma, amu me nto ntabe e Méshek,
Amu me nto e zañe menda bindelé me Kédar !
- 6 Etua ayap me bili étaba'a jam
E zañe bôt b'avini mvo'é ;
- 7 Me ne mfa'a ya mvo'é ;
Ve éyoñ m'akobô,

Be ne mfa'a ya mewosan !

YEHOVA Mba'ale Israél

(Deut 33 :27 ; 1 Sam 2 :9 ; Besam 91 ; Yes 27 :3)

Jia mimbetan.

121

- 1 M'abete mise mam mfa'a ya bone minkô; mvolane wom w'aye so mfa'a mbé ?
- 2 Mvolane wom w'aso e be YEHOVA,
Nnye a nga bo yôb a si.
- 3 A ye bo te kañese na abo dôé e fô'ôsan :
Nyô a ba'ale Israél a ye bo te ndeñ ôyo.
- 4 O lô, nyô a ba'ale Israél
A ye bo te deñ ôyo nge ke ôyo.
- 5 YEHOVA a ne mba'ale wôé :
YEHOVA a ne éjijine jôé ya mbonnôme wôé.
- 6 Jôp d'aye bo te bôme wo a môs, nge ngon a alu.
- 7 YEHOVA a ye ba'ale wo mfa'a ya abé ese;
A ye ba'ale nsisime wôé.
- 8 YEHOVA a ye ba'ale nkuian atane wôé a nyian été wôé,
Ataté éyoñe ji a ke ôsu akui nnôm éto.

Meye'elane ajô mvo'é ya Yérusalem

(Deut 16:16; Besam 84)

Jia mimbetan. Jia David.

122

- 1 Me nga yen mvaé éyoñ be nga jô ma na,
Nkean e nda YEHOVA !
- 2 Mebo mangan me tele
E mimbé miôé yôp, A Yérusalem,
- 3 Yérusalem, nnye a ne nlôñan,
Ane nlam ô ne nlatane ngule vôme wua;
- 4 Vôm ate bitunga bi bôt bi abet,
Bitunga bi bôt bi abet, bi YEHOVA,
Aval ane e nga jôban mfa'a Israél,

- A ve jôé YEHOVA akéva.
- 5 Amu bito bi njôane bi ntyi'ane mejô bi tele wôé,
Bito bi njôan bi nda bôta David.
- 6 Ye'ela'an ajô mvo'é ya Yérusalem :
Ba b'anye'e wo b'aye nenenen.
- 7 Mvo'é é bo'ok e meka'a môé été,
A mvo'é e minkum miôé été.
- 8 Amu bobejañ a bemvôé bam, m'aye jô na,
Mvo'é é bo'o e be wo.
- 9 Amu ajô nda YEHOVA Zambe wongan,
M'aye jeñ mvaé jôé.

Meye'elan ajô mvolane YEHOVA

(Neh 2 :19, 20 ; 4 :1-4 ; Besam 120)

Jia mimbetan.

123

- 1 E be wo m'abete mise mam,
A wo ô too éto njôô e yôb été !
- 2 O lôô, ane mise bebobisaé m'afombô e wo Nti wop,
Ane mise me mboésaéa minga e mo me nganti wé,
Nalé mise mangan m'afombô YEHOVA Zambe wongan,
Akekui a ye ko bia éngôngo.
- 3 Ko bia éngôngo; A YEHOVA, ko bia éngôngo;
Amu bi jibiya ébiasé adañ abim d'ayian.
- 4 Ayabe jam ane nsisime wongan ô jaéya
A ébiasé ya ba besôm be ne mvo'é,
Ebiase bôt be ne mebun.

Ekaña'a amu nyian e mo besiñ

(Neh 4:7; Esther 1 akui 8; Besam 21:2; 118:8-14; 129)

Jia mimbetan. Jia David.

124

- 1 Nge te na YEHOVA nnye a mbe e ngame jangan,
Israél a jô' éyoñe jina na,

2 Nge te na YEHOVA nnye a mbe e ngame jangan,
Eyoñe bôt be nga kôlô si a wosane bia,
3 Ve be nga ye mine bia bevee,
Eyoñ ayaa dab e nga yôñe bia nyô :
4 Eyoñ éte ndôn é nga ye mane kee bia mfa'a mfe,
Mendim me nga ye yandan bia yôp;
5 Wôna mintyôa mendim mi nga ye bia lô e yôp.
6 Ebotan é bo'o YEHOVA,
Nyô a nga bo te ve bia e mesôñe map aval ane mbili ze.
7 Bi nga fam aval ane ônon
W'asotan ékoé bewôé anon;
Ekoé é tééya, a bi sotaneya !
8 Mvolane wongan ô ne e be jôé YEHOVA,
Nnye a nga bo yôb a si.

YEHOVA, a bômane bôte bé

(1 Mink 16:9; Besam 34:8-23; Yes 26:3; Yér 17:7,8)

Jia mimbetan.

125

1 Ba b'atabe YEHOVA mebun,
Be ne aval ane Nkôle Siôn,
Ñwô ô se ngule ya fô'ôsan,
Ve ô too nnôm éto.
2 Aval ane beta minkôle mi abômane Yérusalem,
Nalé ate YEHOVA a bômane bôte bé
Ataté éyoñe ji a ke ôsu akui nnôm éto.
3 Amu ntume mbia be bôt w'aye bo te jô'ôbô
E ngabe si bezôsôô be bôt e yôp ;
Amu bezôsôô be bôt be za same mo map mfa'a ya abé.
4 Bo'o mvaé, A YEHOVA, e be ba be ne mvaé,
A ba be ne zôsôô e minlem miap !

5 Ve mfa'a avale bôt d'ayale feñ a ke bikotekote mezene biap.
YEHOVA a ye kee be atan e nsambe beboabé.
Mvo'é é bo'ok a Israël !

Mvean akéva amu mebulan be s'o e minkôm

(2 Mink 15:7; Esd 1; Besam 85; Nkul 7:9)

Jia mimbetan.

126

1 Eyoñ YEHOVA a nga suu minkôm ya Siôn, mi nga bulan.
Bi nga to aval ane ba b'ayem biyeyem.
2 Eyoñ éte anyu dangan e mbe njalan a vioé,
A ôyme viangan a ñyiane bia :
Eyoñ éte be nga jô e meyoñe bikul été na,
YEHOVA a boya be beta be mam.
3 YEHOVA a boya bia beta be mam,
Mme mete bi ava'a me.
Tame bulane minkôme miangan,
4 A YEHOVA, bula'ane bia minkôme miangan
Aval ane bone be b'asiliki nké !
5 Ba b'amias a mili'i mis b'aye kôan a bia mevak.
6 Nyô a ke a yi, a be'e mvoñe ya mias,
A ye bulan a mevak, a bili mimbom mié.

Mefo'o m'aso e be YEHOVA

(Besam 128; Min 10:22)

Jia mimbetan. Jia Salomon.

127

1 Nge YEHOVA a bo te lôñ nda,
Ba b'alôñe je b'abo ve ébooboé :
Nge YEHOVA a bo te ba'ale nlam,
Môt a mombô a tabe évevé ve étabetabe.
2 E ne mia zesé jam ane mi akune kôlô si,
A ke awo'an mvus ayabe mmoan,
A di fembe ya nju'u ntyelan nlem e yôp ;

- Amu nalé a ve bôte bé a nye'e, be to ôyo.
- 3 O lôô, bobefam be ne ngab éjian j'aso e be YEHOVA;
A mvoñe ya abum é ne meya'ane mé.
- 4 Aval ane mekoñ me élaé me ne e mo me ñyôyo'o mô, t,
Nalé ate bone bisoé bi bôt bi né.
- 5 Mvom a mô, t a bili be e nkobe wé été ne lut :
A ye bo te veban ôsone nyô,
Eyoñ a kobô besiñe bé e mbé yôp.

Mvom ya nkoane YEHOVA woñ

(Besam 112 ; 127 :3, 4)

Jia mimbetan.

128

- 1 Mvom a nyô ase a ko YEHOVA woñ,
A wulu e mezene mé été !
- 2 Amu w'aye di bibuma bi ésaé ya mo mô, t :
W'aye yen mvaé, a w'aye tabe mvo' é.
- 3 Nyo ngal a ye bo aval ane ndi' i wain w'awum
E bitune bi nda jôé été;
Benyo bon aval ane bone bilé bi ôlivié,
Be bôma'ane tawôlô wôé.
- 4 Tame yen, aval ete mô, t ate a ye nyoñ ébotan,
Nyô a ko YEHOVA woñ.
- 5 YEHOVA a bota'ane wo a bibotan bi aso e Siôn :
O yen mbamba be mame ya Yérusalem melu mese ya ényîne jôé !
- 6 Yene' bendaé bôé ! Mvo' é bo'ok a Israël.

Meye'elane ya ja'é ntyamane besiñ e Siôn

(Besam 122: 6-9; 124; Miñy 3:59-66)

Jia mimbetan.

129

- 1 Be kpwe'eleya ma abé aso mongô,
Israél a jô' éyoñe jina na,
- 2 Be kpwe'eya ma abé aso mongô :
Ve be boya te dañe ma.

3 Befa'a si be nga fa'a mvuse jam e yôp ;
 Be nga limi minnoñe miab ayap.

4 YEHOVA a ne zôsôô :
 A tyi'iyia minkole mi mbia be bôte bitun.

5 Ba bese b'asiñe Siôn
 Be tame veban ôsone nyô a bulan mvus !

6 Kañese'e na, be bo aval ane bilo'o ya andile yôp
 Mbie bite bi akôt éyoñ bi ngenane te yaé ;

7 Mbie bite, nkôane bidi a bo te jalé wo wé,
 Nge nyô a dutu mimbom te jalé tôé jé :

8 Nalé fe ba b'alôt be nji jô na,
 Ebotane YEHOVA é tabe'e e be wo !
 Bi abotane wo a jôé YEHOVA.

Ndinlem ya njaman amu nye'an

(Besam 69 ; 143; Yes 30:18; Miñy 3:22-32; Mik 7:7, 18-20)

Jia mimbetan.

130 1 Aso' e bido' été, me nga yôn e be wo, A YEHOVA !

2 A Nti, tame wô'ô tyiñe jam :
 Kañese'e na, melo môé me vô'ôlôô
 Tyiñe ya minja'ane miam !

3 Nge wo, A YEHOVA, ô nga ye tili mbia be mam,
 A Nti, za a nga ye bo ngule ya tebe ?

4 Ve njaman ô ne e be wo,
 Nde ete b'aye ko wo woñ.

5 M'ayange YEHOVA, nleme wom w'ayange,
 A me too ajô dé ndinlem.

6 Nleme wongan w'ayange Nti,
 Adañ ane bemombô b'ayange mametyé.

7 A Israël, tabe'e ndinlem e be YEHOVA;
 Amu mvam é ne e be YEHOVA,
 A nkôtan ô ne abui e be nye.

8 A ye kôté Israël
 Mfa'a ya mbia be mam mé mese.

Mbunane YEHOVA ane mon

(Mat 11:29; Rôm 12 :3, 16 ; Fil 2 :1-11 ; 1 Pét 5 :5, 6)

Jia mimbetan. Jia David.

131

- 1 A YEHOVA, nleme wom ô nji bo mbetane yôp,
Mise mam me nji beteban ôyab e yôb;
Me nji dañe simesane beta be mam,
Nge mame ya semé mfa'a wom.
- 2 Ve me nga too ne mieññ a volô nleme wom ô tabe évôvoé,
Aval ane mon a ne ntyilane mebé a too e fefele nyia woé,
Aval ane mon ane ntyilane mebé,
Nleme wom ô too ma e abum été.
- 3 A Israél, tabe'e YEHOVA ndinlem,
Ataté éyoñe ji a ke ôsu akui nnôm éto.

Meye'elan ane YEHOVA a ye botane nda Zambe

(2 Mink 6 :3-17 ; 41, 42 ; Yes 32 :8 ; Mat 6 :33)

Jia mimbetan.

132

- 1 A YEHOVA, simesa'an e mvame David,
Ayaé mam mese a nga jibi;
- 2 Aval ane a nga kalane YEHOVA,
A bo atiñ e be Ngungule Môte Yakob na,
- 3 M'aye bo te nyiin e nda jam,
Nge ke bômbô e énoñe jam;
- 4 M'aye bo te kañese ôyo e mise mam,
Nge dip biyakole biam,
- 5 Akekui m'aye yene YEHOVA vôm,
Etaba'a mfa'a Ngungule Môte Yakob.
- 6 Tame yen, bi nga wô'ôtane je e Efrata,
Bi nga yene je e mefube ya Yaar.
- 7 Bi tame ke vôme ya étaba'a jé ;
Bi tame kañ e mfôm étele mebo jé.
- 8 Kôlô'ô si, A YEHOVA, a ke vôme ya awo'ane dôé ;
Womien a éwolo élate ya ngule jôé.

- 9 Kañese'e na, bepretre bôé be jaé zôsôô wôé ane éwoman,
Mimfufube miôé mi loñ ayenga amu mevak.
- 10 Amu ajô David mboésaé wôé,
Te vaa asu dôé mfa'a môê ô nga wo'o mbon.
- 11 YEHOVA a nga kane David bebela ngane,
A ye bo te bulan mvus a li'i je :
Wua ya bone ya nyôle jôé,
Nnye m'aye télé e éto njôane jôé.
- 12 Nge bone bôé b'aye ba'ale élate jam,
A minkañete miam m'aye ye'ele be,
Bone babe fe b'aye tabe éto njôane jôé nnôm éto.
- 13 Amu YEHOVA a nga tobe Siôn ;
A nga kômbô nye na a bo éto jé :
- 14 Vana a ne vôme ya awo'ane dam nnôm éto :
M'aye tabe va; amu me nye'eya nye.
- 15 M'aye bulu botane bidi ya été ;
M'aye jalé awutu'u dé a bidi.
- 16 M'aye jalé bepretre bé a nyian,
A mimfufube mié mi aye loñ ayenga amu mevak.
- 17 Vôm ate m'aye bo nla'a David na ô faa :
Me kômeya lambe mfa'a môte wom me nga wo'o mbon.
- 18 M'aye jalé besiñe bé ôson,
Ve mfa'a wé émien, ékate jé j'aye faé.

Mvaé ya nleme wua bobenyañ

(M.M. 4 :32 ; Fil 2 :1-4)

Jia mimbetan.

- 133** 1 Tameka yenan, aka'a mvo'é a mvaé e né,
Ane bobenyañ be too nlatane jôme jia !
- 2 E ne aval ane édima mbon é ne e nlô,
Nje éte j'alén akui e ze,
E zel Aaron e yôp ;
Nje éte j'asiliki akui e ñwôndé ngômesane jé ;
- 3 O ne aval melo'o me Hermon,
Mme mete m'asiliki akui beta minkôle mi Siôn e yôb !
Amu vôm ate YEHOVA a nga tiñeti ébotan, ényîñe ya nnôm éto.

Mebetane me bennonô nlam

(Deut 10 :8 ; 1 Mink 9 :33 ; Besam 84 :5)

Jia mimbetan.

134

- 1 Zakan, kañane YEHOVA,
Mia bebobisaé be YEHOVA bese,
Ba be tele alu se e nda YEHOVA !
- 2 Samane mo menane yôp mfa' a ya mfufube nda,
Mi kañane YEHOVA.
- 3 YEHOVA a bota' ane wo a bibotane bi aso e Siôn ;
Nyô a nga bo yôb a si !

Nkañan amu bitua bi mam bi YEHOVA

(Besam 115 ; 136)

Bemomo be mam bengunemlan.

135

- 1 Kañane YEHOVA!
Kañane jôé YEHOVA; kañane nye, A mia bebobisaé be YEHOVA!
- 2 Mia bôt mi tele e nda YEHOVA,
E minseñe mi nda Zambe wongan.
- 3 Kañane YEHOVA, amu YEHOVA ane mvaé :
Yiane jôé dé bia; amu ane mvam !
- 4 Amu YEHOVA a tobeya Yakob mfa' a wé émien,
A Israël a bo ngabe jé émien.
- 5 Amu m'ayeme na YEHOVA a ne anen,
A na, YEHOVA wongan a dañe bezambe bese.
- 6 Jame ése YEHOVA a nga nye'e, nde a bo
E yôb été a e si nyô, e mañ été a e bido'o bise été ;
- 7 Nyô a bo minkut mi bet e meku'u me si ;
Nyô a bo feleves amu mveñ,
Nyô a zuu évuñulu é so'o e menda a naane biôm ;
- 8 Nyô a nga wôé mintôle mi biôme ya Egipten,
bôt a betit bebaane ;
- 9 Nyô a nga lôm mendem a bitua bi mam e zañe jôé, A Egipten,
E be Faraô, a e be bebobisaé bé bese;
- 10 Nyô a nga jiane meyoñe bikul abui,

- A wôé biwôlô bejô bôt.
- 11 Sihoñ, njôô Amôrit,
A Og, njôô Basan,
A bijôé bise ya Kanaan.
- 12 A nga ve si jab é bo ngap,
Ngab ayoñe dé Israël.
- 13 Jôé dôé, A YEHOVA, e too nnôm éto;
Duma dôé, A YEHOVA, d'akui miaé mise.
- 14 Amu YEHOVA a kune bôte bé,
A mvamane bebobisaé bé.
- 15 Bengunemalan meyoñe bikul be ne silba a gôlt,
Mboane mo me bôt.
- 16 Be bili menyu, ve be ne te kobô;
Mis be bili, ve be ne te yen;
- 17 Be bili melo, ve be ne te wôk;
Nalé fe mvebe ô nji bo e menyu mab été.
- 18 Ba b'abo be b'aye funane be;
Yaa, nyô ase a tabe be mebun.
- 19 A Nda bôt Israël, kañane YEHOVA;
A nda bôt Aaron, kañane YEHOVA;
- 20 A nda bôt Lévi, kañane YEHOVA;
Mia bôt mi ako YEHOVA woñ, kañane YEHOVA !
- 21 Ebotan é bo'o YEHOVA é so'o Siôn,
Nyô ato e Yérusalem !
Kañane YEHOVA!

Mvean akéva amu mvaé YEHOVA a bo Israël

(Esd 3:11; Besam 135; Luk 1:47, 50)

- 136** 1 Tameka veane YEHOVA akéva; amu a ne mvaé;
Amu mvame jé é too nnôm éto.
- 2 Tameka veane Zambe bezambe akéva;
Amu mvame jé é too nnôm éto.
- 3 Tameka veane Nti bemonti akéva;

- Amu mvame jé é too nnôm éto.
- 5 E be nyô a nga bo yôp a fek;
Amu mvame jé é too nnôm éto.
- 6 E be nyô a nga ndamé si nyô e mendime yôp ;
Amu mvame jé é too nnôm éto.
- 7 E be nyô a nga bo beta bifufup;
Amu mvame jé é too nnôm éto.
- 8 Jôp e jo'a môs;
Amu mvame jé é too nnôm éto.
- 9 Ngon a ateté bi jô'ô a alu;
Amu mvame jé é too nnôm éto.
- 10 Nyô a nga wôé mintôle mi biôme ya Egipten ;
Amu mvame jé é too nnôm éto.
- 11 A nga vaa Israël a kôlô'ô zañe jap;
Amu mvame jé é too nnôm éto.
- 12 A éwôlô akule wo a nsamane wo;
Amu mvame jé é too nnôm éto.
- 13 E be nyô a nga kandé Evele Mañ e zañ;
Amu mvame jé é too nnôm éto.
- 14 A nga bo Israël na a lôte je e zañ;
Amu mvame jé é too nnôm éto.
- 15 Ve a nga sô'ôlô Faraô a nsamba mewosane wé e Evele Mañ été;
Amu mvame jé é too nnôm éto.
- 16 E be nyô a nga wulu bôte bé be lôte e nkôte si été;
Amu mvame jé é too nnôm éto.
- 17 E be nyô a nga jiane biwôlô bejô bôt;
Amu mvame jé é too nnôm éto.
- 18 A nga wôé bejô bôt be ne дума;
Amu mvame jé é too nnôm éto.
- 19 Sihoñ, njôô Amôrit,
Amu mvame jé é too nnôm éto.
- 20 A Og, njôô Basan;
Amu mvame jé é too nnôm éto.
- 21 A nga ve si jab é bo ngab;
Amu mvame jé é too nnôm éto.
- 22 Ngab Israël, mboésáé wé ;

- Amu mvame jé é too nnôm éto.
- 23 Nyô a nga simesane bia e éto mebua jangan ;
Amu mvame jé é too nnôm éto.
- 24 A nga nyii bia e be besiñe bangan;
Amu mvame jé é too nnôm éto
- 25 Nyô a ve minsône mise bidi;
Amu mvame jé é too nnôm éto.
- 26 Tameka veane Zambe ya yôb akéva;
Amu mvame jé é too nnôm éto.

THEOPHILE OYONO MEYE

Alune minkôm mi nga to e Babilôn

(Yér 50; 51; Miñy 1; 2; Ezék 25:12-14)

- 137** 1 E nsa' asôé ya Babilôn,
Vôm ate bi nga too si, bi yônôk,
Eyoñ bi nga simesane Siôn.
- 2 E bilé ya été yôb,
Bi nga tyelé memvete mangan.
- 3 Amu vôm ate ba be nga kee bia e minkôm ;
Be nga jô bia na, bi yia bia,
A ba be nga wôé bia be nga jô bia na, bi vak, a na,
Yi'ane bia jia jia ya bia ya Siôn.
- 4 Bi aye yia jia YEHOVA aya, bi to éza si ?
- 5 Nge m'avuane wo A Yérusalem,
Mbonnôme wom ô mane kôt.
- 6 Oyeme viam ô kabata'an e nda anyu jam,
Nge m'abo te telé Yérusalem ôsu
Ane jam m'adañe yen mvaé !
- 7 Simesa'an, A YEHOVA, bone be Edom,
E môse ya Yérusalem;
Eyoñ be jô'ô na, Tyame' nye, tyame' nye,
Akekui e mbôka'a si ya été !
- 8 A ngone ya Babilôn, wo w'aye kôme tyamban,

THEOPHILE OYONO MEYE

A ye yen mvaé, nyô a ya'ane wo aval ane ô nga bo bia.
9 A ye yen mvaé, nyô a ye nyoñe bone bôé,
A tya'a be e ako'o yôp !

Mvean akéva amu mvame YEHOVA

(2 Sam 7; Besam 67; 113; 117)

Sam David.

138

1 M'ave wo akéva a nleme wom ôse;
M'aye yia дума dôé bia wôm bezambe be too.
2 M'aye kumbu si me fombô'ô mfufube tempele wôé,
Me va'a jôé dôé akéva amu mvam a benya mejôô bôé :
Amu ô nga bete jôé dôé a ajô dôé e yôp adañe jôm ése.
3 Môs me nga loen, ô nga yalane ma,
Ngule ya nleme wom ô nga nene je.
4 A YEHOVA, bejô bôte bese ya si nyô b'aye kañe wo,
Amu be nga wô'ô mejô ya anyu dôé;
5 A b'aye yia mezene me YEHOVA bia;
Amu дума YEHOVA e ne anen.
6 Ja'ane YEHOVA a ne mbetane yôp,
A fombô ba be ne nsuubane si ;
Ve a yeme ba be ne mebun éyoñ be ngenan ôyap.
7 Akôsabo m'awulu e nju' été,
W'aye ve ma ngu ;
W'aye same wo wôé a wosan ayo'o besiñe bam,
A mbonnôme wôé w'aye nyii ma.
8 YEHOVA a ye sondô fe'e jé ya ajô dam ;
Mvame jôé, A YEHOVA, é too nnôm éto ;
Te li'i ésaé ya mo môé.

Ntabane vôm ase a ñyemane mam Zambe ôse

(1 Mink 28 :9 ; Yiôb 10 :8-12 ; Besam 11 :4, 5 ; Yér 23 :23 ; 24 ;

Rôm 11:33; Behéb 4:13)

Mfa'a Evet Mezik. Sam David.

139

1 A YEHOVA, ô nga fase ma a yeme ma !
2 W'ayem éyoñ m'atabe si, a éyoñ m'atebe,

W'ayem asimesane dam ôyap.

3 W'afase zene jam a mbômbane si wom,
A w'ayemelane mezene mam mese.

4 Ja'an éyoñ ajô e ngenane te kui ôyeme viam,
Tame yen, A YEHOVA, w'ayeme de ese.

5 O tele ma e mvus a ôsu,
O nga beté ma wo wôé.

6 Aka'a ñyemane mam ete e ne di ya semé mfa'a wom ;
E ne ôyabe yôp, me se ngule ya bi de.

7 M'aye ke vé me kandan e Nsisime wôé ?
Nge na, m'aye ke mbile vé me kandan a asu dôé ?

8 Nge m'abet e yôb été, ô ne wôé !
Nge m'abô' énoñe jam e Shéôl été, ô ne vôm ate.

9 Nge m'anyoñe mefabe ya mametyé,
A ke tabe ôyab e mañ été ;

10 Akôsabo wôé, wo wôé w'aye bi ma.
A mbonnôme wôé w'aye bi ma.

11 Nge m'ajô na, Dibi étam nde e buti'i ma,
A éfufup j'abômane ma é bo'o alu,

12 Ja'ane dibi e se ke dibi mfa'a wôé,
Ve alu d'afaé ane môs :
Amu dibi e ne éfufub e be wo.

13 Amu wo ô nga té biôm bise bi ne ma e abum été :
Wo ô nga late ma éyoñ me nga too abum nane.

14 M'akañe wo, amu ô ne ékowoñ a môte ya semé !
W'atua'a ma yem nya ñyemane !

15 Nkpwas nyôle wom ô nji bo wo nsolan,
Eyoñ me nga téban asoé,
A lateban aval étam e bido'o ya si nyô.

16 Mise môé me nga yene ma me ngenane te kômban ;
E kalate wôé, mese me nga tiliban,
Ja'ane melu ô nga tiñeti ma,
Eyoñ éte môse wua ya été ô ngenane te lôt.

17 Nalé fe minsimesane miôé mi ne ma aka'a édima,
A Zambe !
Ngume tañe ya été ô ne aka'a ndam !

18 Nge me nga ye lañe mie, mi aye dañ nsele'e ya mañ abui :
Eyoñ m'avee ôyo, me ngenan e be wo.

19 Tame mane wôé mbia be bôt, A Zambe !
 A mia bôt mi akuli metyi, kôla'an e be ma;
 20 Bôt b'akobô wo ébiasé,
 Bôt b'abete bebien e yôb a bo wo abé !
 21 A YEHOVA, ye m'abo te siñe ba b'asiñe wo ?
 Ye m'abo te wô'abé a yaa ba b'asengane wo ?
 22 M'asiñe be nya nsiñane,
 M'alañe be ane besiñe bam.
 23 A Zambe, fase ma a yeme nleme wom !
 Ve'ele'e ma, a yem asimesane dam;
 24 A yen nge zen éziñ é ne abé é ne e be ma;
 A wulu ma e zene ya nnôm éto.

Meye'alane ya jaé nkaman e be bepwe'ele

(Besam 10; 58; 59; 64; 141 akui 143)

Mfa'a Evet Mezik. Sam David.

140

1 Nyi'i ma, A YEHOVA, e be mbia be bôt;
 Tame kame ma e be bôt be ne évô :
 2 Ba b'abôndé mbia mefe'e e minleme miap;
 A té mewosane kom ése.
 3 Ba b'abo ayeme dab akab ane ôyeme nyo,
 Ba nsu mekpwe ô ne e biyaé biabe si. Sélah !
 4 Ba'ale ma, A YEHOVA, me kôlô e mo me mbia be bôt;
 Tame kame ma e be bôt be ne e évô,
 Ba b'abôndé mefe'e ya dume ma si.
 5 Bôte mebun be maneya ya ma ékoé,
 A minsinga miap be maneya ya ma avot;
 E ñbwa'a zen, be maneya ya ma bikoé. Sélah !
 6 M'ajô YEHOVA na, O ne Zambe wom;
 Ke'alo e tyiñe ya minja'ane miam, A YEHOVA !
 7 A YEHOVA, Nti wom, ngule ya nyiane wom,
 O butiya nlô wom e môse mewosan.
 8 A YEHOVA, te kañese minkômbane mi mbia môt ;
 Te volô mbia fe'e wé ! Sélah !
 9 Ba b'abômane ma b'abete minlô miabe yôp,
 Kañese'e na, ézezame ya biyaé biap é buti be !
 10 Kañese'e na, ma'a me nduan me ku be yôp :
 Kañese'e na be wuaban e bibé été,
 Vôm ate b'aye bo te beta kôlô !

- 11 Môt a ne njoñ a ye bo te teleban e si nyô :
Abé d'aye ji'a jeñe môt a ne évô a dume nye si !
- 12 M'ayeme na YEHOVA a ye kôm ajô bôt b'awu ékpwe'ele,
A bo zôsôa ntyi'ane mejô mfa'a awutuk.
- 13 Bôt be ne zôsôô b'aye ve jôé dôé akéva,
Mimvômvo'é mi bôt mi aye tabe asu dôé.

Meye'elane ya mamengô'é mfa'a ya ja'é ntunan a nkalan

(1 Sam 25 ; Besam 28 ; 142 ; 143)

Sam David.

- 141** 1 Me nga loene wo, A YEHOVA, bo'avôle ya zu e ba ma !
Ke' alo dôé e tyiñe jam, éyoñ m'aloene wo !
- 2 Meye'elane mam me bo'asu dôé ane mbone mbamba menyum,
A mbetane mo mam ane metuna'a ya mamengô'é !
- 3 Telé'é mmombô ôsu ya anyu dam, A YEHOVA ;
Ba'ale'e mbé ya biyaé biam !
- 4 Te vit nleme wom mfa'a ya mbia jam éziñ,
Na, me bo mam me ne abé
E nsamba bôt b'abo mbia be mam ;
A te kañese na, me di mbamba bidi biap.
- 5 Kañese'e na, môt a ne zôsôô nnye a bôme ma a lebe ma ane jame ya mvam;
Ve te kañese na, mbone mbia be bôt ô wo'obane ma e nlô;
Amu meye'elane mam m'awosan mbia be mam map kom ése.
- 6 Eyoñ b'aveban e be bôt b'aye ve be mekua,
Nalé b'aye yé'é na mejô me YEHOVA me ne bebela.
- 7 Aval ane akôm akok môt a bôé a wua si,
Nalé bivese biap bi aye wuaban e anyu Shéôl.
- 8 Ve mise mam m'afombô wo, A YEHOVA Zambe;
M'asobô e be wo, te li'i ma te nkam !
- 9 Ba'ale ma mfa'a ya ékoé be nga ya ma,
Kañese'e na mbia be bôt be ku e mevote map bebien été,
Eyoñ m'afam été.

Meye'elane ya ja'é mvolan éyoñe ya njuk

(1 Sam 24; Besam 57; 143)

Maskil David, éyoñ a nga to e mbas akok; meye'elan.

142

- 1 M'ayôn a tyiñe jam e be YEHOVA,
M'aja'é YEHOVA a tyiñe jam.
2 M'asôé ñyône wom asu dé,
M'alite nju'u wom asu dé.
3 Eyoñ nleme wom w'aku som,
W'ayeme zene jam !
Mfa'a ya zen m'awulu été.
4 M'afombô mfa'a ya mbonnôm, a yen,
Ve te ke mô't a simesan mam,
Te ke asoé d'ali'i ma,
Te ke mô't a tyô'ô ma.
5 M'ayôn e be wo, A YEHOVA;
M'ajô na, Wo ô ne asoé dam,
Ngabe jam e si bevevee.
6 Vôlô'ô ñyôn wom; amu me dañeya suubane si !
Nyi'i ma e be bekpwe'ele bam ;
Amu b'adañe ma ngul !
7 Va'a ma e nda mimbôk,
Na, me ve jôé dôé akéva !
Bôte be ne zôsôô b'aye bômane ma;
Amu w'aye ve ma mam abui.

Meye'elane ya ja'é nyian a nlitane zen

(2 Sam 15:25-31; Besam 25; 142)

Sam David.

143

- 1 Wô'ô meye'elane mam, A YEHOVA :
Ke'alo mfa'a ya minja'ane miam;
Yala'ane ma amu benya mejôô bôé a zôsôô wôé !
2 Bo'o te kee mboésané wôé e nkat;
Amu te ke mô't a vee, a ne zôsôô e mise môé.
3 Amu nsiñe wom a tôñeya ma ;
A maneya fit ényiñe jam e si ;

- A toéya ma e dibi été ane bôt be wuya ayap.
- 4 Ajô ete nsisime wom w'aku ma som e abum été ;
Nleme wom ô ju'uya e abum été.
- 5 M'asimesane melu kôa ;
M'atyô'ô mimboane miôé mise;
M'asimesan ésaé ya mo môé e nlem.
- 6 M'asame mo mam e be wo :
Nleme wom w'awô'ô wo évé ane nkôte si. Sélah !
- 7 Bo' avôle ya yalane ma, A YEHOVA;
Nsisime wom w'aku som !
Te solé ma asu dôé,
Me za bo ane ba b'asus Ebé si.
- 8 Bo'o na me wô'ô mvame jôé mametyé;
Amu wo m'atabe nye mebun :
Bo'o na me yeme zen m'ayiane wulu été ;
Amu m'abete nleme wom e be wo.
- 9 Nyi'i ma, A YEHOVA, e be besiñe bam :
Amu m'azu mbil e be wo na, ô solé ma.
- 10 Ye'ele'e ma me bo nkômbane wôé,
Amu ô ne Zambe wom !
Mbamba nsisime wôé e liti'i ma zen é ne nje'ese !
- 11 Amu jôé dôé, A YEHOVA, ba'ale'e ényîñe jam !
Va'a nsisime wom e nju' été amu zôsôô wôé.
- 12 Amu mvame jôé, tyi'i besiñe bam,
A jiane bekpwe'ele bam bese,
Amu me ne mboésaé wôé.

Meye'elane ya ja'é nyian a nyenan mvaé

(Besam 18 ; 33 :12 ; 65 :5)

Sam David.

- 144** 1 Ebotan é bo'o YEHOVA, ako'o dam,
Nyô a ye'ele mo mam me bo bita,
A anyu dam e bo mewosan;
- 2 Ako'o dam a ôleme viam,
Oleme viam ô ne ôyabe yôp a nyii wom,
Ebene jam, a nyô m'asobô e be nye;

- Nyô a sili meyoñe si me ve me mewôk.
- 3 A YEHOVA, môt a ne jé ane w'asimesane nye ?
Nge mone môt ane w'atyô'ô nye ?
- 4 Môt a ne ane mvebe,
Melu mé me ne aval ane nsisiñ w'alôt.
- 5 Viti yôb dôé, A YEHOVA, a suse si ;
Nambe'e beta minkôl na mi kui ôtita !
- 6 Wu'a zo'oyañ, tyamela'ane be;
lôme mekoñe me élaé môé, a zametane be.
- 7 Same wo wôé e yôbe wôé;
Nyi'i ma, a vaa ma e abui mendime dina, e mo bejin.
- 8 Mbe menyu map m'akobô minsos,
A mbonnôme wop mbonnôme medu'an.
- 9 M'aye yia wo mfefé jia, A Zambe;
M'aye bôme wo mvet é ne mintem awôm,
- 10 Nyô a ve bejô bôt ndañan,
Nyô a nyii David mboésaé wé.
- 11 Nyi'i ma mfa'a ya fansoñ é ne njet,
Nyi'i ma e mo bejin;
Mbe menyu map m'akobô minsos,
A mbonnôme wop mbonnôme medu'an.
- 12 Bobefame bangan be bo'ok, éyoñe ndômane jap,
Aval ane bone bilé be maneya jaé,
Bengone bangan aval ane meko'o ya abuk,
Mme me ne mbaan mfa'a ya nlôñane nda njô bôt.
- 13 Mekañe bidi mangan me jaék,
Me bili mevale bidi mese e nda bidi,
Beyale mintômba bangane be biaé
Betoyini a awôm betoyini, e mefube mangan été;
- 14 Beyale binyaka bangan be beke'adite mimbe'e mi bon,
Te tôban nju' éziñ nge wu ya biaé,
A te ñyôn e minseñse miangan été.
- 15 Mvom a bôt be nee bibotan aval ete :
Mvom a bôt ba Zambe a ne YEHOVA !

YEHOVA a ne nse'an amu mvaé jé

(Deut 32 :3 ; Besam 111 ; 146 ; 147)

Jia ékaña'a. Jia David.

YOYONO MEYE

1 M'aye se'e wo, Zambe wom, A Njô Bôt;

A m'aye se'e jôé dôé nnôm éto a nnôm éto.

2 Môs ôse m'aye se'e wo,

M'aye kañe jôé dôé nnôm éto a nnôm éto.

3 YEHOVA a ne anen, a yiane dañe kañeban,

A anene dé e ne te jame ya fas.

4 Miaé bôte wua w'aye se'e mimboane miôé e be wu mbok ;

A kañete biwôlô bi mame biôé.

5 Ajô abeñ étôto'o ya дума dôé

A bitua mimboane biôé, m'aye simesane de e nlem.

6 Bôt b'aye kobô ajô ngule beangôndô be mame bôé;

A b'aye kañete anene dôé.

7 B'aye sôé дума ya abui mvaé dôé,

A b'aye yia zôsô wôé bia tyiñe yôp.

8 YEHOVA a ne mvam a ñwô'ane bôt éngôngo ;

A ne ôtete'e ya yaa, a mvam abui.

9 YEHOVA a bo bôte bese mvaé ;

A mvame jé é ne e be bôte bese a nga kôm.

10 Mimboane miôé mise mi aye ve wo akéva, A YEHOVA ;

A mimfufube mi bôte miôé mi aye kañe wo.

11 B'aye kobô ajô ya étôto' éjôé jôé,

A laan ajô ya ngule jôé minlañ ;

12 A liti bone be bôt beta be mame bôé;

A дума ya étôto' éjôé jôé.

13 Ejôé jôé é ne éjôé ya nnôm éto,

A njôane wôé ô too akekui miaé mise.

14 YEHOVA a bi ba bese b'aku,

A télé ba bese be ne mvitebane si tetele.

15 Mise me bôte bese m'ayange wo ;

A w'aye ve be bidi biap éyoñ j'ayian.

16 W'akui wo wôé,

A jalé nkômbane vevea jôm ase a vee.

17 YEHOVA a ne zôsô e mezene mé mese,

A mvam e mimboane mié mise.

18 YEHOVA a ne bébé e be ba bese b'aloene nye,

Ba bese b'aloene nye a benya mejôô.

19 A ye jalé nkômbane ba bese b'ako nye woñ,

- A ye fe wô'ô ñyône wop, a nyii be.
20 YEHOVA a ba'ale ba bese b'anye'e nye;
Ve a ye jiane mbia be bôte bese.
21 Anyu dam d'aye kobô ékaña'a YEHOVA;
Minsône mise mi kañe' mfufube jôé wé, nnôm éto a nnôm éto.

YEHOVA mefe'a molô

(ESD 6:16; Besam 145; 147; Yer 17:5-8)

146 1 Kañane YEHOVA !

- A nleme wom, kañe' YEHOVA.
2 M'aye kañe YEHOVA nté me vee;
M'aye yia Zambe wom bia bi ékaña'a nté me bili ényiñ.
3 Te tabe bone be bejô bôt mebun,
Mona mô, nnye ate mvolan ô nji bo e be nye.
4 Eyoñ mvebe wé w'akôlô a bulan e mete'e mé;
Môs ôte ôbien minsimesane mié mi ajañ.
5 Mvom a mô mvolane wé ô ne e be Zambe Yakob,
Nnye ate ndinleme jé é ne e be YEHOVA Zambe wé :
6 Nyô a nga té yôb a si, Mañ, a biôm bise bi ne bie été ;
Nyô a ba'ale benya mejô nnôm éto ;
7 Nyô a tyi'i ba b'awu ékpwe'ele mejô ;
Nyô a ve ba b'awô'ô zaé bidi ; YEHOVA a suu mimbôk ;
8 YEHOVA a kui mindindim mis ;
YEHOVA a telé ba be ne mvitebane si tetele ;
YEHOVA a nye'e bôt be ne zôsô.
9 YEHOVA a ba'ale mintabe ;
A kale minkus a bobenyui ;
Ve zene mbia be bôt a bôé je kayale.
10 YEHOVA a ye jô nnôm éto.
A Siôn, Zambe wôé, a ye jô akekui miaé mise.
Kañane YEHOVA !

Nkañan amu Yéruselem a beta

yebe a yen mvaé

147

1 Kañane YEHOVA !

Amu a ne mba jame ya yia Zambe wongane bia bi ékaña'a ;

Amu a ne mvam, a jia ékaña'a j'ayiane nye.

2 YEHOVA a lôñe Yéruselem;

A tôkan awutu'u ya Israël.

3 A saé ba be ne ntya'ane minlem,

A tiñeti meveñe map.

4 A lañe tañ ateté;

A yôlé de ese môé map.

5 Nti wongan a ne anen, a afo'o mfa'a ya ngu ;

Fe'e jé é ne te nné.

6 YEHOVA a kale ba be ne minlem évôvoé ;

A wua mbia be bôte si.

7 Yi'ane YEHOVA bia bi mvean akéva;

Yi'ane bia bi abeñe metyiñ e be Zambe wongan a mvét !

8 Nyô a buti yôb a minkut,

Nyô a kôm mveñ mfa'a ya si nyô,

Nyô a bo bilo'o bi faa e bone minkôle yôp.

9 A ve tit bidi bié,

A bone biñbwañ b'ayôn.

10 A ne te wô' avak amu ngul ékabela ;

A ne te yen mvaé amu mebo me môt.

11 Ve YEHOVA a yen mvaé mfa'a ba b'ako nye woñ,

Mfa'a ba b'atabe mvame jé ndinlem.

12 Kañe' YEHOVA, A Yérusalem !

Kañe' Zambe wôé, A Siôn !

13 Amu a yemete mimfeta'a ya mimbé miôé;

A botane bone bôé ya été.

14 A bo minné miôé mvo'é;

A jalé wo a nlisi a dañ mvaé.

15 A lôm abendé dé e si nyô ;

Ajô dé d'adañe wulu avô.

16 A ve éfumulu mfôô aval ane mevule me ntômba ;

A miase meta'a aval ane asup.

17 A wua glas e si aval ane mimbañ ;

Za a ne ngule ya tebe vôm avebe dé e né ?

- 18 A lôm ajô dé, a nyemele bie :
A bo évuñulu jé na é vuñ, a mendim m'alôt.
- 19 A liti Yakob ajô dé,
Israél mintelane memvinda mié a minjôane mié.
- 20 A nji ke bo ayoñ afe nalé ;
Be nji ke yem minjôane mié.
Kañane YEHOVA !

Mintéane mise mi alobane na mi

kañe YEHOVA

(Besam 103 : 20-22 ; 113 : 1-4 ; Nkul 4:8-11 ;
5 :11-14)

148

- 1 Kañane YEHOVA !
Kañane YEHOVA nkañan w'aso e yôb été :
Kañane nye ôyab e yôb été !
- 2 Kañane nye, beéngéle bé bese :
Kañane nye, minsamba mewosan mié mise !
- 3 Kañane nye, jôb a ngon :
Kañane nye, mia ateté ese d'afaé !
- 4 Kañane nye, mia yôp ya yôp,
A mia mendim me ne e yôb été.
- 5 Kañese'e na, be kañe jôe YEHOVA;
Amu a nga jô, ane be nga téban.
- 6 Nalé fe a nga télé bie nnôm éto a nnôm éto :
A nga tyi'i minné miap ane be se ngule ya lôt.
- 7 Kañane YEHOVA nkañan w'aso e si nyô,
Mia beta be biôme ya mañ a bido'o bise;
- 8 Nduan a meta'a, éfumulu mfôô a ndutu;
Evuñulu ôkôs, bi abo ajô dé;
- 9 Beta minkôl a bone minkôle bese;
Bilé bi awum a bekédar bese;
- 10 Betit a biyem bise;
Biôm bi anyi'itan a anon d'aye;
- 11 Bejô bôte ya si nyô a meyoñe mese ;
Bone bejô bôt a bejô bese ya si nyô;
- 12 Bendôman a bengone bebaane,

- Minnôm a bongô !
- 13 Kañese'e na be kañe jôé YEHOVA,
Amu jôé dé étam e ne mbetane yôp;
Etôto'o j'adañe si a yôp a mbetan.
- 14 A nga bete nla'a yôp mfa'a bôte bé,
Ekaña'a mfa'a mimfufube mié mise,
Mfa'a bôte bé ya Israël be ne nye bebé.
Kañane YEHOVA !

Israél a loobane na a kañe

YEHOVA

(Besam 47; 48; Zak 9:9, 12-17; Nkul 2:26, 27)

149

1 Kañane YEHOVA !

- Yi'ane YEHOVA mfefé jia,
A ékaña'a jé e ékôane bebuni bé été.
- 2 Kañese'e na bone be Siôn be vak e be Njôô wop.
- 3 Kañese'e na be kañe jôé dé a abôk:
Kañese'e na be yia nye bia bi ékaña'a a ngom a mvet.
- 4 Amu YEHOVA a yen mvaé e be bôte bé :
A jalé bôt be ne minlem évôvoé biôm bijañ a mendem me ndañan.
- 5 Kañese'e na, bebuni be vak étôto' été;
Kañese'e na be yia bia amu avak e binoñe biabe yôp.
- 6 Kañese'e na beta bikaña'a bi Zambe bi bo e menyu mab été,
A fansoñ é nee meyo mimfa'a mibaé e mo mab été.
- 7 Be bo akuna'a e be meyoñe biku,
A melep e be meyoñe me bôt.
- 8 Be ka'a bejô bôte bap a mengôkop,
A mintômba mi bôte miap mengata'a bityé;
- 9 Be tyi'i be mejô ane e ne ntilan !
Bebuni bé bese be bili duma di.
Kañane YEHOVA !

Nloene ya kañe Zambe a

bibôbôma mezik

(2 Mink 5:12, 13; Besam 148; Nkul 5:13 , 14)

150

1 Kañane YEHOVA !

Kañane Zambe e mfufube nda wé été;

Kañane nye e ñyeme ya ngule jé été !

2 Kañane nye amu ngule mimboane jé;

Kañane nye aval d'ayian a mbamba anene wé !

3 Kañane nye a tyiñe toñ;

Kañane nye a ndenge a mvet;

4 Kañane nye a ngom a abôk;

Kañane nye a bibôbôma bi nee mintem a ndiñ !

5 Kañane nye a biwoé bi ne tyiñe bizan ;

Kañane nye a biwoé bi ne tyiñe nyas !

6 Kañese'e na, jôm ése é bili mvebe, é kañe YEHOVA !

Kañane YEHOVA !